


म उद ह्यात्लं ब उ । दाल हं ल छ । फ लं त हिं । स व वु व रियं वं
 य प्र रियं म र ग य छालं वि सालं ना हा । पी त स क्तु इ न्ना लि ने र
 रि सी व क्त । ता वं वं द उ ध म क म नि र उ मो स छ त ह्य र उ । द
 वि क्ष य गं सु द क रं बाले पाल गं म ए । छ ह्य ह्य रियं च किं वि
 द यं न म दू स गं । द धा वं द र स बा ण म णि स मा व रि स त व ग
 म री गं । द प र द्धि वि दि उ गं स्या । पं ड य सि रि ऊ ल व द रा
 व र म हि मा । द द । ज्ञा न्न व ल ये वं द । म रा म क्त य
 स्मै ॥ ॥ अं धा यं ॥ १८६७ ॥ ब ॥ ॥ ॥



श्री नगर्षिगणिविरचितः

कल्पान्तर्वाच्यः ॥

सम्पादक :

पूज्यपाद शासनसम्राट श्री नेमि-अमृत-देव

हेमचन्द्रसूरि-शिष्य

आचार्यश्री विजय प्रद्युम्नसूरिः

श्री श्वेताम्बर-मूर्तिपूजक-जैन-बोर्डिंग-ग्रंथमाला-१४

श्री नगर्षिगणिविरचितः

कल्पान्तर्वाच्यः ॥

सम्पादक :

पूज्यपाद शासनसम्राट् श्री नेमि-अमृत-देव

हेमचन्द्रसूरि-शिष्य

आचार्यश्री विजय प्रद्युम्नसूरिः



प्रकाशक

शारदाबेन चिमनभाई एज्युकेशनल रिसर्च सेन्टर

शाहीबाग, अहमदाबाद-४.

श्री धेताम्बर-मूर्तिपूजक-जैन-बोर्डिंग-ग्रंथमाला-१४

श्री नगर्षिगणिविरचितः

कल्पान्तर्वाच्यः

*

सम्पादक :

आचार्यश्री विजय प्रद्युम्नसूरिः

*

प्रकाशक

शारदाबेन चिमनभाई एज्युकेशनल रिसर्च सेन्टर

‘दर्शन’, शाहीबाग, अहमदाबाद-३८० ००४.

*

प्रथमावृत्ति ई० स० १९९७, प्रतियाँ : ३००

*

मूल्यम् : ५०

*

प्राप्तिस्थान

शारदाबेन चिमनभाई एज्युकेशनल रिसर्च सेन्टर

‘दर्शन’, शाहीबाग, अहमदाबाद-३८० ००४.

*

मुद्रक

अरिहंत कॉम्प्युटर ग्राफिक्स

जैन विद्यार्थी गृह कम्पाउन्ड, सोनगढ-३६४ २५०

फोन : (०२८४६) ४४३८९

પ્રકાશકીય

પર્યુષણ એટલે જૈનોનું સર્વોત્તમ પર્વ. આ પર્વના દિવસો દરમ્યાન જૈનો તપ, જપ દ્વારા આત્મોન્નતિની સાધના તો કરે છે, સાથે સાથે પ્રતિવર્ષ કલ્પસૂત્ર ગ્રંથનું પારાયણ પણ કરવામાં આવે છે. કલ્પસૂત્રમાં તીર્થકરોના ચરિત્ર, સ્થવિરાવલી, શ્રમણાચારનું વર્ણન કરવામાં આવ્યું છે. સૂત્રાત્મક શૈલીમાં રચાયેલ આ ગ્રંથમાં અનેક પદાર્થો, પ્રસંગોનું વર્ણન સંક્ષેપમાં કરવામાં આવેલ છે. જ્યારે કેટલાંકનો તો સંકેત માત્ર કરવામાં આવ્યો છે. આવી વિગતોની સ્પષ્ટતા પ્રસ્તુત ગ્રંથમાં કરવામાં આવી છે. કલ્પસૂત્રમાં આવતી કથાઓને સંક્ષેપમાં રજૂ કરવામાં આવી છે. પ્રાકૃત ભાષામાં રચાયેલ પ્રસ્તુત ગ્રંથની ભાષા અને શૈલી સરળ અને સુબોધ છે.

નગર્ષિ ગણિ (વિ. સં. ૧૬૫૭) વિરચિત આ ગ્રંથ અઘાવધિ અપ્રકાશિત હતો. જૈનજ્ઞાનભંડારોમાંથી પ્રસ્તુત ગ્રંથની હસ્તપ્રત મેળવી, તેનું સંપાદન-સંશોધનનું કાર્ય વિદ્વદ્વર્ચ આચાર્યશ્રી પ્રદ્યુમ્નસૂરીશ્વરજી મ. એ ખૂબ જ ચિવટથી કરેલ છે. સંસ્કૃત-પ્રાકૃત ભાષા-સાહિત્યના મર્મજ્ઞ વિદ્વાન્ પૂજ્યશ્રીએ આ ગ્રંથનું સંપાદન કર્યું હોવાથી ગ્રંથનું ગૌરવ વધ્યું છે તે બદલ અમે તેમના આભારી છીએ.

ગ્રંથમાં આવતી વિગતો ઐતિહાસિક દૃષ્ટિએ ઘણી જ મહત્વની છે. તુલનાત્મક દૃષ્ટિએ અભ્યાસ કરનાર વિદ્વાનોને પણ આ ગ્રંથમાંથી ઘણી જ સામગ્રી ઉપલબ્ધ થઈ શકે તેમ છે. કથાઓનો તુલનાત્મક અભ્યાસ કરનારને રસપ્રદ માહિતી પૂરી પાડનાર આ ગ્રંથ છે. આમ પ્રસ્તુત ગ્રંથ આત્મસાધકોને, અભ્યાસુને અને વિદ્વાનોને ઉપયોગી થાય તેવો છે. આવા આ ગ્રંથનું પ્રકાશન કરતાં અમે આનંદ અનુભવીએ છીએ.

—૫૬૧૧૬

✽ સંપાદકીય નિવેદન ✽

પરમ પવિત્ર શ્રી કલ્પસૂત્ર આપણે ત્યાં પ્રત્યેક વર્ષે પર્યુષણ મહાપર્વમાં અવશ્ય વાંચવામાં, સંભળાવવામાં આવે છે.

આ શ્રી કલ્પસૂત્ર ઉપર પ્રાચીન ચૂર્ણિ મળે છે તે ચૂર્ણિગ્રંથમાં આવતા શબ્દોના અર્થ-પર્યાય પણ મળે છે.

વ્યક્તિગત ધોરણે શ્રીકલ્પસૂત્રનું વાંચન કરવાનું હોઈ તેના અર્થને સમજવા માટે જરૂર પુરતું અર્થ સ્પષ્ટીકરણ સ્વરૂપ જે લખાણ હોય છે તે અન્તર્વાચ્ય કહેવામાં આવે છે. આવા અન્તર્વાચ્ય હસ્તલિખિત ગ્રંથ ભંડારમાં ઘણી મોટી સંખ્યામાં મળે છે. આવા અન્તર્વાચ્ય સંસ્કૃત-પ્રાકૃત ભાષામાં ગદ્ય-પદ્ય મિશ્ર સ્વરૂપે મળે છે. તેમાં આ વિ. સં. ૧૬૫૭માં પંડિત શ્રી નગર્ષિગણી રચિત કલ્પાન્તાર્વાચ્ય નવીન જ ભાત પાડે છે.

આ ગ્રંથમાં પણ શ્રીકલ્પસૂત્રના તે તે પ્રતિકોના સ્પષ્ટીકરણરૂપ અર્થ વિસ્તાર જ આપ્યા છે. પણ તે બધું જ પદ્યમાં છે વળી પ્રાકૃત ભાષામાં છે.

શ્રી નગર્ષિગણી જગદ્ગુરુ શ્રીહીરવિજયસૂરીશ્વરજી મહારાજાની પરંપરામાં થયા છે. જગદ્ગુરુના પટ્ટધર શિષ્ય આચાર્યશ્રી વિજયસેનસૂરીશ્વરજીના શિષ્ય છે. તેમને રચેલી બીજી બે વૃત્તિ મળે છે તેમાં એક પચન્ના ગ્રંથની છે.

પાટણ શ્રી હેમચન્દ્રસૂરીશ્વરજી જ્ઞાનમંદિરની બે હસ્તપ્રત ઉપરથી આ ગ્રંથનું સંપાદન કર્યું છે ને હસ્તપ્રતને જોતાં એવું લાગે કે બન્ને પ્રત કર્તાના પોતાના હાથે લખેલી છે. પણ જ્યારે સંપાદનની દૃષ્ટિએ તેમાંથી પસાર થવાનું થયું ત્યારે ખ્યાલ આવ્યો કે આ લહીયાના હાથની લખેલી પોથી છે. કારણકે બન્ને કોપી ઝેરોક્ષ જેવી જ લાગે છે. વળી અમુક અશુદ્ધિઓ એવી જોવા મળી કે કર્તાના હાથે આવી ક્ષતિ ન થાય. હા, એવું એવું બન્યું હોવું જોઈએ કે કર્તાના હાથે લખેલી પોથીની નકલ હોય એટલે પોથીમાં અંતે કર્તાએ જે લખ્યું હોય તે પણ આમાં લખાયું હોય, પણ તેમ કરતાં બીજી ભૂલો થઈ ગઈ હોય. જેમકે એક પ્રતમાં. એક ગાથા અધૂરી મળે છે તો બીજી પોથીમાં એ ગાથા એજ રીતે અને એ નંબરના પાનામાં એટલામી જ લીટીમાં જ મળે છે.

આની બીજી પોથી અન્યાન્ય જ્ઞાનભંડારમાંથી મળી શકી નથી.

ઉપાધ્યાયશ્રી વિનયવિજયજી રચિત સુબોધિકાવૃત્તિ જે પ્રત્યેક વર્ષે વંચાય છે તેના

છઠ્ઠા વ્યાખ્યાનમાં, પ્રભુ મહાવીરસ્વામીજી ચંદનબાળાને આંગણે પધારે છે ત્યારે શ્રી ચંદનની આંખમાં આંસુ નથી તેવું વર્ણન આવે છે અને આંસુ ન હોવાના કારણે શ્રમણ મહાવીરનો અભિગ્રહ પૂરો ન થયો તેથી તેઓ ત્યાંથી પાછા ફરે છે અને વળી શ્રમણ મહાવીર પાછા ફરવાના કારણે ચંદનને દુઃખ થાય છે તેથી આંસુ આવે છે અને તે કારણે પ્રભુ મહાવીર પુનઃ પધારે છે અને અડદના બાકુળા વ્હોરે છે.

આ પ્રકારના અધિકારને જોયા પછી જ્યારે આવશ્યકચૂર્ણિ, નવપદ પ્રકરણ બૃહદ્વૃત્તિ, મહાવીરચરિયં, ત્રિષષ્ટી ૦ દશમું પર્વ વગેરે ગ્રંથોમાં આ અધિકારમાં શ્રમણ મહાવીર જ્યારે પધારે છે ત્યારે જ ચંદનની આંખમાં આંસુ હતા. એવા અક્ષર મળ્યા અને એજ સંગત લાગ્યા. ત્યારે એવી જિજ્ઞાસા થઈ કે મહાવીરસ્વામીજીના આવા પ્રાચીન ચરિત્રોથી જુદો પાઠ સુબોધિકામાં ક્યાંથી આવ્યો ?

પણ જ્યારે પંડિત નગર્ષિકૃત આ કલ્પાન્તર્વાચ્ય જોયું તો તેમાં પણ ચંદનનો પ્રસંગ સુબોધિકામાં વર્ણવ્યો છે તેવો જ મળ્યો. આ કલ્પાન્તર્વાચ્યની રચના સુબોધિકાની રચનાની પૂર્વવર્તિ છે. તેથી ખ્યાલ આવ્યો કે સુબોધિકાકારની સામે આ સ્રોત છે.

છતાં હજી આ શોધ અધૂરી છે. શ્રી નગર્ષિ મહારાજની સામે વળી એવું કોઈ ચરિત્ર હોવું જોઈએ કે જેમાં આવું વર્ણન હોય. અસ્તુ.

આ ગ્રંથમાં પણ જ્યાં એ ચંદનનો પ્રસંગ આવ્યો છે ત્યાં ટિપ્પણમાં આ વાત મુકી જ છે.

શ્રમણ મહાવીરના સમગ્ર જીવનને જોતાં અને આવશ્યક ચૂર્ણિ જેવા ગ્રંથોને ધ્યાનમાં લેતા કલ્પાન્તર્વાચ્યનો કે સુબોધિકાનો પાઠ ગળે નથી ઉતરતો અને પ્રભુના જીવનમાં અભિગ્રહ પૂર્ણ ન થાય તેથી આવું આવીને પાછા જવું સંભવિત નથી અને ભોંયરામાં પૂરાયેલા ભૂખ્યા-તરસ્યા, ચંદનને હાથે બેડી, માથે મુંડનવાળી સ્થિતિમાં એક સ્ત્રીને આંખે આંસુ ન આવે તે પણ સંભવિત નથી.

તેથી મારું તો દૃઢપણે માનવું છે કે તમામ મુનિ મહારાજો એ છઠ્ઠા વ્યાખ્યાનમાં એ પ્રસંગે પ્રભુ પધારે છે ત્યારે ચંદનના આંખમાં આંસુ છે તેવું જ પ્રતિપાદન કરવું જોઈએ.

આવી રીતના ગ્રંથોનું પણ એક જ જુદું મૂલ્ય હોય છે. ઘણાંને પ્રશ્ન થાય છે કે સંપાદન આવા પ્રકાશનનું ફળ શું ? વ્યાખ્યાનમાં તો કોઈ વાંચવાનું નથી. આવી પ્રાકૃત ભાષાબદ્ધ પદ્યમય મિતાક્ષરીવૃત્તિ કોણ વાંચે. જ્યારે અત્યારે જે સુબોધિકાવૃત્તિ વંચાય છે તેને પણ સંક્ષિપ્ત કરવાનું વલણ પ્રકટ થતું રહે છે ત્યાં આની ઉપયોગિતા શી ? એવો

પ્રશ્ન થાય અને થવો સ્વાભાવિક છે પણ આવા ગ્રંથો અધ્યયનની દૃષ્ટિએ મહત્વના હોય છે. અર્થ પરંપરાના મૂળ શોધવા માટે પણ આ ઉપયોગી બનતા હોય છે.

વળી શ્રમણો કેવા સ્વાધ્યાય પરાયણ રહેતા હતા અને શ્રુતની ઉપાસનામાં સતત રક્ત રહેતા હતા તેનો પણ આજના શ્રમણવૃંદને અંદાજ આવે. આવા ઘણાં પ્રયોજનોને સામે રાખીને આવા પ્રયાસ થતા હોય છે.

શક્ય પ્રયત્ને શુદ્ધ કરવાનો પ્રયત્ન કર્યો છે કેટલાંક સ્થાનોના પાઠ નિર્ણય માટે મારા પૂજ્યપાદ ગુરુ મહારાજશ્રી વિજયહેમચંદ્રસૂરીશ્વરજી મહારાજ સાથે પણ પરામર્શ કર્યો છે અને તેઓના ક્ષયોપશમનો પણ લાભ મળ્યો છે.

બીજા પ્રત્યન્તર નહીં મળવાના કારણે કેટલાંક સ્થાનો એમને એમ જ રાખવા પડ્યા છે. વિદ્વાનોને હજી આમાં ઘણું કરવા જેવું લાગશે પણ એ દૃષ્ટિએ આ ગ્રંથમાં વિશેષ ઊંડાણમાં જઈ શ્રમ નથી કર્યો. મૂળને જે મળે છે તેને પ્રકાશિત કરવાનો આશય રાખ્યો છે.

પરિશિષ્ટમાં આ કલ્પસૂત્રની જે પ્રાચીન ચૂંટી મળે છે તે તથા વિષય શબ્દોના અર્થ-ટિપ્પણ પણ આવ્યા છે. આગમ પ્રભાકર પૂજ્ય મુનિ મહારાજશ્રી પુણ્યવિજયજી મહારાજ દ્વારા સંપાદિત ગ્રંથમાંથી એ બન્ને અહીં ઉદ્ધૃત કર્યા છે તેની સાભાર નોંધ લઉં છું.

આના પ્રકાશનની જવાબદારી શ્રી શારદાબહેન ચીમનલાલ રિસર્ચ સેન્ટરે (અમદાવાદ) સ્વીકારીને પ્રશસ્ય શ્રુતભક્તિ કરી છે.

અને અન્તે આવા શ્રુતભક્તિના કામથી લઈ જ્ઞાનદર્શનચારિત્રના તમામ યોગોમાં મારા પરમ ઉપકારી સૌમ્યમૂર્તિ પૂજ્યપાદ આચાર્ય મહારાજશ્રી વિજયદેવસૂરીશ્વરજી મહારાજ તથા પરમ ઉપકારી વ્યાકરણાચાર્ય મારા ગુરુ મહારાજ આચાર્યશ્રી વિજય હેમચંદ્રસૂરીશ્વરજી મહારાજનું પાવન સુખદાયી સાંનિધ્ય અને હુંફાળી કૃપા દૃષ્ટિનો સાતાદાયી અનુભવ સતત થતો રહ્યો છે તેવું પણ કૃતજ્ઞતાભાવે સોલ્લાસ સ્મરણ કરીને ધન્યતાનો અનુભવ કરું છું.

આ ગ્રંથની હસ્તપ્રત પરથી કોપી-લિપ્યન્તરનું કાર્ય પં. રમેશભાઈ હરિયાએ કરી આપ્યું છે તથા તેની સાથે મૂળ પ્રતને મેળવવાનું કામ અમારા શિષ્ય મુનિરાજશ્રી રાજહંસવિજયજીએ ખંતથી કર્યું છે. બધા કાર્યોમાં સતત સહાય મળી છે.

તથા પ્રૂફ વાંચવાનું કામ પ્રો. પી. સી. શાહે (રાજકોટ) કરી આપ્યું છે.

પંડિતશ્રી જિતુભાઈ બી. શાહનો પણ સહયોગ સાંપડ્યો છે.

શ્રીહેમચન્દ્રાચાર્ય જ્ઞાનભંડાર પાટણના વહીવટદારશ્રી યતીનભાઈ, મયૂરભાઈ, વી. ટી. શાહ વગેરેનો સ્નેહભર્યો સહકાર મળ્યો છે. આ બધાનું સાનંદ સ્મરણ કરું છું અને ધન્યવાદ આપું છું.

હજી પ્રાચીન જ્ઞાનભંડારોમાંથી આવી શ્રીકલ્પસૂત્ર ઉપરની વૃત્તિઓ છે/હશે તે પણ જો યોગ્ય વિદ્વાન મુનિમહારાજોના હાથે સંપાદિત-સંશોધિત થઈ પ્રકાશિત થાય તો ઘણાં સંશયોનું નિરાકરણ મળે. એવા પ્રકાશનો જરૂર થશે એવી આશા સાથે--

શ્રુતવાચનાભૂમિ

વલ્લભીપુર

ફા. સુ. ૮

વિ. સં. ૨૦૫૪

—પ્રદ્યુમ્નસૂરિ



कल्पान्तर्वाच्यग्रन्थनुं अतिमपत्र
(पाटश श्री हेमयन्द्रायार्थ ज्ञानभंडार)

णमोऽत्यु णं समणस्स भगवओ महावीरस्स ॥

श्री सुधर्मस्वामिने नमः ॥

नमोनमः श्री गुरुनेमिसूरये ॥

श्री नगर्षिगणिविरचितः

कल्पान्तर्वाच्यः ॥

पणमिय वीर-जिणिंदं अप्प-मईणं सुहावबोह-कए।

कप्पंतर-वच्चाणं उद्धारं किंचि कुव्वे हं ॥ १ ॥

पुरिम-चरिमाण कप्पो मंगलं वद्धमाण-तित्थंमि।

इह परिकहिया जिण-गण-हराइ-थेरावली-चरितं ॥ २ ॥

पुरिम-चरिम-जिणाणं सीसाणं एस कप्पओ चेव।

जं वासासु पज्जोसविज्जइ वासं पडउ मा वा ॥ ३ ॥

मज्झिमगा भयणिज्जा वासं पज्जोसविंति वा नो वा।

कप्पो दसहा भणिओ जहक्कमं चेव वुच्छामि ॥ ४ ॥

^१आचेलक्कदेसिय^२ ^३सिज्जायर-^४राए पेंड ^५कियकम्मे।

^६वय-^७जिड्ड-^८पडिक्कमणे ^९मासं ^{१०}पज्जोम्वण-कप्पे ॥ ५ ॥

पुरिमंतिम-जिण-मुणिणो सेय-पमाणाववेयमवि वत्थं।

धारंति सेसया पुण जहोवल्लं जहाजुगं ॥ ६ ॥ (१)

एगुद्देसेण कडं असणाइ पुरिम-चरिम-साहूणं।

सव्वेसिं नो कप्पइ मज्झिमगाणं जमुदिस्स ॥ ७ ॥ (२)

सिञ्जायरति भण्णइ आलय-सामी य तस्स जो पिंडो ।
 सो सव्वेसिं न कप्पइ पसंग-गुरु-दोस-भावाओ ॥ ८ ॥
 जइ जग्गंति सुविहिया करंति आवस्सयं च अण्णत्थ ।
 सिञ्जायरो न होइ सुत्ते व कए व सो होइ ॥ ९ ॥
 तण-डगल-छार-मल्लग-सिञ्जा-संधार-पीढ-लेवाइ ।
 सिञ्जायर-पिंडो सो न होइ सेहो य सोवहिओ ॥ १० ॥ (३)
 मुदियाइ-गुणो राया अट्ठविहो होइ तस्स पिंडुत्ति ।
 पुरमेयरण एसो वाघाईहिं पि पडिक्खो ॥ ११ ॥
 मुइओ मुद्धभिसित्तो 'पंचहिं सि[स]द्धिं तु भुंजइ रज्जं ।
 तस्स उ वज्जो पिंडो तव्विवरीयंमि भयणा उ ॥ १२ ॥
 असणाइआ चउरो वत्थं पायं च कंबलं चेव ।
 पाउच्छणगं च तहा अट्ठविहो रायपिंडुत्ति ॥ १३ ॥
 ईसर-पभिईहिं तहिं वाघाओ खद्ध-लोह-दाराणं ।
 दंसण-संगो; गरहा इयरेसि न अप्पमायाओ ॥ १४ ॥ (४)
 कियकम्मं पि दुविहं अब्भुट्ठाणं तहेव वंदणयं ।
 समणेहिं समणीहि य जहारिहं होइ कायव्वं ॥ १५ ॥
 सव्वाहिं संजईहिं किइकम्मं संजयाण कायव्वं ।
 पुरिसुत्तमुत्ति धम्मो सव्व-जिणाणं पि तित्थेसु ॥ १६ ॥ (५)
 पंच-वओ खलु धम्मो पुरिमस्स य पच्छिमस्स य जिणस्स ।
 मज्झिमगाण जिणाणं चउव्वओ होइ विण्णेओ ॥ १७ ॥
 नो अपरिग्गहियाए इत्थीए जेण होइ परिभोगो ।
 ता तव्विरईइच्चिय अबंभ-विरइत्ति पण्णाणं ॥ १८ ॥
 दुण्ह वि दुविहो वि ठिओ एसो आजम्म चेव विण्णेओ ।
 इय वय-भेया दुविहो एगविहो चेव तत्तेणं ॥ १९ ॥ (६)
 उवठावणाइ-जिद्धो विण्णेओ पुरिम-पच्छिम-जिणाणं ।
 पव्वज्जाए उ तहा मज्झिमगाणं निरइयारो ॥ २० ॥ (७)
 सप्पडिक्कमणो धम्मो पुरिमस्स य पच्छिमस्स जिणस्स ।
 मज्झिमगाण जिणाणं कारण-जाए उ पडिक्कमणं ॥ २१ ॥ (८)

पुरिमंतिम-तित्थगराणं मासकप्पो ठिओ मुणेअव्वो ।
 मज्झिमगाण जिणाणं अवट्ठिओ एस विण्णेओ ॥ २२ ॥
 दोसासइ मज्झिमगा अच्छंति य जाव पुव्व-कोडी वि ।
 इहराओ न मासं पि हु, एवं खु विदेह-जिण-कप्पी ॥ २३ ॥ (६)
 पज्जोसवणा-कप्पो चेवं पुरिमेयराइ-भेएणं ।
 उक्कोसेयर-भेओ; सो नवरं होइ विण्णेओ ॥ २४ ॥
 चाउम्मासुक्कोसो सत्तरि राइंदिया जहण्णो य ।
 थेराण जिणाणं पुण नियमा उक्कोसओ चेव ॥ २५ ॥
 इत्थ य अणभिग्गहियं वीसइ-राई सवीसइ-मासो ।
 तेण परमभिग्गहियं गिहिनायं कत्तियं जाव ॥ २६ ॥
 काऊण मास-कप्पं तत्थेव ठिआण तीस मग्गसिरे ।
 सालंबल(न)याणं पुण छमासिओ होइ जिट्ठग्गहो ॥ २७ ॥
 काईअभूमी संथारए य संसत्त दुल्लहे भिक्खे ।
 एएहिं कारणेहिं अपत्ते होइ निग्गमणं ॥ २८ ॥
 राया सप्पे कुंथू अगणि गिलाणे य थंडिलस्स असईए ।
 एएहिं कारणेहिं अपत्ते होइ निग्गमणं ॥ २९ ॥
 वासं वा नोवरमइ पंथा वा दुग्गमा सचिखल्ला ।
 एएहिं कारणेहिं अइक्कंते होइ निग्गमणं ॥ ३० ॥
 असिवे ओमोयरिए रायदुट्ठे भए य गेलण्णे ।
 एएहिं कारणेहिं अपत्ते होइ निग्गमणं ॥ ३१ ॥
 दुग-तिण्णि-सत्त-वारा उडु वासासु न हणंति तं खित्तं ।
 चउरट्ठाइ हणंति जंघा वि अवरेणं ॥ ३२ ॥
 धुव-लोओ उ जिणाणं निच्चं थेराण वास-वासासु ।
 असहु-गिलाणगस्स वि नाइक्कमिज्ज तं रयणिं ॥ ३३ ॥ (१०)
 आचेलुक्कुद्देसिय पडिक्कमणे रायपिंड-मासेसु ।
 पज्जोसवणाकप्पंमि य अट्ठियकप्पा मुणेयव्वा ॥ ३४ ॥
 सिज्जायर-पिंडंमि य चाउजामे य पुरिस-जिट्ठे य ।
 किइकम्मस्स य करणे ठियकप्पा मज्झिमगाणं पि ॥ ३५ ॥

वाहिमवणेइ भावे कुणइ अभावे तयं तु पढमं ति ।
 बियमवणेइ न कुणइ तइयं तु रसायणं होइ ॥ ३६ ॥
 एवं एसो कप्पो दोसाभावेऽवि किज्जमाणो य ।
 सुंदरभावाओ खलु चारित्त-रसायणं होइ ॥ ३७ ॥
 एवं कप्प-विभागो तइओसह-नायओ मुणेयव्वो ।
 भावत्थ-जुओ इत्थ उ सव्वत्थ वि कारणं एवं ॥ ३८ ॥
 जह केणाऽवि य रण्णा ससुयस्साणागयंमि रोगंमि ।
 तप्पडियार-निमित्तं समागया तिण्णि विज्जवरा ॥ ३९ ॥
 तत्थेगो भणइ ओसहमत्थि ममं संतो वाहिमवणेइ ।
 कुणइ अभावे तं पुण तेणालं सुत्तसीहेणं ॥ ४० ॥
 बीओ भणइ ममोसहमवणेइ संतयं; न य नवं कुणइ ।
 तइओ भणइ ममोसहमत्थि परम-रसायण-सरिच्छं ॥ ४१ ॥
 संतं फेडइ वाहिं असइ पुणो कुणइ रूव-लावणं ।
 तइओओसह-कप्पो पुण एसो कप्पो मुणेयव्वो ॥ ४२ ॥
 पुरिमाण दुव्विसुज्झो चरिमाणं दुरणुपालणओ ।
 कप्पो मज्झिमगाणं सुविसुज्झो सुहणुपालो य ॥ ४३ ॥
 उज्जु-जडा पढमा खलु नडाइ-नायाओ हुंति नायव्वा ।
 वक्क-जडा पुण चरिमा उज्जु-पण्णा मज्झिमा भणिया ॥ ४४ ॥
 रिउ-जड-साहू पिच्छिय नच्चंतं नडयं महापहंमि ।
 गुरुणा पुट्टे सच्चं कहिए मिच्छुक्कडं देइ ॥ ४५ ॥
 बीयं नायं कुंकुण वाणियस्स तेण वुह्वत्थाए ।
 गहिया दिक्खा इरि-उस्सग्ग-ठिओ पुच्छिओ गुरुणा ॥ ४६ ॥
 किं चिरमुस्सग्ग-ठिओ भणइ मए चित्तिया दया नाह ! ।
 कह तो सो भणइ इमं जइयाहं आसि गिहवासे ॥ ४७ ॥
 वासारंभे तइआ रुक्खुम्मलण-तणाइ-जालणयं ।
 किच्चा सालि-प्पमुहाण धण्णाणं वावणं कुव्वे ॥ ४८ ॥
 पच्छा पभूय-धण्णे निष्णण्णे सव्वया सुही वुच्छं ।
 पुत्ता य मे वराया न संति कुसला य तक्कजे ॥ ४९ ॥

मा ते मरउ लहुया इय जीव-दया कया य उस्सग्गे।
 बहु-जीव-विणासगरं न चिंतए साहू मग्ग-ठिओ ॥ ५० ॥
 आउट्टो खामेइ देइ मिच्छुक्कडं पुणो बाढं।
 इय उज्जु-जडा साहू पढमे तित्थंकरे भणिया ॥ ५१ ॥

वक्क-जडत्ति. (गा. ४४)

कथं वि कोइ य सिट्ठी दुव्विणयं पुत्तयं च सिक्खेइ।
 पियमाइप्पमुहाणं देयं पच्चुत्तरं नेह ॥ ५२ ॥
 इयं सिक्खिओ हु बालो कइया गिह-माणुंसेसु सव्वेसु।
 बाहिंणएसु दारं दच्चा मज्झिट्ठिओ रमइ ॥ ५३ ॥
 ते आगया भणंति गिह-दारुग्घाडणं कुणसु बाल!।
 पच्चुत्तरं न देइ सो जाव य ताव उव्विग्गा ॥ ५४ ॥
 ते भित्ति-उवरि चडिउं पिच्छंति य जाव सो य रममाणो।
 दिट्ठो भणिओ तेहिं सो भणइ कहुत्तरं देमि ॥ ५५ ॥

अवरं—

पणदससयजणसहिओ पव्वइओ सामि-पाय-मूलंमि।
 पहु-भायणिज्ज-जामाओ य इक्कारसंग-धरो ॥ ५६ ॥
 सावत्थीए पत्तो जमालि-साहू य विहरमाणो य।
 संझासमये साहू वागरिओ तेण सयणत्थं ॥ ५७ ॥
 इच्चाइ-वित्थरत्थो नेओ पण्णत्ति-सुत्त-मज्झाओ।
 बीओ वक्क-जडो पुण निदिट्ठो गणहराईहिं ॥ ५८ ॥
 जत्थ य चाउम्मासे चिट्ठति साहुणो विगयविग्घा।
 वक्खाणंति सुसुत्तं सिरिकप्पं मंगल-निमित्तं ॥ ५९ ॥
 मंताण सिट्ठो परमिट्ठी-मंतो,
 तित्थेसु सव्वेसु य पुंडरीओ।
 गुणेसु सिट्ठो विणओ वएसु;
 बंभव्वयं वा नियमेसु तोसो ॥ ६० ॥ (उपजाति)
 तवेसु सारो पसमो ^१पयाणे
 जीवाणुकंपा जिणसासणंमि।

सव्वेसु पव्वेसु य पव्वमेयं

संवच्छरियं तह सारभूयं ॥ ६१ ॥ उपजाति

आसंबरीणमेयं जमाली-पव्वंति होइ विक्खायं ।

इसि-पंचमी त्ति लोए पसिद्धमेयं तु सव्वत्थ ॥ ६२ ॥

मासाहिय-सुवियारो अंतरवच्चाओ होइ नायव्वो ।

गंथभूयत्थभावाभिहिओ न मए महाभाग ! ॥ ६३ ॥

संवच्छर-पडिक्कमणं अट्टमभत्तं च लोय-किच्चं च ।

सव्वजिणभत्तिपूया परुप्परं संघ-खामणयं ॥ ६४ ॥

एएसिं पंचण्हं कारणाणं च कए कयं एयं ।

जिणगणहरपमुहेहिं पञ्चुसवणामिहं पव्वं ॥ ६५ ॥

एयंमि पव्वदिवसे नंदिसरपमुह-पवर-तित्थेसु ।

मिलिया सयल-सुरिंदा कुव्वंति महं सुभत्तिए ॥ ६६ ॥

अथ कल्प-महिमा

तित्थंकराओ परमो नन्नो देवो परं पदं नत्थि ।

मुत्ति-पयाओ पवरं सित्तुंजय-पव्वओ पवरो ॥ ६७ ॥

तित्थेसु पवर-तित्थं अन्नं नत्थि य तिलोय-मज्झंमि ।

सिरिकप्पसुत्तमेयं तह पवरं सव्व-सुत्तेसु ॥ ६८ ॥

तवेण बंभचेरेण कणयदाणेण गोयमा ! ।

कम्मं खवेइ जं तित्थे तं कप्प-सवणेण य ॥ ६९ ॥

आजम्मं जस्स सट्ठस्स सम्मत्तस्स निसेवणे ।

जं पुण्णं गोयमा होइ तं कप्प-सवणेण य ॥ ७० ॥

एगग-चित्ता जिण-सांसणंमि

पभावणा-पूय-परायणा जे ।

ति-सत्तवारं निसुणंति कप्पं

भवण्णवं गोयम ! ते तरंति ॥ ७१ ॥ (उपजाति)

अथ क्षेत्र-गुणाः

चिक्खिल्ल-पाणि-थंडिल-वसही-गोरस जणाउले विज्जे ।

ओसह-निचयाऽहिंवइ पासंडा भिक्ख-सज्झाए ॥ ७२ ॥

सुलहा विहार-भूमी विथारभूमी य सुलह-सज्झाओ ।
 सुलहा भिक्खा य जहिं जहण्णयं वासक्खित्तं तु ॥ ७३ ॥
 चउ-गुणोववेयं तु खित्तं होइ जहण्णयं ।
 तेरस-गुणमुक्कोसं दुण्ह मज्झिमि मज्झिमगं ॥ ७४ ॥
 एवंविहंमि खित्ते ठायव्वं तु सव्व-साहूहिं ।
 संजम-पालण-हेउं वासावासं जओ भणियं ॥ ७५ ॥
 कामं तु सव्व-कालं पंचसु समिईसु होइ जइअव्वं ।
 वासासु अहिगारो बहु-पाणा मेयणी जेणं ॥ ७६ ॥

अष्टमे नागकेतुः -

एयंमि य वर-पव्वे संपत्ते पवर-भाव-जुत्तेहिं ।
 अट्टम तवं पगिडुं कायव्वं नागकेउ व्व ॥ ७७ ॥

तत्कथा....

चंदकंताभिहाणा नयरी तत्थत्थि विजयसेण निवो ।
 सिरिकंतसिद्धि-पवरो भज्जा से सिरिसही नामा ॥ ७८ ॥
 नागाईणुवजायणपुव्वं तेसिं तु पुत्तओ जाओ ।
 पज्जोसवणापव्वं आसण्णं तत्थ से आसी ॥ ७९ ॥
 गिह-माणुसाण वत्तं सुद्धा सो बालओ सरइ जाइं ।
 अट्टम-तवं पगिण्हइ न रोवइ न पीयइ दुद्धं ॥ ८० ॥
 सुकुमाल-भावओ पुण निद्धिद्धो आसि तक्खणं चेव ।
 सयणेहिं मओ नाउं भूमज्जे इत्ति संठविओ ॥ ८१ ॥
 सिरिकंतो सुय-मरणा मओ तया चलयमासणं नाउं ।
 धरणिंदो पुव्वभवं नाउं तस्सेव चिंतेइ ॥ ८२ ॥
 पुव्व-भवे वणिय-सुओ तस्स विमाया पओसमावण्णा ।
 सम्मं नो पडितप्पइ सो कहइ नियय-मित्तस्स ॥ ८३ ॥
 सो बेइ कयं न तए तवाइ-पुण्णं अओवमाणमिणं ।
 संपत्तं तुह तेणं करेहि किंची तवाइयं ॥ ८४ ॥
 तो करइ चउत्थाइ माणवमाणं जहित्तु भावेण ।
 पज्जोसवणा पव्वे काहिस्सं अट्टमं च तवं ॥ ८५ ॥

इय चित्तिज जा सुत्तो कुडीरए पवर-झाण-संजुत्तो ।
 ता पज्जलिओ अग्गी कहिंचि णायं विमायाए ॥ ८६ ॥
 मुक्को तीइ कुडीरे अग्गी सो तेण झत्ति जलियंगो ।
 मरिउं सुह-झाण-वसा संजाओ नागकेउ त्ति ॥ ८७ ॥
 सो जा न मरइ बालो ता जीवावेमि तत्थ संपत्तो ।
 धरणिंदो तस्स रक्खं करेइ पुप्फाइ-सिज्जाए ॥ ८८ ॥
 इत्थंतरंमि राया तद्धणमायाउं पेसिया पुरिसा ।
 धरणेण हक्किया ते बंभण-वेसेण पवरेण ॥ ८९ ॥
 रण्णो तेहिं कहियं राया सयमेव आगओ तत्थ ।
 पविसंतं भणइ निवं धरणिंदो कहइ किं कुणसि ॥ ९० ॥
 सो वेइ रायनीई धणं अपुत्तस्स गिण्हइ राया ।
 सो वयइ सिद्धि-पुत्तो जीवंतो अत्थि कहमेयं ॥ ९१ ॥
 पुव्व-भवाइ-सरूवं कहित्तु सव्वं नरेस-पमुहाणं ।
 एसो महानुभावो महप्पभावो भविस्सइ य ॥ ९२ ॥
 अट्ठम-तवप्पभावा नाओ एअस्स सव्व वुत्तंतो ।
 तेणागओहमेसो धम्म-पहावं पयासेउं ॥ ९३ ॥
 एवं चेव वइत्ता कंठे बालस्स हार पक्खित्ता ।
 धरणो गओ सठाणं ते सव्वे आगया ठाणं ॥ ९४ ॥
 अह अन्नया कयाइ कोऽवि नरो साहू चोर-बुद्धीए ।
 हणिओ रण्णा सोविहु सुहभावा वंतरो जाओ ॥ ९५ ॥
 नायं सव्वं तेणं ओहिए आगओ सकोव-परो ।
 रायाणं भू-पीढे पक्खित्ता भासए एवं ॥ ९६ ॥
 रे मूढ ! सो य अहयं अचोर चोरत्ति मारिओ जेणं ।
 जं कुव्वे तं पिच्छसु विउव्विया गाम-तुल्ल-सिला ॥ ९७ ॥
 मा होउ साहु-जिणहर-संघ-विणासुत्ति नागके उणा य ।
 उहं पासाओवरिं चडिउं धरिया पडंती सा ॥ ९८ ॥
 उवसमिओ तव्वयणा संहरिया सा सिला भणइ एवं ।
 एयस्स पसायेणं मुक्का भो रायपमुह-नरा ॥ ९९ ॥

इय वुत्तुं सो य गओ निव्विग्घं जाणिऊण नरनाहो ।
 वंदइ सक्कारेइ य नागकेउं च सविसेसं ॥ १०० ॥
 एगदिणे जिणगेहे नागकेऊ करेइ जिणपूयं ।
 कुसुमवर-नाल-मज्झ-ट्टिएण सप्पेण सो खद्धो ॥ १०१ ॥
 एगंते तं मुत्तुं विस-पसरं जाणिऊण संधारे ।
 जिणमुहविदिण्ण-दिट्ठी चिट्ठइ सुहझाणसंजुत्तो ॥ १०२ ॥
 घाइय-कम्म-चउक्कं खविऊणं सुक्क-झाण-संजुत्तो ।
 पत्तो केवलनाणं सुहभावा नागकेउ मुणी ॥ १०३ ॥
 सासणदेवीइ तया जइ-लिंगं आणिऊण से दिण्णं ।
 विहरेइ भवि-कमलाइं पडिबोहंतो य मुणि-पवरो ॥ १०४ ॥
 इह लोए पर-लोए जं वत्थु दुल्लहं हवइ किंचि ।
 तं तवसा पाविज्जइ जत्तं कुव्वेह तम्मि सया ॥ १०५ ॥

इइ नागकेउ-कहा ॥

सव्व नईणं जा हुज्ज वालुया सव्व-उदहीण जं तोयं ।
 तत्तो अणंत-गुणिओ अत्थो इक्कस्स सुत्तस्स ॥ १०६ ॥
 वयणे जीहाण सयं जइ उ भवे निम्मलं च मे नाणं ।
 तह वि हु कप्पसुयस्स य सुयत्थ-पारं न गच्छामि ॥ १०७ ॥
 एयं सिरिकप्पसुयं दसासुयक्खंधमट्ठमज्झयणं ।
 सिरिभद्दबाहु-गुरुणा उद्धरियं नवम-पुव्वाओ ॥ १०८ ॥

पूर्व-मानं

इग-दु-चउ-अट्ठ-सोलस-दुतीस-चउसट्ठि-इगसयडवीसं ।
 दुसयछप्पन्न-पणसया बारस इगसहस्स चउवीसं ॥ १०९ ॥
 दुसहसडयालीसं छण्णवइ अहिय सहस्स चत्तारी ।
 दुनवइ इगसयसमहिय अट्ठसहस्सा य सव्वगं ॥ ११० ॥
 तेसीय-तिसय-समहिय-सोल सहस्सा य करिवरा सव्वे ।
 झय-अंबाडी-सहिया कज्जल-रासी य तावइया ॥ १११ ॥
 मेलित्ता पुव्वाणं लिहणं किज्जइ पमाणमेयं तु ।
 न कयाइ केण लिहिया करि-दिट्ठंतेण कयमाणा ॥ ११२ ॥

[उराला णं तुमे देवाणुप्पिए! सुमिणा दिट्ठा कल्लाणा सिवा धण्णा मंगल्ला सस्सिरीआ आरुग्ग-तुट्ठि-दीहाउ-कल्लाण-मंगल्लकारगा णं तुमे देवाणुप्पिए! सुमिणा दिट्ठा तं जहा-अत्थलाभो देवाणुप्पिए! भोगलाभो देवाणुप्पिए! पुत्तलाभो देवाणुप्पिए! सुक्खलाभो देवाणुप्पिए! एवं खलु तुमं देवाणुप्पिए! नवण्हं मासाणं बहुपडिपुण्णाणं अब्बट्ठमाणं राइंदिआणं विइक्कंताणं सुकुमाल-पाणि-पायं अहीण-पडिपुण्ण-पंचिदिय-सरीरं लक्खण-वंजण-गुणोववेअं माणुम्माण-पमाण-पडिपुण्ण-सुजाय सव्वंग-सुंदरंगं ससि-सोमाकारं कंतं पिअदंसणं सुरूवं देवकुमारोवमं दारयं पयाहिसि॥ सूत्र-८॥]

जो भवइ सत्त-रत्तो छगुन्नओ पंचसुहम दीहो य।
 ति विउल-लहुगंभीरो बत्तीस सुलक्खणो पुरिसो॥११३॥
 नह-चरण-पाणि-जीहा दसण(च्छ) ^१छय-तालु-लोयणं तेसु।
 सत्तसु सिया जु रत्तो सत्तंगं सो लहइ लच्छिं॥११४॥
 कक्खा-वच्छं नासा किगाडिगा मुह-नहा य उन्नया जस्स।
 उन्नइ य तस्स भवइ दिणे दिणे वट्ठमाणा य॥११५॥
 दंत-तया-केसंगुलि-पव्व-नहा जस्स हुंति अइसुहमा।
 धण-लच्छी पमुहाणि वट्ठंति सया घरे तस्स॥११६॥
 नयण थणंतर नासा हणु-भुजमिइ पंचगं हवइ दीहं।
 दीहाऊ वित्तपरो परक्कमी जायए स नरो॥११७॥
 भाल-मुरो-वयणमिइ ति-तयं भूमीसरस्स विच्छिण्णं।
 गीवा जंधा मेहणमिइ ति-तयं लहु पुणो तस्स॥११८॥
 नाही सरो य सत्तं गंभीरं होइ जस्स पुरिसस्स।
 निस्सेस भूमी-रमणी-करग्गहं सो नरो कुणइ॥११९॥

अहवा

छत्तं तामरसं धणू रहवरो दंभोलि कुम्मं-कुसा
 वावी सत्थिय तोरणाणि य सरो पंचाणणो पायवो।
 चक्कं संख गया समुद्द कलसो पासाय मच्छा जवा
 जूवं थूभ कमंडलू खिइधरो सच्चामरो दप्पणो॥१२०॥

शार्दूलविक्रीडितवृत्तम्

वसह पडागा कमलाभिसेय केकी सुदाम-इच्छाड ।
 सामुद्रय-सत्यंसि लक्खणमण्णं च जं भणियं ॥ १२१ ॥
 कर-पाय-तलाईसु एयागाराणि जत्थ दीसंति ।
 पागय-मणुयाण पुणो बत्तीसं लक्खणा हुंति ॥ १२२ ॥
 अट्टसयं बलदेव-वासुदेवाण हुंति सुपसत्था ।
 अट्ठुत्तरं सहस्सं तित्थगर-चक्कवट्ठीणं ॥ १२३ ॥
 चक्खु-नेहेण सोहग्गं दंतनेहेसु भोयणं ।
 तया-नेहेण अइसुक्खं नह-नेहे महाधणं ॥ १२४ ॥
 झय-वज्र-छत्त-अंकुस-संख-पउमा य पाणि-पाएसु ।
 दीसंति जस्स स भवइ लच्छिवई नत्थि संदेहो ॥ १२५ ॥
 सत्थिए जण-सोहग्गं, मीणे सव्वत्थ पुज्जया ।
 सिरिवच्छे वंछिया लच्छी गवाइ-दामएण उ ॥ १२६ ॥
 पुत्तया करहे रेहा कणिट्ठाहो कलत्तया ।
 अंगुड-मूले रेहाओ भाइ-भंडाणि संसइ ॥ १२७ ॥
 थूल-रेहा दरिदाउ तणु-रेहा महाधणा ।
 खंडिय-फुडिय-रेहा बिंति आउक्खयं तेसिं ॥ १२८ ॥
 बत्तीस दसणो राया एगतीसो य भोगवं ।
 तीस दंतो सुही निच्चं तओ हीणो दुही सया ॥ १२९ ॥
 कुंद-दंतो भवे भोगी विज्जावं दंतुरो सया ।
 दुक्खी रुक्खेहिं दंतेहिं बीभच्छेहिं तहा पुणो ॥ १३० ॥
 मुय-नासो सिया राया हस्स नासो हुधम्मिओ ।
 सुलग्गा नासिया जेसिं ते नरा पतेगप्पिया ॥ १३१ ॥
 साण तुल्लेसणा चोरा पिंगक्खा कूर-कम्मठा ।
 गवक्खा सुभगा णेया केगरक्खा दुरासया ॥ १३२ ॥
 अद्धचंद-समे भाले राया धम्मिद्ध उण्णए ।
 विज्जा-भागी विसाले हु विसमे निद्धणो दुही ॥ १३३ ॥
 जहा नित्ते तहा सीलं जहा नासा तहज्जवं ।
 जहा रूवं तहा वित्तं जहा सीलं तहा गुणा ॥ १३४ ॥

वंजणं मस तिलगाइ नेयं सत्थाणुसारओ।

पुरिसाण दाहिणो भव्वा इत्थीणं वामगा सया ॥ १३५ ॥ इति लक्षणाधिकारः ॥

जल-दोण-मद्धभारं समुहाओ समुस्सियो य जो नवओ।

माणुम्माण-पमाणं तिविहं खलु लक्खणं णेयं ॥ १३६ ॥

अट्टसयं छण्णवइ चउरासीइ होइ परिमाणं।

अंगुलीयाण भणियं उत्तम-सम-हीण-मणुयाणं ॥ १३७ ॥

तित्थयर-देह-माणं आयंगुल-वीसहिय-मेगसयं।

जम्हा अंगुल-बारस मज्जे अच्चुण्णयं सीसं ॥ १३८ ॥

से वि अ णं दारए उम्मुक्क-बालभावे विण्णाय-परिणय-मित्ते
जोव्वणग-मणुप्पत्ते रिउव्वेअ-जउव्वेअ सामवेअ अथव्वणवेअ-इतिहास-पंचमाणं
निग्घंटु-छट्ठाणं संगोवंगणं सरहस्साणं चउण्हं वेआणं सारए वारए पारए धारए
सडंगवी, सट्ठितंत-विसारए संखाणे सिक्खाणे सिक्खाकप्पे वागरणे छंदे निरुत्ते
जोइसामयणे अण्णेसु अ बहुसु बंभण्णएसु परिव्वायएसु नएसु सुपरिणिट्ठिए
आवि भविस्सइ ॥ सूत्र ६ ॥

बंभंभोरुह विण्हु^३, वायु^४ भागवय^५ नारयं^६ णेयं।

मक्कंड^७ मग्गिदेवय^८-बह्म^९-विवत्ताभिह^{१०}-भविस्सं^{११} ॥ १३९ ॥

लिंगं^{१२} वराहं^{१३} खंधं^{१४} वामणं^{१५} मच्छं^{१६} कुम्भं^{१७} गरुडभिहाणं।

पुराणं अट्ठारसमं वियाणाहि ॥ १४० ॥

इदं च पाणिणीयं जिणिदं सागडायणं च तहा।

वामणधेयं चंदं तह बुद्धिसागरं भणियं ॥ १४१ ॥

तह सरस्सइ कंठाभरणं भीमसेणयं।

केलापगं च विस्संत-विज्जाहर मेव च ॥ १४२ ॥

मुट्ठी-वागरणं गोडं सिवं नंदिजयोवलं।

सारस्सयं सिद्धहेमं जयहेमं तहावरं ॥ १४३ ॥

[तेणं कालेणं तेणं समणं सक्के देविंदे देवराया वज्रपाणी पुरंदरे सयक्कऊ
सहस्सक्खे मघवं पागसासणे दाहिणह्म-लोगाहिवई एरावण-वाहणे सुरिंदे
बत्तीसविमाण-सयसहस्साहिवई अरयंबर-वत्थधरे आलइअ-माल-मउडे नव-

हेम-चारु-चित्त-चंचल-कुण्डल-विलिहिज्जमाण-गल्ले महिद्धिए महजुइए महाबले
 महायसे महाणुभावे महासुक्खे भासुरबुंदी पलंब-वणमालधरे सोहम्मे कप्पे
 सोहम्मवडिंसए, से णं तत्थ बत्तीसाए विमाणवास-सयसाहस्सीणं चउरासीए
 सामाणिअ साहस्सीणं तायत्तीसाए तायत्तीसगाणं चउण्हं लोगपालाणं अट्ठण्हं
 अग्गमहिस्सीणं सपरिवाराणं तिण्हं परिसाणं सत्तण्हं अणीआणं सत्तण्हं
 अणीआहिर्वडिंसं चउण्हं चउरासीए आयरक्ख-देव-साहस्सीणं, अण्णेसिं च बहूणं
 सोहम्म-कप्प-वासीणं वेमाणिआणं देवाणं देवीण य, आहेवच्चं पोरेवच्चं सामित्तं
 भट्ठित्तं महत्तरगतं आणाईसर-सेणावच्चं कारेमाणे पालेमाणे महयाहय-नट्ट-
 गीअ-वाइअ-तंती-तलताल-तुडिअ-घणमुडिङ्ग-पडुपडह-वाइअ-रवेणं दिव्वाणं
 भोगभोगाइं भुंजमाणे विहरइ॥ बारसा सूत्र-१३॥]

दट्ठूण अण्ण-तिथिय पराहवं भव-भयाओ निव्विण्णो ।

नेगम अट्ठसहस्सेणं परिवुडो कत्तिओ सेट्ठी॥१४४॥

पव्वइओ मुणिसुव्वय सामि-सगासंमि बारसंगधरो ।

बारस-सम-परियाओ सोहम्मे सुरवरो जाओ॥१४५॥

पुढवीभूसणे पुव्वं पयापालो निवोजणि ।

सेट्ठी सो कत्तिओ तत्थ राजमन्नो महट्ठिओ॥१४६॥

तेण सद्धावया साद्धपडिमाणं सयं कयं ।

सयकेउत्ति विक्खाओ जाओ लोए य सुपसिद्धो॥१४७॥

मासोववास-कारी गेरिग-नामेण तावसो एणो ।

निव-पमुहो सयल-जणो तं वंदइ कत्तियं च विणा॥१४८॥

नाऊण वइयरं सो निमंतमाणो न मन्नइ रण्णा ।

जइ मं भुंजावेइ तुह सिट्ठी कत्तिओ नाम॥१४९॥

पडिवज्जिऊण राया सिट्ठिं सम्माणिऊण भणइ तयं ।

तह पुरवास-निमित्ता जं काहिसि तं करिस्सामि॥१५०॥

इय वत्तुं पत्तो सो रायगिहे तस्स खीरमाइयं ।

जा परिवेसइ बालो अंगुलिए तज्जणं कुणइ॥१५१॥

धिक्कारं चिंतंतो रायाणं पुच्छिऊण निक्खंतो ।

नेगम अट्ठसहस्सेणं जाओ सयकेऊ इंदो सो॥१५२॥

एरावण-नामेण सो तवसी तस्स वाहणं जायं ।

जाणह भविया ! सुद्धासुद्धधम्मस्स फलमेयं ॥ १५३ ॥

दो सीसो जाओ तह इंदो तह ति-सीस तह इंदो ।

तो इंदेणं णाओ हक्किओ सो नमइ भीओ ॥ १५४ ॥

नमुत्थु णं अरिहंताणं भगवंताणं आइगराणं तित्थयराणं सयंसंबुद्धाणं
पुरिसुत्तमाणं पुरिससीहाणं पुरिसवरपुंडरीआणं पुरिसवरगंधहत्थीणं लोगुत्तमाणं
लोगनाहाणं लोगहिआणं लोगपईवाणं लोगपज्जोअगराणं अभयदयाणं
चक्खुदयाणं मग्गदयाणं सरणदयाणं जीवदयाणं बोहिदयाणं धम्मदयाणं
धम्मदेसयाणं धम्मनायगाणं धम्मसारहीणं धम्मवरचाउरंत-चक्कवट्ठीणं, दीवो
ताणं सरणं गई पइट्ठा अप्पडिहयवर-नाण-दंसणधराणं विअट्ठ-छउमाणं जिणाणं
जावयाणं तिण्णाणं तारयाणं बुद्धाणं बोहयाणं मुत्ताणं मोअगाणं सव्वण्णूणं
सव्वदरिसीणं, सिव-मयल-मरुअ-मणंत-मक्खय-मव्वावाह-मपुणरावित्ति-
सिद्धिगइ-नामधेयं ठाणं संपत्ताणं नमो जिणाणं जिअभयाणं । नमुत्थु णं
समणस्स भगवंओ महावीरस्स आइगरस्स चरमतित्थयरस्स पुव्वतित्थयरनिहिट्ठस्स
जाव संपाविउ-कामस्स । वंदामि णं भगवंतं तत्थगयं इह गए पासउ मे
भगवं तत्थ गए इह गयं ति कट्ठु समणं भगवं महावीरं वंदइ नमंसइ,
वंदित्ता नमंसित्ता सीहासणवरंसि पुरत्थाभिमुहे सण्णिसण्णे ॥ तए णं तस्स
सक्कस्स देविंदस्स देवरण्णो अयमेयारूवे अब्भत्थिए चिंतए पत्थिए मणोगए
संकप्पे समुप्पज्जित्था ॥ सूत्र १५ ॥

अह अण्णया कयाइ रायगिह-गुणसिलये महावीरो ।

संपत्तो जिणनाहो भविय-जण-विबोहणट्ठाए ॥ १५५ ॥

वंदइ सेणिय-पमुहो सेणियनरनाह-धारिणी-पुत्तो ।

सुच्चा मेहकुमारो समागओ सामि-नमणत्थं ॥ १५६ ॥

भयवं कहेइ धम्मं मेहाइ-भव्व-बोहणट्ठाए ।

धम्मं सुच्चा मेहो पडिबुद्धो तक्खणं चेव ॥ १५७ ॥

उज्झित्ता अट्ठ पिआ धण-कणग-सयण-पमुह-संबंधं ।

निक्खंतो जिण-पासे समप्पिओ तेण थेराणं ॥ १५८ ॥

संज्ञा-समये थेरा सयणद्धा सव्व-साहु-वग्गस्स ।
 भू-भागं विभइत्ता जहारिहं ते समप्पंति ॥ १५६ ॥
 मेहमुणिस्स दुवारे संथारो आगओ य रयणीए ।
 सुत्तं मेह-मुणीसं साहू घट्टंति पाएसु ॥ १५७ ॥
 केइ कुप्पर-उयरेसु पाए छुज्झंति केइ गुंडंति ।
 रयसा; तस्स सरीरं गमणागमणं कुणंता य ॥ १५८ ॥
 मेहो चिंतइ एवं पुव्विं मे सायरा इमे साहू ।
 इण्णं मज्झ सरीरं घट्टंति य लेट्ठ-खंडुव्व ॥ १५९ ॥
 कथ मे पुप्फ-सिज्जाए सावो भू-सत्थरे वि य ।
 कहं संजम-भारं च दुस्सहं खु वहामि हं ॥ १६० ॥
 आपुच्छित्ता गमिस्सामि सिरिवीरं जिणेसरं ।
 रज्ज-सज्जंमि गेहंमि पभाए इय चिंतइ ॥ १६१ ॥
 खणमित्तं नागया निद्धा दुक्खेण रयणी गया ।
 आगओ जिण-पासंमि चिट्ठइ तुण्हिको ठियो ॥ १६२ ॥
 आभुट्ठो य जिणेणं मेह ! तुमं आगओ समाहीए ।
 रत्ति-विचिंतिय-कज्जं कहियं सिरिवीरनाहेणं ॥ १६३ ॥
 वच्छ ! तुमं किं दूयसि ? साहुजण-धणेण हिययंमि ।
 एएसिं पाय-रओ फेडेइ सयल-दुरियाइं ॥ १६४ ॥
 संजम-दुक्खं एयं न भविस्सइ तुह महच्चिरं कालं ।
 उव्वेयं मा कुणसु सयं पवण्णोऽसि चारित्तं ॥ १६५ ॥
 को चक्कवट्ठि-रिद्धिं चइउं दासत्तणं समभिलसइ ।
 को वर-रयणाइ मुत्तुं परिगिण्हइ उवलखंडाइं ॥ १६६ ॥
 नेरइयाण वि दुक्खं झिज्झइ कालेण किं पुण नराणं ।
 ता न चिरं तुह होही दुक्खमिणं मा समुव्वियसु ॥ १६७ ॥
 जियं जल-बिंदु-समं संपत्तीओ तरंग-लोलाओ ।
 सुविणय-समं च पिम्मं जं जाणसु तं करिज्जासु ॥ १६८ ॥
 वरमग्गिंमि पवेसो वरं विसुद्धेण कम्मुणा मरणं ।
 मा गहिय-वय-भंगो मा जियं सील खलियस्स ॥ १६९ ॥

पुष्पाणुभूय-दुक्खं सरसु तुमं जं कहामि मेह-मुणी ! ।
 इओ भवाओ तइए सहस्स जूहाहिवो दित्तो ॥ १७३ ॥
 उत्तम लक्खण-जुत्तो वेयहे हत्थिरायच्छदंतो ।
 जाओ हु सुमेरुपहो सेओ भीओ दवग्गीओ ॥ १७४ ॥
 गिम्हे हत्थि-सहस्सं मुत्तुं तिसिओ य पंकिल-सरंमि ।
 झत्ति पविट्ठो सलिलं पत्तं नो कदमे खुत्तो ॥ १७५ ॥
 विट्ठो य सत्तु-करिणा पिट्ठीए तिक्ख-दंत-घाएहिं ।
 तव्वेयणं सहित्ता सत्त-दिणं मरिय पुण जाओ ॥ १७६ ॥
 मेरुप्पह-नाम-हत्थी विंझ-गिरिमि य दवानलं दट्ठु ।
 जाई-सरणं जायं वासाइ-मज्झ-पंतिमि ॥ १७७ ॥
 जोयण-मित्तं मंडलमवसोहित्ता सुहेण चिट्ठइ ।
 सत्तसयहत्थि-जुत्तो दवानलं दट्ठुं भय-भीओ ॥ १७८ ॥
 मुत्तुं पुरिसागारं पविसइ जा मंडलंमि ता पासे ।
 सत्ते बहुविहे वि य संकोचिय-तणू य तो चिट्ठइ ॥ १७९ ॥
 गत्तं कंडूइत्ता पायं जा मुंचइ तहिं ससयं ।
 पेसित्ता य पविट्ठं तहेव ठिओ ति-पाएणं ॥ १८० ॥
 पाणाइणुकंपाए मणुयाउं बंधिउं तुमं जाओ ।
 तं वयणं सोऊण मेहो संवेगमावण्णो ॥ १८१ ॥
 मुत्तुं लोयण-जुगलं संघट्ठंतु य साहुणो देहं ।
 नो कुप्पे ताणुवरिं अभिग्गहो इत्थ मे होउ ॥ १८२ ॥
 एवं खित्तो मग्गे जिणेण वीरेण मेहमुणि-वसभो ।
 काऊण य उग्ग-त्तवं पत्तो विजये विमाणंमि ॥ १८३ ॥

इइ मेघ-कहा....

अत्थि पुण एसे वि भावे लोगच्छेरय-भूए अणंताहिं उस्सप्पिणीहिं
 ओसप्पिणीहिं विइक्कंताहिं समुप्पज्जइ नामगुत्तस्स वा कम्मस्स अक्खीणस्स
 अवेइअस्स अणिज्जिण्णस्स उदएणं जं णं अरिहंता वा चक्कवट्ठी वा बलदेवा
 वा वासुदेवा वा अंतकुलेसु वा पंतकुलेसु वा तुच्छकुलेसु वा दरिद्रकुलेसु वा
 किविणकुलेसु वा भिक्खाग कुलेसु वा माहणकुलेसु वा आयाइंसु वा आयाइंति

वा आयाइस्संति वा, कुच्छंसि गब्भत्ताए वक्कमिंसु वा वक्कमंति वा वक्कमिस्संति
वा नो चेव णं जोणी-जम्मण-निक्खमणेणं निक्खमिंसु वा निक्खमंति वा
निक्खमिस्संति वा ॥ सूत्र १८ ॥

लोगच्छेरय

उवसग्ग गब्भहरणं इत्थी-तित्थं अभाविया परिसा ।
कण्हस्स अवरकंका अवयरणं चंद-सूराणं ॥ १८४ ॥
हरिवंसकुलुप्पत्ती चमरुप्पाओ य अट्ठ सय-सिद्धा ।
अस्संजयाण पूया दस वि य अणंतेण कालेणं ॥ १८५ ॥
वीरवरस्स भगवओ उवसग्गा अइबहू य संजाया ।
छउमत्थ-काल-भावे केवलि-भावे य तं चुज्झं ॥ १८६ ॥
गब्भावहार आसी वीरजिणिंदस्स वीययं चुज्झं ।
सक्काएसेण कयं हरिणेगमेसिणा सुरेणं ॥ १८७ ॥
तइयं इत्थी-तित्थं मल्लिजिणिंदस्स आसि तं च इमं ।
जंबूदीवे दीवे अवर-विदेहे वियाणाहि ॥ १८८ ॥
सलिलावई य विजया वीयसोयाइ महाबलो राया ।
बाल-छ-मित्त-समेओ पडिवन्नो संजमं पवरं ॥ १८९ ॥
अहिय-तवो मायाए इत्थी-वेयं च तित्थयर-गोयं ।
बंधित्ता ठाणेहिं वीसेहिं सुरो वेजयंते ॥ १९० ॥
तत्तो चुओ य मिहिला-निव-कुंभ-पभावइइ कुच्छंसि ।
उप्पन्नो थी-रूवो मल्लिनामेण जिणनाहो ॥ १९१ ॥
तइयं एअं चुज्झं चउत्थं पुण वीरजिणवरिंदस्स ।
लाभाभावा अहला आसी तद्देसणा नूणं ॥ १९२ ॥
पंचमगं पुण एयं जायं जं कण्ह-वासुदेवस्स ।
धायइसंडमरकं-रायहाणीइ जं गमणं ॥ १९३ ॥
कह हत्थिणपुर-नगरे पंडु-सुया पंच जुहिड्डलप्पमुहा ।
दोवइए देवीए वारेण सुहं अणुहवंति ॥ १९४ ॥
अवमाणओ नारय-रिसी गओ पउमराय-नयरीए ।
उवरोहे उवविट्ठो कुणइ से सायरो विणयं ॥ १९५ ॥

मह-अंतेउर-सरिसं कथ वि दिट्ठं तए सो भणइ ।
 दोवइ-रूव-समाणं तिलोयमज्झंमि नत्थिऽन्नं ॥ १६६ ॥
 इय वुत्तुं सोवगओ नियमित्त-सुरेण आणिया तेण ।
 जा पत्थइ सा जंपइ छम्मासावही पडिक्खेह ॥ १६७ ॥
 छट्ठं छट्ठं अबिल-त्तवं कुणइ दोवई सइ तत्थ ।
 नारय-मुहाओ नच्चा पंडव-जुय आगओ कण्हो ॥ १६८ ॥
 काउं हयप्पयावं गिण्हित्ता दोवइं समणुपत्तो ।
 जं से य तत्थ गमणं तं अच्छेरं वियाणेह ॥ १६९ ॥
 सिरिवीरवंदणत्थं समागया चंदसूरवरा देवा ।
 मूलविमाण-निविट्ठा कोसंबीए तयं छट्ठं ॥ २०० ॥
 हरिवंसकुलुप्पत्ती जंबूदीवंमि भारहे वासे ।
 कोसंबीए सुमुहो निवो वसंते गयारूढो ॥ २०१ ॥
 गच्छइ जा ता पासइ वीर-कुविंदस्स भारियं पवरं ।
 वणमालं नामेणं वक्खित्तो तीइ रूवेणं ॥ २०२ ॥
 मंती नाउं सव्वं परिवायाइ आणिया झत्ति ।
 तीए सद्धिं राया विसय-सुहमणुहवइ णिच्चं ॥ २०३ ॥
 वीर-कुविंदो गहिलो संजाओ तीइ विरह-दुक्खेणं ।
 उवविट्ठो य गवक्खे राया तीए जुओ इगया ॥ २०४ ॥
 विज्झु-निवाओ जाओ तेसिं सीसंमि ते वि मरिऊणं ।
 हरिवासे हरि-हरिणी संजाया सो कुविंदो य ॥ २०५ ॥
 सज्जीभूओ सोउं तम्मरणं किंपि कट्ठमणुचरिउं ।
 सोहम्मे किब्बिसिओ ओहीए पासए तेवि ॥ २०६ ॥
 मारेउं असमत्थो चंपाए नरवइं मयं दट्ठं ।
 आणेऊण समप्पइ ताण नराणं कुणइ राया ॥ २०७ ॥
 फलजुय-मंसाहारो दायव्वो एसिमेव सिक्खित्ता ।
 सो सट्ठाणं पत्तो संखित्ता आउ-तणुमाणं ॥ २०८ ॥
 साहिय-वसुहो पालइ रज्जं तत्तो य तस्स कुलवंसो ।
 जाओ तन्नामेणं सत्तममच्छेरयं एयं ॥ २०९ ॥

अहुणोववण्ण-चमरो नियसीसोवरि ठियं सुहम्मवइं ।
 पासित्तागयकोवो चलिओ तं भेसणट्ठाए ॥ २१० ॥
 छउमत्थ-वीर-सरणं किच्चा गंतूण सोहम-सहाए ।
 जा कुणइ हक्क-सदं नायं सक्केण तं सव्वं ॥ २११ ॥
 सक्को मुंचइ वज्जं नट्ठो जिण-नमिय गओ नियं ठाणं ।
 तत्थ गओ जं चमरो तं चुज्झं अट्ठमं भणियं ॥ २१२ ॥
 सिरि-उसहनाह एगो नवनवई सुया य अट्ठ पोत्ता य ।
 पणधणुसयदेहधरा सिद्धा एगेण समएण ॥ २१३ ॥
 एयप्पमाण-देहा सिज्झंति नेव एग-समएणं ।
 अट्ठसयसिद्धमेयं तं पुण अच्चेरयं नवमं ॥ २१४ ॥
 असंजयाण पूया सुविहिजिणाणंतंरं पि कइ कालं ।
 हुंडावसप्पिणीए दोसाओ साहुउच्छेओ ॥ २१५ ॥
 जाओ य थिविर-सदो धम्मं पुच्छंति मुद्धमइ-लोया ।
 अत्त-परिणाओ ते तेसिं धम्मं परूवित्ति ॥ २१६ ॥
 तो ते गुरु-बुद्धीए असणाइ दिंति तत्ति-राएणं ।
 तेसिं असंजयाणं पूया अच्चेरयं दसमं ॥ २१७ ॥
 दससु वि वा सेसेवं दस दस अच्चेरयाणि जाणाहि ।
 सव्वण्णु-भासियाइं तित्थोगालीइ भणियाइं ॥ २१८ ॥

नाम-गुत्तस्स कम्मस्स अक्खीणस्स ति.....

अह भणइ नरवरिंदो ताय ! इमीसित्तियाइ-परिसाए ।
 अण्णोऽवि कोऽवि होही ? भरहे वासंमि तित्थयरो ॥ २१९ ॥
 तत्थ मरीई नामं आइ-परिव्वायगो उसभ-नत्तू ।
 सज्झाय-ज्झाण-जुओ एगंते ज्ञायइ महप्पा ॥ २२० ॥
 तं दाएइ जिणंदो एवं नरिदेण पुच्छिओ संतो ।
 धम्मवरचक्कवट्ठी अपच्छिमो वीर-नामुत्ति ॥ २२१ ॥
 आइगुरु-दसाराणं तिविट्ठ-नामेण पोयणाहिंवई ।
 पियमित्त-चक्कवट्ठी मूयाइ-विदेह-वासंमि ॥ २२२ ॥

न वि ते पारिवज्जं वंदामि अहं इमं च ते जम्भं ।
 जं होहिसि तित्थयरो अपच्छिमो तेण वंदामि ॥ २२३ ॥
 तं वयणं सोऊणं तिपयं अप्फोडिऊण तिकखुत्तो ।
 अब्भहिय-जाय-हरिसो तत्थ मरीई इमं भणइ ॥ २२४ ॥
 जइ वासुदेव-पढमो मूयाइ-विदेह-चक्कवट्ठित्तं ।
 चरमो तित्थयराणं होउ अलं इत्तयं मज्झं ॥ २२५ ॥
 अहयं च दसाराणं पिया य मे चक्कवट्ठि-वंसस्स ।
 अज्जो तित्थयराणं अहो कुलं उत्तमं मज्झं ॥ २२६ ॥
 पुच्छंताण कहेइ उवट्ठिए देइ सामिणो सीसे ।
 गेलण्णे पडियरणं कविला ! इत्थं पि इहयं पि ॥ २२७ ॥
 दुब्भासिए इक्केण मरीई दुक्ख-सागरं पत्तो ।
 भमिओ कोडाकोडी-सागर-सिरिनाम-धिज्जाणं ॥ २२८ ॥
 तं मूलं संसारो नीया गुत्तं च कासि तिवलीए ।
 अप्पडिकंतो बंभे कविलो अंतट्ठिओ कहइ ॥ २२९ ॥
 जाइ-कुल-रूव-बल-सुय-तव-लाभस्सिरिय अट्ठमयमत्तो ।
 एयाइं छिय बंधइ असुहाइं बहुं च संसारे ॥ २३० ॥
 अह दिवसे बासीइ वसइ तहिं माहणीइ कुच्छंसि ।
 चित्तइ सोहम्मवई साहरिउं जिणं कालेण ॥ २३१ ॥
 अरिहंत-चक्कवट्ठी बलदेवा तह य वासुदेवा य ।
 एए उत्तम-पुरिसा न हु तुच्छ-कुलेसु जायंति ॥ २३२ ॥
 उग्ग-कुल-भोग-खत्तिय-कुलेसु इक्खाग-नाय-कोरव्वे ।
 हरिवंसे य विसाले आयंति तहिं पुरिससीहा ॥ २३३ ॥
 अह भणइ णेगमेसिं देविंदो एस इत्थ तित्थयरो ।
 लोगुत्तमो महप्पा उववण्णो माहण-कुलंमि ॥ २३४ ॥

परिआइत्ता दुच्चंपि वेउव्विय-समुग्घाएणं समोहणइ, समोहणित्ता
 उत्तर-वेउव्विअं रूवं विउव्वइ, विउव्वित्ता ताए उक्किट्ठाए तुरिआए चवलाए
 चंडाए जयणाए उद्धुआए सिग्घाए (छेआए) दिव्वाए देवगईए वीईवयमाणे

वीईवयमाणे तिरिअ-मसंखिज्जाणं दीवसमुद्दाणं मज्झंमज्झेणं जेणेव जंबुदीवे दीवे जेणेव भारहे वासे जेणेव माहणकुंडग्गामे नयरे जेणेव उसभदत्तस्स माहणस्स गिहे जेणेव देवाणंदा माहणी तेणेव उवागच्छइ, उवागच्छित्ता आलोए समणस्स भगवओ महावीरस्स पणामं करेइ, करित्ता देवाणंदाए माहणीए सपरिजणाए ओसोवणिं दलइ, ओसोअणिं दलित्ता असुभे पुग्गले अवहरइ अवहरित्ता सुभे पुग्गले पक्खिवइ पक्खिवित्ता “अणुजाणउ मे भयवं” ति कट्टु समणं भगवं महावीरं अव्वाबाहं अव्वाबाहेणं दिव्वेणं पहावेणं करयलसंपुडेणं गिण्हइ करयलसंपुडेण गिण्हित्ता जेणेव खत्तियकुंडग्गामे नयरे जेणेव सिद्धत्थस्स खत्तिअस्स गिहे, जेणेव तिसला खत्तिआणी तेणेव उवागच्छइ, उवागच्छित्ता तिसलाए खत्तिआणीए सपरिजणाए ओसोअणिं दलइ, ओसोअणिं दलित्ता असुभे पुग्गले अवहरइ, अवहरित्ता सुभे पुग्गले पक्खिवइ, पक्खिवित्ता समणं भगवं महावीरं अव्वाबाहं अव्वाबाहेणं तिसलाए खत्तिआणीए कुच्छिंसि गब्भत्ताए साहरइ, जे वि अ णं से तिसलाए खत्तिआणीए गब्भे तं पि अ णं देवाणंदाए माहणीए जालंधर-सगुत्ताए कुच्छिंसि गब्भत्ताए साहरइ, साहरित्ता जामेव दिसिं पाउब्भूए तामेव दिसिं पडिगए॥ सूत्र २७॥

जोणि-दुवारेणं चिय गब्भं निक्कासिऊण छविच्छेयं।

गब्भासये य मज्झे ठावेइ तत्थ सो देवो॥२३५॥

सुविणेत्ति तुय्य-स्वप्ने उच्चागए ति

तओ पुणो पुण्णचंद-वयणा उच्चागय-ट्ठाण-लट्ठ-संठिअं पसत्थरूवं सुपइट्ठिअ-कणग-मय-कुम्म-सरिसोवमाण-चलणं, अच्चुण्णयपीणरइअ-मंसल-उण्णय-तणु-तंब-निद्धनहं, कमल-पलास-सुकुमाल कर-चरण-कोमल-वरंगुलिं, कुरुविंदावत्त-वट्ठाणुपुव्व-जंधं, निगूढ-जाणुं, गयवर-कर-सरिस-पीवरोरुं, चामीकर-रइअ-मेहला-जुत्त-कंत-विच्छिण्ण-सोणिचक्कं, जच्चंजण-भमर-जलय-पयर-उज्जुअ-समसंहिअ-तणुअ- आइज्ज-लडह-सुकुमाल-मउअ-रमणिज्ज-रोमराइं, नाभीमंडल-सुंदर-विलास-पसत्थ-जघणं, करयल-माइअ-पसत्थ-तिवलिय-मज्झं, नाणामणि-कणग-रयण-विमल-महातवणिज्जाभरणभूसण-विराइयंगोवंगिं, हार-

विरायंत-कुंदमाला-परिणद्ध-जलजलित-थणजुअल-विमलकलसं, अइअ-
 पत्तिअ-विभूसिएणं सुभगजालुज्जलेणं मुत्ता-कलावएणं उरत्थ-दीणार-मालिअ-
 विरइएणं कंठमणि-सुत्तएणं य कुंडलजुअलुल्लसंत-अंसोवसत्त-सोभंतसप्पभेणं
 सोभागुण-समुदएणं आणण-कुडुंबिएणं कमलामलविसाल-रमणिज्ज-लोअणिं,
 कमल-पज्जलंत-कर-गहिअ-मुक्क-तोयं, लीलावाय-कयपक्खएणं सुविसद-कसिण-
 घण-सण्ह-लंबंत-केसहत्थं, पउमद्दह-कमल-वासिणिं सिरिं भगवइं पिच्छइ
 हिमवंत-सेल-सिहरे दिसा-गइंदोरु-पीवर-कराभिसिच्चमाणिं ॥ सूत्र ३६ ॥

सोवण्णमए य हिमवइ सयजोयणुच्चे पिहुलए अहियं।

जोयण-दस-सय-बावण्ण-माणे तत्थत्थि पउमदहे ॥ २३६ ॥

उव्विद्धे दस जोयण सहस लंबे य पंचसयपिहुले।

वज्ज-तले तम्मज्जे पउमेगं सासयं नेयं ॥ २३७ ॥

कोस-दुगुच्चं जोयण-दस-नालं एगकोस-दीहं च।

वज्जमय-मूल रिद्ध य रयणमय-कंद-मिच्चाइ ॥ २३८ ॥

तम्मज्जे सिरिदेवी-भवनं सयणीयमत्थि तप्परओ।

अट्टसयकमलवलये पढमे देवी अलंकारा ॥ २३९ ॥

बीए वायव्वेसाणुत्तरदिसि सामाणियाण देवाणं।

चउ चउ सहस्स-पउमा पुव्व-दिसाए य चत्तारि ॥ २४० ॥

महत्तर-देवी-पउमा अग्गिदिसाए य अट्टसहस्स-वरा।

अब्भंतर-परिसाए देवाणं गुरुसमाणाणं ॥ २४१ ॥

मित्तसमाण-सुराणं दक्खिण-भाए य सहस दस पउमा।

नेरइए य दुवालस किंकरसम-वज्ज-परिसाए ॥ २४२ ॥

पच्छिम-भाए सत्त य अणियाण हुंति भासुरा पउमा।

तइये वलये सोलस सहस्संग रक्खिय-सुराणं ॥ २४३ ॥

बत्तीस लक्ख अभिओगि-देवाणं हुंति चउत्थए वलये।

पंचम-वलये चत्ता लक्खा अभिओग-देवाणं ॥ २४४ ॥

छट्ठे वलये पउमा चुलसी लक्खा य हुंति देवाणं।

एएसिं सव्वेसिं सामिणी सिरी य विक्खाया ॥ २४५ ॥

सच्च-पउमाण संखा इग कोडी वीस लक्ख तह सहसा ।

पण्णासिगसयवीसा (१२०५०१२०) नायव्वा जिणवरुद्धिडा ॥ २४६ ॥

गयेण विस्स-सोडीरो धम्म-धोरी गवेण उ ।

सिंहेण णिज्जओ सूरु सिरीए विस्स-पूइओ ॥ २४७ ॥

सज्जणाणं सया मन्नो ससिणा नयणामयं ।

सूरेण तमसो हंता कुलोत्तमं सो झएणा उ ॥ २४८ ॥

कुंभेण गुण-संपुण्णो सरसा विस्स-तावहो ।

सागरेण य गंभीरो विमाणेणामरासओ ॥ २४९ ॥

मणि-पुंजेण लोयाणं महग्घो य भविस्सइ ।

निद्धूम-वणिहणा दित्तो केवलनाण-तेयसा ॥ २५० ॥

चउदस-रज्जुमित्तस्स लोयस्साहिवइ भविस्सइ सामी ।

पुत्तो ते तिसलाए इय संसंति फलं सुमिणा ॥ २५१ ॥

रयावित्ता कोडुंबिय-पुरिसे सद्दावेइ, सद्दावित्ता एवं वयासी खिप्पामेव
भो ! देवाणुप्पिया ! अट्ठंग-महानिमित्त-सुत्तत्थ-धारए विविह-सत्थ-कुसले
सुविण-लक्खण-पाढए सद्दावेह ॥ सूत्र ६४ ॥

अंगं^१ सुमिणं^२ च सरं^३ भोमं^४ वंजणं^५ लक्खणं^६ उप्पायं^७ ।

अट्ठमयं अंतरिक्खं लोयण-फुरणाइयं अंगं ॥ २५२ ॥

इत्थीणं वामंगं पुरिसाणं होइ दाहिणंगं च ।

सुमिणाणं च वियारो सुहासुहो सुमिण-विज्जा य ॥ २५३ ॥

दुग्गाइ सिगालाइ सर विण्णाणं च होइ सर-विज्जा ।

भोमं भू-कंपाइ मस-तिलगा इय वंजणयं ॥ २५४ ॥

कर-चरणाइसु रेहा पमुहं सामुद्धियुत्त-लक्खणयं ।

उक्कापायाइ तहा उप्पायं तं वियाणाहि ॥ २५५ ॥

सुक्काइय-गहाणं उदयत्थमणाइ णाणमिह नेया ।

सा अंतरिक्ख-विज्जा अट्ठंगनिमित्तमिणमेव ॥ २५६ ॥

तए णं ते सुविण-लक्खण-पाढगा सिद्धत्थस्स खत्तियस्स कोडुंबिअ-पुरिसेहिं
सद्दाविया समाणा हट्ठ तुट्ठ जाव हियया, णहाया, कयबलिकम्मा, कयकोउय-

मंगल-पायच्छित्ता, सुद्धप्पावेसाइं मंगल्लाइं वत्थाइं पवराइं परिहिआ, अप्प-
महग्घाभरणांलंकिय-सरीरा, सिद्धत्थय-हरियालिया-कय-मंगल-मुद्धाणा, सएहिं
सएहिं गेहेहिंतो निग्गच्छंति, निग्गच्छित्ता खत्तियकुंडग्गामं नगरं मज्झं मज्झेणं
जेणेव सिद्धत्थस्स रण्णो भवण-वर-वडिंसग-पडिदुवारे तेणेव उवागच्छंति,
उवागच्छित्ता भवण-वर-वडिंसग-पडिदुवारे एगयओ मिलंति, मिलित्ता जेणेव
बाहिरिया उवट्ठाणसाला जेणेव सिद्धत्थे खत्तिए तेणेव उवागच्छंति, उवागच्छित्ता
करयल जाव अंजलिं कट्ठु सिद्धत्थं खत्तियं जएणं विजएणं वद्धाविति ॥

सूत्र ६७ ॥

मंति-परिक्खियसिज्जा पत्त बीडप्पणेण पंचसया ।

सुहडा अणायगा जह अबद्धा हीलणं पत्ता ॥ २५७ ॥

जत्थ सव्वेवि रायाणो सव्वे पंडियमाणिणो ।

सव्वे महत्तमिच्छंति तं वंदम विसीयइ ॥ २५८ ॥

ते पंडिया न एवं गच्छंति सम्मया पुणो जंति ।

राय-सहाए तो ते पुज्जा जाया नरिंदस्स ॥ २५९ ॥

तए णं ते सुमिण-लक्खण-पाढगा सिद्धत्थस्स खत्तियस्स अंतिए एअमडुं
सोच्चा निसम्म हट्ठुट्ठ जाव हियया ते सुमिणे सम्मं ओगिण्हंति, ओगिण्हित्ता
ईहं अणुपविसंति, अणुपविसित्ता अण्णमण्णेण सद्धिं संचालेति, संचालित्ता
तेसिं सुमिणाणं लद्धट्ठा गहियट्ठा पुच्छियट्ठा विणिच्छियट्ठा अहिगयट्ठा सिद्धत्थस्स
रण्णो पुरओ सुमिणसत्थाइं उच्चारेमाणा उच्चारेमाणा सिद्धत्थं खत्तियं एवं
वयासी ॥ सूत्र ७२ ॥

भूवालेणं उत्ता तेसिं मज्झे य वुट्ठओ वाई ।

सामी ! सुविण-फलं सुणु सावहाणो भवित्ता णं ॥ २६० ॥

नव कारणाणि सुमिणे सुयं अणुभूयं पदिट्ठ-मणुरूवं ।

चिंता पगइ-वियारो देवा पुण्णाणि पावाणि ॥ २६१ ॥

पढमं छक्कं अहलं सुहमसुहं अंतियं तियं सहलं ।

पुरिसाणं तं सुयइ सुहासुहं सिग्घमेव पुणो ॥ २६२ ॥

पढमप्पहरे दिट्ठो सुमिणो संवच्छरेण देइ फलं ।
 बिय-पहरे छम्मासे ततीय-पहरे ति-मासेणं ॥ २६३ ॥
 तुरिए पहरे दिट्ठो मासेणं फलइ सो पुणो सुमिणो ।
 चरम-निसा घडिया दुय दिट्ठो दसमेण दिवसेणं ॥ २६४ ॥
 सूरुदये य दिट्ठो सिग्घं फल-दायगो भवे सुमिणो ।
 नस्सावो दुस्सुमिणो इयरो सावो गुरुजणस्स ॥ २६५ ॥
 जुगस्सावाभावे गो-कण्णे पविसिऊण तं पि वए ।
 गो-वसह-कुंजराणं पासाय-गिरिग-सुतरुणं ॥ २६६ ॥
 आरोहणं पसत्थं रुइयं विट्ठाणुलेव मह-मरणं ।
 गमणागमणं भव्वं सुमिणे दिट्ठं समक्खायं ॥ २६७ ॥
 अन्नं दीवं पउमं कन्न-छत्तं तहावरं हारं ।
 झयमाभरणाइयं इट्ठ-सिद्धिं पयासेइ ॥ २६८ ॥
 जो पासइ सुविणंते निवइं कुंजरं हयं ।
 सुवण्णं वसहं गावं कुडुंबं तस्स वट्ठइ ॥ २६९ ॥
 जीहा-छेए सिर-छेए हुंति सामञ्ज-संपया ।
 लिंग-छेएण सोहग्गं मच्चू कण्णाइ छेयओ ॥ २७० ॥
 माणुसाणि य मंसाणि सुविणंते जो य भक्खए ।
 हरियाणि य पक्काणि सुणू तस्साऽवि जं फलं ॥ २७१ ॥
 पाए पंच-सई लाहो सहस्सं बाहु-भक्खणे ।
 रज्जं सय-सहस्सं वा लब्भइ मुंड-भक्खणे ॥ २७२ ॥
 केसा जस्स विसीयंति दंता जस्स पडंति य ।
 धण-नासो भवे तस्स पीडा वा वि सरीरजा ॥ २७३ ॥
 उवद्दवंति जं सुत्तं सिंगिणो दाढिणोपि वा ।
 वानरो वा वराहो वा भवे राय-कुला भयं ॥ २७४ ॥
 छद्दिं मुत्तं विट्ठं सुक्कं रुहिरं सुरं पिये पस्से ।
 तेणाणुलिंपइ जो धण-विज्जा वट्ठए तस्स ॥ २७५ ॥
 गिहगोधिगा भुजंगा सयपदिगा कीडिगा फुडं जस्स ।
 पविसंति कण्ण-मज्झे स विणस्सइ कण्ण-रोगेणं ॥ २७६ ॥

सिञ्जा दारगला-भंगे भञ्जाए मच्चु जायए ।
 अंग-च्छेए पुणो दिठ्ठे पिय-माय-सुयव्वए ॥ २७८ ॥
 दहि-लाहे भवे अत्थो घय-लाहे भवे जसो ।
 घय-पाणे भवे केसो जसो हु दहिभक्खणे ॥ २७९ ॥
 जो हि सेएण सप्पेण डस्सए दाहिणे भुये ।
 सहस्स लाहो भवे तस्स संपत्ते दसमे दिणे ॥ २८० ॥
 वडवं कुक्कुडिं कोचिं लद्धूणं पडिबुज्झइ ।
 लब्ध कोसजुत्तं स भञ्जं मधुर-भासिणिं ॥ २८१ ॥
 आसणे सयणे जाणे सरीरे वाहणे गिहे ।
 जलमाणे जो उ जग्गिञ्जा लच्छी तस्स[स] सम्मुही ॥ २८२ ॥
 असोगं कणवीरं च पलासं वा वि पुष्पियं ।
 दट्ठुं सामलि-रुक्खं वा सोगं सो लब्ध धणं ॥ २८३ ॥
 एला-लवंग-वल्ली कप्पूर-फलाणि नागवल्लिं च ।
 जाइफलं च पस्सइ खायइ जो तस्स भवइ सिरी ॥ २८४ ॥
 अंतेहिं वेढए जो गामं वा नगराणि वा ।
 गामे मण्डल-रञ्जं च नगरे पत्थिवो भवे ॥ २८५ ॥
 आरूढो सुब्ब-गयं नई-तडे सालि-भोयणं कुणइ ।
 सो भुंजइ भूमिमखिलं सहाय-हीणो वि धम्मधणो ॥ २८६ ॥
 देवयारिसयो गावो पियणो लिंगिणो निवा ।
 नरं वयंति जं सुत्ते तं तहेव भविस्सइ ॥ २८७ ॥
 सव्वाणि सुक्काणि सुसोहणाणि
 कप्पास-भस्स-त्थि-कवाल-वज्जं ।
 सव्वाणि कण्हाणि अइनिंदियाणि
 गोह-च्छि-वाजि-द्विज-देव-वज्जं ॥ २८८ ॥
 दुस्सुमिणे देव-गुरू पूयइ पगरेइ सत्तिओ य तवं ।
 सययं धम्म-रयाणं दुस्सुविणो हवइ सुस्सुमिणो ॥ २८९ ॥
 इत्थी वा पुरिसो वा
 सुविणंते एगं महंतं खीरकुंभं वा दहिकुंभं घयकुंभं वा महकुंभं वा

पासमाणे पासइ उप्पाडेमाणे उप्पाडेइ उप्पाडियं इइअप्पाणं मण्णइ तक्खणमेव
बुज्झइ तेणेव भवग्गहणेणं सिज्झइ जाव अंतं करेइ ॥

इत्थी वा पुरिसो वा

सुविणंते एगं हिरण्णरासिं वा सुवण्णरासिं वा

रयणरासिं वयररासिं वा पासमाणे पासइ

दुरूहमाणे दुरूहइ दुरूढमिति अप्पाणं मण्णइ

तक्खणमेव बुज्झइ जाव अंतं करेइ तेणवभवग्गहणेणं ।

इच्चाइ महासुविण-वियारो ॥

तए णं तीसे तिसलाए खत्तियाणीए अयमेवारूवे जाव संकप्पे
समुप्पज्जित्था-हडे मे से गब्भे ? मडे मे से गब्भे ? चुए मे से गब्भे ? गलिए
ये मे से गब्भे ? एस मे गब्भे पुच्चिं एयइ, इयाणिं नो एयइ त्ति कट्ठु,
ओहयमणसंकप्पा चिंतासोग-सागरं पविट्ठा, करयलपल्हत्थमुही, अट्टज्झाणोवगया
भूमिगय-दिट्ठिया झियायइ, तं पि य सिद्धत्थ-रायवर-भवणं उवरयमुइंग-तंती-
तलताल-नाडइज्ज-जणमणुज्जं दीणविमणं विहरइ ॥ सूत्र ६२ ॥

जइ सच्चमिमं जायं अस्स गब्भस्स ता अहं अहण्णा ।

निप्पुण्णा मंदभग्गा जायाहं इत्थि-वग्गंमि ॥ २६० ॥

अहवा चिंतारयणं न चिट्ठइ भग्गहीणगेहंमि ।

अमय-पाणेच्छा पुण न पुज्जए पावितिसियाणं ॥ २६१ ॥

हा ! धी धी दइव ! तुमं जेण तए मे मणोरह-कप्पतरू ।

उम्मूलिओ (समूलो) समूलं पाडिया मेरु-सिहराओ ॥ २६२ ॥

अहवाहं किं कुव्वे कस्सग्गे वा भणामि दुक्खमिणं ।

दुवियट्ठ-दईवेणं दट्ठा तह पातगेहिं च ॥ २६३ ॥

रे दइव ! किमुट्ठिओसि अणंतगुणदुक्खदाण-दुल्ललिओ ।

धी ! संसारमसारं धी ! कामसुहं अलं तेण ॥ २६४ ॥

अहवा किं पुच्च-भवे मए कयं दुक्कयं च अइगुरुयं ।

वरसील-खंडणाइ सुत्ते भणियं जओ एयं ॥ २६५ ॥

पसु-पक्खि-माणुसाणं बाले जो विउवए महापावो ।

सो अणवच्चो जायइ अह जायइ तो वि वज्जिज्जा ॥ २६६ ॥

कुरंड-रंडत्तण-दूहगाइ निंदुत्ति वंझा-विसकण्णगाइ ।
 जम्मंतरे खंडिय-सील-भावा नाऊण कुञ्जा दढसीलभावं ॥ २६७ ॥
 किं मया पड्डया चत्ता चाइया वा य किं मया ।
 अहवा लहु-वच्छाणं माउए विओगो कओ ॥ २६८ ॥
 किं वा उण्ह-जलेणं सबाल-उंदर-बिलाणि भरियाणि ।
 संडग-कीडिय-विवरं पलावियं उण्ह-नीरेणं ॥ २६९ ॥
 किं वा सवत्ति-पुत्तुवरिं विदुडुं विचित्तियं च मए ।
 संडग-नीडाणि य वा पक्खीणं पाडियाणि मए ॥ ३०० ॥
 गब्भ-थंभण-साडण-पायण-पमुहाणि पावकम्माणि ।
 पुव्वभवे दुड्डाई कयाई वा मंत-तंताई ॥ ३०१ ॥
 एवं दुह-संतत्ता दिट्ठा सा सही-जणेण चउरेण ।
 पुट्ठा न भणइ किंची कुसलं ते भयणि ! गब्भस्स ॥ ३०२ ॥
 तो सा तिसला भासइ गब्भ कुसले य किमत्थि मे दुक्खं ।
 तं सोऊणं ताओ खिण्णाओ कहंति रायस्स ॥ ३०३ ॥
 सो विय दुक्खं पत्तो नयर-जणो य तह सोगमावण्णो ।
 इत्थंतरंमि वीरो सव्वं जाणेइ णाण-वसा ॥ ३०४ ॥
 किं कुम्भो कस्स वा बूमो मोहस्स गइ एरिसी ।
 दुक्खि-[दुस्स?] धाउ व्व अम्हाणं गुणो दोस-निबंधणं ॥ ३०५ ॥
 पमोयाय कओ आसी माउ-खेय-निबंधणं ।
 नालिकेर जले नत्थो कप्पूर इव मे गुणो ॥ ३०६ ॥
 इय चित्तिऊण चलियं वीर-जिणंदेण किंचि तो माया ।
 हरिसागय-रोमंचा कहइ ममत्थीह पुण्ण-भरो ॥ ३०७ ॥
 नरवइ-पमुहो लोओ पहड्ड-मणसो य सव्व-नयरंमि ।
 वद्धावणयं रंमं कारावेइ य गयसोओ ॥ ३०८ ॥

तए णं सा तिसला खत्तियाणी ण्हाया कयबलिकम्मा कय-कोउय-
 मंगल-पायच्छित्ता जाव सव्व्वालंकार-विभूसिया तं गब्भं परिवहइ ॥

अइदिण-सयण-डब्भंगण-लोयणं जणहसण-कहण-पमुहाणि ।
 नो कायव्वाणि तए कहंति सहीओ जओ भणियं ॥ ३०९ ॥

सयणाओ साव-सीलो अंजणाओ बालओ हवइ अंधो ।
 अइरोदणा कुदिट्टी अइसिणाणाओ दुह-सीलो ॥ ३१० ॥
 अइ-तेलब्भंगाओ कुट्टी कुनही नहावकत्तणओ ।
 अइधावणाओ चवलो अइकहणाओ पलावी य ॥ ३११ ॥
 सामुद्ध-दंत-तालु-जीहो दसणाओ जायए बालो ।
 अइसदसवण-बहिरो इय सुद्धा वज्जए सव्वं ॥ ३१२ ॥

नाइसीएहिं नाइउण्हेहिं नाइतित्तेहिं नाइकडुएहिं नाइकसाएहिं नाइअंबिलेहिं
 नाइमहुरेहिं नाइनिद्धेहिं नाइलुक्खेहिं नाइउल्लेहिं नाइसुक्केहिं, सव्वत्तुग-
 भयमाण-सुहेहिं भोयणाच्छायण-गंधमल्लेहिं, ववगय-रोग-सोग-मोह-भय-परिस्समा
 जं तस्स गब्भस्स दिअं मियं पत्थं गब्भपोसणं तं देसे अ काले अ आहार-
 माहारेमाणी, विवित्त-मउएहिं सयणासणेहिं पइरिक्कसुहाए मणोणुकूलाए
 विहारभूमीए, पसत्थ-दोहला, संपुण्ण-दोहला, सम्माणिय-दोहला, अविमाणिय-
 दोहला, वुच्छिण्ण-दोहला, ववणीय-दोहला सुहं सुहेणं आसइ, सयइ, चिट्ठइ,
 निसीयइ, तुयट्ठइ, विहरइ, सुहं सुहेणं तं गब्भं परिवहइ ॥ सूत्र ६५ ॥

वायाहारेहि भवे वामण जड कुब्बडंधओ बालो ।
 अइपित्ताहारेहिं चित्ती पंगू य पंडु-कफो ॥ ३१३ ॥
 अइलवणं नित्त-हरं अइसीयं मारुयप्पगोवाय ।
 अच्चुण्णं हरइ बलं अइकामं जीवियं हरइ ॥ ३१४ ॥
 वासासु लवणममियं सरइ जलं गोपयं च हेमंते ।
 सिसिरे चामलग-रसो घयं वसंते गुडो अंते ॥ ३१५ ॥
 मंदं संचर मंदमेव निगय वा मुंच कोवक्कमं ।
 पत्थं भुंज बहाण णीविमणया मा माट्टहासं कुरु ।
 आगासे भव मा कुसेज्ज-सयणे नीयं बही गच्छ मा ।
 देवी गब्भ-भरालसा नियसही-वग्गेण सा सिस्साए ॥ ३१६ ॥

शार्दूलविक्रीडितम्

तिहिं नाणेहिं समग्गो देवी-तिसलाइ सो य कुच्छंसि ।
 अह वसइ सण्णि गब्भो छम्मासे अद्ध-मासं च ॥ ३१७ ॥

अह सत्तमंमि मासे गब्भत्थो चेवऽभिग्गहं गिण्हे ।

नाहं समणो होहं अम्मा-पियरंमि जीवन्ते ॥ ३१८ ॥

तेणं कालेणं तेणं समएणं समणे भगवं महावीरे जे से गिम्हाणं पढमे मासे, दुच्चे पक्खे चित्त-सुद्धे, तस्स णं चित्तसुद्धस्स तेरसीदिवसेणं नवण्हं मासाणं बहुपडिपुण्णाणं अब्बट्टमाणं राइंदियाणं विइक्कंताणं उच्चट्ठाण-गएसु गहेसु, पढमे चंदजोगे, सोमासु दिसासु वित्तिमिरासु विसुद्धासु, जइएसु सव्वसउणेसु पयाहिणाणुकूलंसि भूमिसप्पंसि मारुयंसि पवायंसि निष्फण्ण-मेइणीयंसि कालंसि, पमुइअ-पक्कीलिएसु जणवएसु, पुव्वरत्ता-वरत्त-काल-समयंसि हत्थुतराहिं नक्खत्तेणं चंदेण जोगमुवागएणं त्ति ॥ सूत्र ६६ ॥

अचेयणाओ दिसाओ पसेउ पमुइयाइ वा ।

वाया वि य सुह-फासा मंदं मंदं च वायंति ॥ ३१९ ॥

उज्जोओ लोय-तिए निनाइया देवदुंदुही पवरा ।

अवि नारया पहट्ठा पुढवी पावेइ ऊसासं ॥ ३२० ॥

अह(हो)लोग-वासिणीओ दिसा-कुमारिओ अट्ठ जिण-जम्मं ।

ओहीए नच्चा णं आगया तत्थ सूइ-गिहे ॥ ३२१ ॥

भोगंकरा भोगवई सुभोया भोयमालिणी ।

तोयहारा विचित्ता य पुप्फमाला अणिंदिया ॥ ३२२ ॥

नत्ता पहुं जणणि-जुयं कुणंति ईसाणए य सुइ-गेहं ।

संवत्तग-वाएणं भू-सुद्धिं जोयण-पमाणं ॥ ३२३ ॥

मेहंगरा मेहवई सुमेहा मेहमालिणी ।

सुवच्छा वच्छमित्ता य वारिसेणा बलाहिगा ॥ ३२४ ॥

एया उ उट्ठ-लोया पत्ता समाउयं जिणं नमिउं ।

गंधंबु-पुप्फवासं कुणंति एया कुमारीओ ॥ ३२५ ॥

अह नंदुत्तरा नंदे आणंदा णंदवद्धणा ।

विजया वेजयंती य जयंती चापराजिया ॥ ३२६ ॥

एया उ पुव्व-रुयगा आलोगत्थं धरंति दप्पणयं ।

बहु भत्ति-जुया पत्ता जणणि-जुयं जिणवरं नमिउं ॥ ३२७ ॥

समाहारा सुप्पदत्ता सुप्पबुद्धा जसोहरा ।
 लच्छीवई सेसवई चित्तगुत्ता वसुंधरा ॥ ३२८ ॥
 एया दक्खिण-रुयगा भिंगारे करयलंमि किच्चाणं ।
 जिण-जणणीण्हवणत्थं चिद्धंति पवित्त-जल-भरिया ॥ ३२९ ॥
 इलादेवी सुरादेवी पुढवी पउमवई य ।
 एगनासा नवमिगा भद्दा सीया य नामओ ॥ ३३० ॥
 एया पच्छिम-रुयगा वायत्थं वंजणे करे किच्चा ।
 संपत्ता चिद्धंति जिणमुहविण्णत्थ-दिट्ठीओ ॥ ३३१ ॥
 अलंबुसा मियकेसी पुंडरीया तह य वारुणी हासा ।
 हासा सिरी हरी सव्वपहा उत्तर-रुयगा समेयाओ ॥ ३३२ ॥
 ढालंति चामराओ विचित्ता चित्तकण्णगा सतेरा य ।
 सोदामिणी तहा वि य विदिसि-रुयगाउ संपत्ता ॥ ३३३ ॥
 दीव-हत्थाओ एया अण्णा चत्तारि रुयगओ पत्ता ।
 रूवा रूवासिगा वि य सुरूवा रूवगावई ॥ ३३४ ॥
 चउरंगुलओ नालं छित्ता खाओदरे खिवंति लहुं ।
 वेरुलिएहिं गत्तं पूरित्ता पीठबंधं च ॥ ३३५ ॥
 दुव्वाओ रोहित्ता रंभा-गिह-तियं जम्म-गेहाओ ।
 पुव्वाए दाहिणाए उत्तराए य कुव्वंति ॥ ३३६ ॥
 दक्खिण-रंभा-गेहे आणित्ताब्भिगयं च कुव्वंति ।
 ण्हाणाइ-अलंकारं पुव्व-दिसाए पकुव्वंति ॥ ३३७ ॥
 जणणी-जुयं जिणंदं आणित्ता उत्तरे दिसीभागे ।
 उप्पाडिऊण अग्गिं अरणि-कट्ठाभिजोएणं ॥ ३३८ ॥
 होमं किच्चा रक्खापुट्टलियं बंधिऊण आसीसं ।
 दिति भव पव्वयाऊ जम्म-ट्ठाणे य मुंचंति ॥ ३३९ ॥
 सट्ठाण-ठिआ सव्वा गायंति जिणगुणे पसत्थे य ।
 इत्थंतरंमि चलियं सक्कस्स सिंहासणं रम्मं ॥ ३४० ॥

इति दिक्कुमारिका-महोत्सवः ॥

ओहीए जाणित्ता चरिम-जिणिंदस्स जम्म सक्को य ।
 वयइ हरिणेगमेसिं सुघोस-घंटाइ-वरकज्जं ॥ ३४१ ॥

जोयणमाणं घंटं सुघोस-नामेण सक्क-वयणेणं ।
 उल्लालेइ पहडो णेगमेसी तीए रेणू ॥ ३४२ ॥
 सव्व-विमाण- गओ सो सक्काएसं तओ सुराणं पि ।
 तेण पमुइया देवा चलणोपगमं पकुव्वंति ॥ ३४३ ॥
 पालग-देव-प्पगयं लक्ख-जोयण-वित्थरं विमाणं च ।
 आरोहइ तियसिंदो अग्ग-महिसी-पमुह-जुत्तो य ॥ ३४४ ॥
 चलिओ देव-गणेहिं अण्णेहिं परिवुडो समंतेणं ।
 देविंदसासणाओ केइ मित्ताणुवत्तणओ ॥ ३४५ ॥
 पत्तीहिं पेरिया वि हु केइ केइ य अत्त-भावाओ ।
 कोउयओ य केइ चलिया एवं सुरा सव्वे ॥ ३४६ ॥
 बहूहिं तूर-घोसेहिं घंटाणं सद्दएहि य ।
 कोलाहलेण देवाणं सद्दादेयं तयाजणि ॥ ३४७ ॥
 सिंहत्थो वत्ति हत्थित्थं दूरं सीय-गयं कुरु ।
 हणिस्सइऽण्णहा नूणं दुद्धरो मम केसरी ॥ ३४८ ॥
 वाजित्थं कासरारूढो गरूलत्थोऽहि-सप्पगं ।
 छागत्यं चित्तगत्यो य वयंतेवं सुरा तया ॥ ३४९ ॥
 सुराणं कोडिकोडीहिं विमाणेहिं घणेहि य ।
 वित्थिण्णो वि न्होमग्गो अइसंकिण्णो अभू तया ॥ ३५० ॥
 मित्तं केवि परिच्चज्ज दक्खत्तेणग्गओ गया ।
 भाय ! खणं पडिक्खेहि आगच्छामि तए समं ॥ ३५१ ॥
 केइ वयंति भो देवा ! संकिण्णा पव्व-वासरा ।
 भवंति सव्वया णूणं तम्हा मोणं विहेहि भो ! ॥ ३५२ ॥
 नंदीसरे विमाणाणि संकुच्चागा सुराहिवो ।
 एवमवाइ वंदित्ता तिसलं मायरं तया ॥ ३५३ ॥
 नमो ते रयण-कुच्छि-धारिए विस्स-दीविए ।
 अहं सक्को करिस्सामि जिणजम्म-महोच्छवं ॥ ३५४ ॥
 भेयव्वं देवि ! तन्नेव निद्दावसावणिं तया ।
 एवं वइत्तु दत्ता य गिण्हित्ता जिणनायगं ॥ ३५५ ॥

किच्चा जिण-पडिबिंबं माउए संनिहिं निवेसित्ता ।
 कर-संपुडे गिण्हित्ता भगवंतं पंच-रूव-धरो ॥ ३५६ ॥
 एगो गहिय-तित्थेसो दो पासे दोय चामरे ।
 एगो धरियायवत्तो एगो वज्रधरो पुरो ॥ ३५७ ॥
 एवं सक्को सुर-गण-जुत्तो मेरु-गिरि-पंडग-वणंमि ।
 चूला-दाहिण-पासे अइपंडु-सिलासणे पवरे ॥ ३५८ ॥
 उच्छंगे जिणनाहो पुव्वाभिमुहो निसीयइ जाव ।
 ताव य सव्वे इंदा समागया तत्थ देव-जुया ॥ ३५९ ॥
 सव्वे वि विउव्वंति सुवण्ण-रूपो य रायणे कुंभे ।
 तह सुवण्ण-रूपमये सुवण्ण-रयणमये चेव ॥ ३६० ॥
 रूप-रयणामया वि य तहेव कल्लाण-रूप-रयणमया ।
 पुढवीमया य अण्णे पत्तेयदुत्तर-सहस्सं ॥ ३६१ ॥
 एवं भिंगाराई उवगरणं सव्वयं विउव्वित्ता ।
 कलसेहिं सव्वेहिं खीरोदगाईहिं भरिएहिं ॥ ३६२ ॥
 पणवीस-जोयण-तुंगो बार-जोयणाइं वित्थारो ।
 जोयणमेगं नालू य इगकोडी-सट्ठि-लक्खाइं ॥ ३६३ ॥
 इत्थंतरंमि भयवं जाणित्ता इंद-संसयं सव्वं ।
 कंपावइ मेरुगिरिं पायंगुट्टेण वामेणं ॥ ३६४ ॥
 तत्तो अयला चलिया संखुद्धा सायरा य देवगणा ।
 जाणित्ता वीर-जिणं पणओ खामेइ देविंदो ॥ ३६५ ॥
 अच्चुयाइ कमसो सव्वे इंदा कुणंति जिणमहिमं ।
 तत्तो ईसाणिंदो उच्छंगे धरइ वीरजिणं ॥ ३६६ ॥
 उट्ठित्ता सक्किंदो विउव्वित्ता य पवर-चउ-वसभे ।
 तेसिट्ठ-सिंग-निगय-दगधाराहिं इय विसेसो ॥ ३६७ ॥
 गायंति य नच्चंति य देवा-देवीओ भत्तिराएण ।
 पणमंति जिणवरिंदं जम्मं सहलं च मण्णंति ॥ ३६८ ॥
 जम्माभिसेयं किच्चा भगवंतं जणणि-पासि मुत्तूणं ।
 ओसोवणि-पडिबिंबं अवहरिऊणं गओ इंदो ॥ ३६९ ॥

परिवार-जुया इंदा नंदीसर-दीवयंमि गंतूणं ।

अट्टाइया-महं तहा किच्चा सट्टाण संपत्ता ॥ ३७० ॥

इति श्रीवीर-जन्मोत्सवः ॥

तए णं समणस्स भगवओ महावीरस्स अम्मापियरो पढमे दिवसे ठिइवडियं करेति, तइए दिवसे चंद-सूर-दंसणियं करेति, छट्टे दिवसे धम्मजागरियं करेति, इक्कारसमे दिवसे विइक्कंते निव्वत्तिए असुइ-जम्म-कम्म-करणे संपत्ते बारसाहे दिवसे विउलं असण-पाण-खाइम-साइमं उवक्खडावित्ति, उवक्खडावित्ता, मित्त-नाइ-नियग-सयण-संबंधि-परिजणं नायए खत्तिए य आमंतेइ, आमंतित्ता तओ पच्छा ण्हाया कयबलिकम्मा कयकोउय-मंगल-पायच्छित्ता सुद्धप्पावेसाइं मंगल्लाइं पवराइं वत्थाइं परिहिया अप्पमहग्घाभरणालंकिय-सरीरा भोयणवेलाए भोयणमंडवंसि सुहासणवरगया तेणं मित्त-नाइ-नियग-सयण-संबंधि-परिजणेणं नायएहिं खत्तिएहिं सद्धिं तं विउलं असण-पाण-खाइम-साइमं आसाएमाणा विसाएमाणा परिभुंजेमाणा परिभाएमाणा एवं वा विहरंति ॥ सूत्र १०४ ॥

जम्म-दिणा विक्कंते दिवस-दुगे गेहि-गुरु-समीव-गिहे ।

जिण-पडिमग्गे सुफलिहा-मइं पहाणं व रुपमइं ॥ ३७१ ॥

परिडुप्प-चंद-मुत्तिं विहिणा पूइत्तु ठावए तत्तो ।

ण्हायाभरण-सुवत्थं नियकरजुय-गहिय-निय-पुत्तं ॥ ३७२ ॥

चंदुदये पच्चक्खं आणित्ता मायरं च ससि-समुहं ।

ॐ अरहं चंदोऽसि निसागरोऽसी निसाइ-पहू ॥ ३७३ ॥

नक्खत्तपइरसि य ओसहीगब्भोसि सयलजणपुज्जो ।

अस्स कुलस्स य रिद्धिं विद्धिं पवरं पसिद्धिं च ॥ ३७४ ॥

कुरु कुरु इय ससि-मंतं, उच्चरंतो समाइ-पुत्तस्स ।

चंदं दरसेइ गुरु सपुत्त-माया य नमइ गुरुं ॥ ३७५ ॥

देइ गुरु आसीसं तुम्हाणं संपयं कुणउ चंदो ।

तत्तो य चंद-मुत्तिं विसज्जए तंमि दिवसंमि ॥ ३७६ ॥

जइ हुज्ज चउदिसिं अमावस्सा य रुज्जं नहं च नो चंदो ।

दिस्सइ तह संज्ञाए कायव्वं चंद-दंसणयं ॥ ३७७ ॥

एवं सूरस्स वि हु मुत्तिं सुवण्णमइं च तंबमइं ।
 नवरं मंतो एवं ॐ अरहं सूरिओसित्ति ॥ ३७८ ॥
 दिणयरोसि तह तमोपहोसि तह चेव सहसकिरणोसि ।
 जयचक्खूरसि पसीद य आसीवायं गुरू देइ ॥ ३७९ ॥
 नवरं हि सुयग भया जाणेयव्वा य पुत्तजुयमाया ।
 ठाविय मुत्तिविसज्जणमवि कायव्वं तहेव ति ॥ ३८० ॥

समणे भगवं महावीरे कासव-गुत्तेणं, तस्स णं तओ नामधिज्जा
 एवमाहिज्जंति, तं जहा-अम्मापिउसंतिए वद्धमाणे सहसंमुइयाए समणे, अयले
 भयभेरवाणं परीसहोवसग्गाणं खंतिखमे, पडिमाणं पालए, धीमं, अरइ-रइ-सहे,
 दविए, वीरियसंपण्णे, देवेहिं से नामं कयं “समणे भगवं महावीरे” ॥ १०८ ॥

अह वहुइ सो भयवं दियलोयचुओ अणोवम-सिरिओ ।
 दासी-दास-परिवुडो परिकिण्णो पीढमदेहिं ॥ ३८१ ॥
 जाईसरो य भयवं अप्परिवडिएहिं तीहिं नाणेहिं ।
 कंतीहि य बुद्धीहि य अब्भहिओ तेहिं मणुएहिं ॥ ३८२ ॥
 अह ऊण-अट्ठ-वासो भयवं कीलइ सुराण मज्झंमि ।
 आमलिया-खिल्लेणं लोय-पसिद्धेण-पुर-बाहिं ॥ ३८३ ॥
 तत्थ य खिड्डुय-रुक्खं आरुहियव्वं तु खिल्लयनरेहिं ।
 इत्थंतरे य सक्को सोहम्म-सहाइ-उवविट्ठो ॥ ३८४ ॥
 संत-गुणा-कित्तणयं करेइ वीरस्स अमर-मज्झंमि ।
 धीरत्त-गुण-वियारे परगुणगहणंमि तल्लिच्छो ॥ ३८५ ॥
 बालो अबालभावो अबालपरक्कमो महावीरो ।
 न उ सक्का भेसेउं देवेहिं सइंदएहिं पि ॥ ३८६ ॥
 तं वयणं सोऊणं मिच्छदिट्ठी य अह सुरो एगो ।
 चिंतइ माणुस-मित्तं तत्थ वि सिसु-भावमावण्णं ॥ ३८७ ॥
 देवेहिं वि नो तीरइ भेसेउं सदहामि नो एयं ।
 ता गंतुं भेसेमि इय चिंतिय आगओ तत्थ ॥ ३८८ ॥
 कीलइ जत्थ जिणंदो कीलण-रुक्खं वेढइ समंता ।
 कज्जल-वण्णं काउं फणि-रूवं दीहरं भीमं ॥ ३८९ ॥

तं ददूण पलाणा भयभीया कीलमाणया कुमरा ।
 सव्वे वि ठिओ वीरो फणिणा वि कओ फणाडोवो ॥ ३६० ॥
 सो धित्तूण करेणं उल्लालेऊण घल्लिओ दूरं ।
 भय-रहिण्ण जिणेण लहु मिलिया ते पुणो डिंभा ॥ ३६१ ॥
 चिंतइ सुरो न भीओ इच्छंता अण्णहा पुणो भेसे ।
 इत्थंतरंमि वीरो तिंदुसय-कीलणं कुणइ ॥ ३६२ ॥
 तेहिं कुमरेहिं समं सो वि सुरो डिंभ-रूवयं काउं ।
 कीलइ वीरेण समं जिओ य सो भगवया तत्थ ॥ ३६३ ॥
 तप्पिड्डीए वीरो आरूढो तस्स वाहण-निमित्तं ।
 एसो वि य तत्थ पणो जियस्स जं पिड्डियारुहणं ॥ ३६४ ॥
 सो वट्ठिउं पवत्तो वेयालागार-धारओ रुद्धो ।
 सत्त-तल-माण-देहो संजाओ भेसणट्ठाए ॥ ३६५ ॥
 जिण-नाहेण वि पहओ पुड्डिए वज्ज-कढिण-मुड्डीए ।
 सो आराडिं काउं भयेण ससगुव्व संकुडिओ ॥ ३६६ ॥
 पायडियामर-रूवो रंजिय-हियओ य पणमइ जिणंदं ।
 भणइ तुहं परमेसर धीरत्तं तारिसं चेव ॥ ३६७ ॥
 जारिसयं सुरवइणा सुर-मज्झे वणिणयं ति ता खमसु ।
 मज्झ तुमं भेसविओ परिकखणत्थं जमेवं ति ॥ ३६८ ॥
 भुज्जो भुज्जो खामिय पणमिय वीरं गओ स सोहम्मं ।
 भयवं पि गिहे चिट्ठइ विसिद्ध-कीला-विणोएणं ॥ ३६९ ॥
 बालत्तणे वि सूरु पयइए गुरु-परक्कमो भयवं ।
 वीरु त्ति कयं नामं सक्केण तुड्ड-चित्तेणं ॥ ४०० ॥ (इत्यामलकी-क्रीडा...)

अह तं अम्मा-पियरो जाणित्ता अहिय-अट्ठ-वासं ति ।
 कय-कोउअलंकारं लेहायरिस्स उणित्ति ॥ ४०१ ॥
 इत्थंतरंमि सक्कस्स आसणं चलइ तो वियाणित्ता ।
 तं वइयरं सुरिंदो वयइ समक्खं सुराणं पि ॥ ४०२ ॥
 अंबे वण्णरमालया सुमहुरी गारो सुहाए य सो,
 बंभी-पाढण-सव्विही सुइ-गुणारोवो ^१ससंगे जहा ।

जं वीरस्स जिणस्स पाढणकए जं लेहसाला कया;
 इच्चेयं हरिणा पसंसियमहो! वीरोऽत्थु सेयंकरो ॥ ४०३ ॥ शार्दूलविक्रीडितवृत्तम्
 गाऊ पुरओ माउल-वण्णणं लहरीयं च लंकाए।
 लवणं लवण-समुद्दस्स पाहुडं तह य जिणपाठो ॥ ४०४ ॥

यतः

अनध्ययन-विद्वांसः निर्द्रव्य-परमेश्वराः।
 अनलङ्कार-सुभगाः पान्तु युष्मान् जिनेश्वराः ॥ ४०५ ॥
 गंभीरया जिणंदस्स दक्खत्तं च तहापहो।
 जं जाणंतोऽवि सव्वत्थं नाइक्खइ महायसो ॥ ४०६ ॥
 सक्को माहण-रूवो समागओ तत्थ लेहसालाए।
 तं गुरु-जुग्गासणये ठावित्ता पुच्छइ सद्दे ॥ ४०७ ॥
 तस्संदेहे तत्तो भयवं तह वागरेइ सो सुणइ।
 गय-संदेहो विप्पो चिंतइ बालस्सऽहो! बुद्धी ॥ ४०८ ॥
 तो वयइ देवराओ विप्प! तुमं बालयंति मा चिंते।
 एसो महाणुभावो भव्वं भूयं वियाणेइ ॥ ४०९ ॥
 इच्चाइय कहित्ता लोग-समक्खं च संथवं काउं।
 पणमित्ता वीर-जिणं पत्तो सक्को सट्ठाणंमि ॥ ४१० ॥
 अप्पित्ता भूरि-धणं राया-सिद्धत्थओ य विप्पस्स।
 वीर-जिणंद-समेओ पत्तो सगिहं महमहेणं ॥ ४११ ॥

इति वीर-लेखशाला-महः

उम्मुक्क-बालभावो कमेण अह जोव्वणं समणुपत्तो।
 भोग-समत्थं नाउं अम्मा-पियरो य वीरस्स ॥ ४१२ ॥
 तिहि-रिक्खंमि पसत्थे महंत-सामंत-कुल-पसूयाए।
 कारंति पाणिगहणं जसोय-वर-रायकन्नाए ॥ ४१३ ॥
 पंचविहे माणुस्से भोए भुंजित्तु अह जसोयाए।
 तेयसिरिं वसुरूवं जणइ पियदंसणं धूयं ॥ ४१४ ॥
 परिणीया समयंमि य जमालिणा पवर-नरवइ-सुएण।
 वीरस्सऽम्मा-पियरो दिवंगया इत्थ-समयंमि ॥ ४१५ ॥

वीरस्स जिट्ठ-भाया अहिसित्तो नंदिवद्धणो कुमरो ।
 वर-राय-लक्खण-धरो रज्जे सामंत-मंतीहिं ॥ ४१६ ॥
 वीरो वि नंदिवद्धण-पमुहं आपुच्छइ सयणवग्गं ।
 पव्वज्जागहणत्थं पडिपुण्णाभिग्गहत्तेण ॥ ४१७ ॥
 तो भणइ जिट्ठ-भाया मम जणणी-जणय-विरह-दुहियस्स ।
 तुह विरहग्गी सुंदर ! खयंमि खारोवमो होइ ॥ ४१८ ॥
 एवं भणिए जिट्ठेण भाउणा परम-पणय-कल्लिएणं ।
 तस्सेव बोहणत्थं भणइ जिणो भवविरत्त-मणो ॥ ४१९ ॥
 नड-पिच्छणए पिच्छय जणाण जह दीहरो न जाओ ।
 तह बंधु-समाजोगो अथिरुच्चिय होइ संसारे ॥ ४२० ॥

किं च.....

पिय-माय-भाय-भयणी-भज्जा-पुत्तत्तेण सव्वे वि ।
 जीवा जाया बहुसो जीवस्स य एगमेगस्स ॥ ४२१ ॥
 ता कंमि कंमि कीरइ पडिबंधो कंमि कंमि वा नेय ।
 इय नाऊण महायस ! मा किज्जउ सोग-संतावो ॥ ४२२ ॥

नंदीवर्धन--

अहमवि जाणामि इमं किंतु ममं बंधणाइं तुट्ठंति ।
 जीविय-भूएण तए अज्ज वि मुक्कस्स सयरहं ॥ ४२३ ॥
 ता मह अवरोहेणं वासाइं दुण्णि चिट्ठसु गिहंमि ।
 उत्तम-पुरिसा दुहियं दट्ठं करुणायरा हुंति ॥ ४२४ ॥

वीरो--

एवं होउ नरेसर ! किंतु ममऽद्धा न कोइ आरंभो ।
 कायव्वोऽहं फासुय-भोयण-पाणेण चिट्ठिस्सं ॥ ४२५ ॥
 एवं चिय पडिवण्णे चिट्ठइ सुहज्जाण-भावणो वीरो ।
 विसय-सुह-निप्पिवासो दयावरो सव्व-जीवेसु ॥ ४२६ ॥
 तो साहिय-वास-दुगं अपिबंतो सीयलं जलं सामी ।
 कासि नो सव्वण्हाणं सुद्ध-जलेणाऽसि बंभवओ ॥ ४२७ ॥
 लोयट्ठिइ-रक्खणट्ठा कर-पाए धोवइ विसुद्धेण ।
 दिक्खा-समये सचित्त-जलेणऽकासी सव्व-सिणाणं ॥ ४२८ ॥

एवं चिद्धइ भयवं जाया पुव्वं व एरिसा पसिद्धी ।

जह एसो चक्कवई चउदस-सुमिणेण भविस्सइ य ॥ ४२६ ॥

सेणिय-चंडपज्जोया उदओ य पियरेहिं पेसिया जत्थ ।

नो एस चक्कवट्ठी निय-निय-ठाणं गया तेऽवि ॥ ४३० ॥

समणे भगवं महावीरे दक्खे दक्खपइण्णे पडिरूवे आलीणे भद्दए विणीए
नाए नायपुत्ते नायकुलचंदे विदेहे विदेहदिण्णे विदेहजच्चे विदेहसूमाले, तीसं
वासाइं विदेहंसि कट्ठु अम्मापिऊहिं देवत्तगएहिं गुरुमहत्तरएहिं अब्भण्णुण्णाए
समत्त-पइण्णे पुणरवि लोगंतिएहिं जीअकप्पिएहिं देवेहिं ताहिं इट्ठाहिं कंताहिं
पियाहिं मणुण्णाहिं मणामाहिं उरालाहिं कल्लाणाहिं सिवाहिं धण्णाहिं मंगलाहिं
मियमहुर सस्सिरीआहिं दिअयगमणिज्जाहिं हिययपल्हायणिज्जाहिं गंभीराहिं
अपुणरुत्ताहिं वग्गूहिं अणवरयं अभिनंदमाणा य अभिथुव्वमाणा य एवं
वयासी ॥ सूत्र ११० ॥

सारस्सयमाईच्चा वण्ही वरुणा य गद्धतोया य ।

तुसिया अव्वाबाहा अग्गिच्चा चेव रिद्धा य ॥ ४३१ ॥

एए देव-निकाया भयवं बोहंति जिणवरिंदं तु ।

सव्व-जग-जीव-हिययं भयवं तित्थं पवत्तेहि ॥ ४३२ ॥

संवच्छरेण होही अभिनिक्खमणं तु जिणवरिंदाणं ।

तो अत्थ-संपयाणं पवत्तए पुव्व-सूरंमि ॥ ४३३ ॥

एगा हिरण्ण-कोडी अट्टेवय-अणूणगा सय-सहस्सा ।

सूरोदय-माइयं दिज्जइ जा पायरासाओ ॥ ४३४ ॥

वरद वरं वरद वरं इय घोसिज्जइ महंत-सद्देणं ।

पुर-तिय-चउक्क-चच्चरे रत्था-रायपहाइसु ॥ ४३५ ॥

जो जं वरेइ तं तस्स दिज्जइ हेम-वत्थ-वाइयं ।

वियरंति तत्थ तियसा सक्काएसेण सव्वंपि ॥ ४३६ ॥

तिण्णेव य कोडि-सया अट्ठासीइं च हुंति कोडीओ ।

असीइं च सयसहस्सा एयं संवच्छरे दिण्णं ॥ ४३७ ॥

वच्छर-दाण-पवुट्ठी विरमिय-दारिद्-दवानला तह य ।

जायगा-जणा य पत्ता सगिहे वरवेससंजुत्ता ॥ ४३८ ॥

पडिसेहंति य पमया के तुब्भे इत्थ मा पवेसेह ।
 ते बिंति तुम्ह नाहा ते पगया वद्धमाण-पये ॥ ४३६ ॥
 ते सवहं कुव्वंति खग्गि-जणा वि य तहेव भासंति ।
 इय दुल्लक्खा जाया जिणंद-दाण-प्पभावाओ ॥ ४४० ॥
 पुट्ठो य पुणो भाया जिणेण वीरेण विगयमोहेण ।
 तुह संतिओ य अवही पुण्णो गिण्हामि दिक्खमहं ॥ ४४१ ॥
 धय-हट्ठ-सोह-चंदण-माला-मंचाई-मंच-रमणिज्जं ।
 कुंडग्गामं नगरं सुरलोयसमं कयं तइया ॥ ४४२ ॥
 तो नंदिवद्धण-कय-कलसेसु दिव्व-भावओ पविट्ठा ।
 सक्काई-कया कलसा दिक्ख-महं कासि तह चेव ॥ ४४३ ॥
 जाव य कुंडग्गामो जाव य देवाण भवण-आवासा ।
 देवेहि य देवीहि य अविरहिय-संचरंतेहिं ॥ ४४४ ॥
 सिंहासणे निसण्णं सक्कीसाणेहिं दोहिं पासेहिं ।
 वीयंति चामरेहिं मणि-कणग-विचित्त-दंडेहिं ॥ ४४५ ॥
 पुव्विं उक्खित्ता माणुसेहिं साहट्ठ-रोम-कूवेहिं ।
 पच्छा वहंति सीयं असुरिंद-सुरिंद-नागिंदा ॥ ४४६ ॥
 चल-चवल-भूसणधरा सच्छंद-विउव्वियाहरणधारी ।
 देविंद-दाणविंदा वहंति सीयं जिणंदस्स ॥ ४४७ ॥
 कुसुमाणि पंच-वण्णाणि मुयंता दुंदुही य ताडंता ।
 देवगणा य पहट्ठा समंतओ अच्चुय-गयणं ॥ ४४८ ॥
 वण खंडुव्व कुसुमियं पउम-सरो वा जहा सरय-काले ।
 सोहइ कुसुम-भरेणं इय गयणयलं सुरगणेहिं ॥ ४४९ ॥
 अयसि-वणं व कुसुमियं कणयार-वणं च चंपयवणं वा ।
 तिलयवणं व कुसुमियं इय गयणयलं सुरगणेहिं ॥ ४५० ॥
 वर पडह-भेरी-झल्लरि-दुंदुहि-संखसएहिं तुरेहिं ।
 धरणियले गयणयले तूरनिनाओ परम-रम्मो ॥ ४५१ ॥
 नायवणसंडपत्तो आभरणाइ विमुत्तु सयमेव ।
 पंचमुट्ठियं च लोयं करेइ सामी पसत्थ-मणो ॥ ४५२ ॥

दिव्वो माणुस-घोसो तूर-निनाओ य सक्क-वयणेणं ।

खिप्पामेव निलुक्को जाहे पडिवज्जइ चरित्तं ॥ ४५३ ॥

काऊण नमुक्कारं सिद्धाणमभिग्गहं तु सो गिण्हे ।

सव्वं मे अकरणिज्जं पावं ति चरित्तमारुढो ॥ ४५४ ॥

सामाइयं करेइ सामी सावज्ज-जोग-वज्जणयं ।

भंते ति य नो पभणइ सयं तहा कप्प-जोगाओ ॥ ४५५ ॥

उवागच्छित्ता असोगवरपायवस्स अहे सीयं ठावेइ, ठावित्ता सीयाओ पच्चोरुहइ, पच्चोरुहित्ता सयमेव आभरणमल्लालंकारं ओमुयइ, ओमुइत्ता सयमेव पंचमुट्ठियं लोयं करेइ, करित्ता छट्ठेणं भत्तेणं अपाणहणं दत्थुत्तराहिं नक्खत्तेणं जोगमुवागएणं एणं देवदूसमादाय एगे अबीये मुंडे भवित्ता अगाराओ अणगारियं पव्वइए ॥ सूत्र ९९६ ॥

सक्काइया देवा भयवंतं वंदिउं सपरितोसा ।

कय-नंदीसर-जत्ता निय निय ठाणाइं संपत्ता ॥ ४५६ ॥

वीरो वि बंधुवग्गं आपुच्छिउं पत्थिओ विहारेणं ।

सो वि य विसन्न-चित्तो वंदिय वीरं पडिनियत्तो ॥ ४५७ ॥

दिवसे मुहुत्त-सेसे कम्मरग्गामपवरमणुपत्तो ।

रयणीइ तत्थ सामी पडिमाइ ठिओ य निक्कंपो ॥ ४५८ ॥

गोव निमित्तं सक्कस्स आगमो वागरेइ देविंदो ।

कुल्लाग-बहुल-विप्पस्स पारणे पयस वसुहारा ॥ ४५९ ॥

गोवो सव्वं दिवसं वसहे वाहित्तु संझसमयंमि ।

मुत्तुं सामि-सगासे गोदोहट्ठा गओ सगिहं ॥ ४६० ॥

ते चरिउं वणगहणे गया य सो आगओ न ते पासे ।

भमइ स रत्ति वसहा सूरुदये तत्थ संपत्ता ॥ ४६१ ॥

सो आगओ पदट्ठुं रुट्ठो धावइ जिणस्स वहणट्ठा ।

ता सक्को वारेइ ससेल्लगं तं तया गोवं ॥ ४६२ ॥

उवसग्ग-बहुलत्तं दट्ठुं सक्को भणेइ सामिस्स ।

तुब्भं वेयावच्चं करेमि तो भणइ जिणनाहो ॥ ४६३ ॥

न भूयं नो भविस्सइ इंदा जं असुरदेवयाईणं ।
 साहिजेण णाणं उप्पाडिंसु जिणा कइया ॥ ४६४ ॥
 उप्पाडिंसु जिणंदा सएण उट्ठाण-वीरिय-बलेणं ।
 सिद्धत्थ-सुरं तह विहु जिण-पासे ठावइ सक्को ॥ ४६५ ॥
 पणमिय गओ य सक्को भयवं कुल्लाग-संनिवेसे य ।
 माहण-बहुल-गिह-खीर-पारणं कुणइ जिणवीरो ॥ ४६६ ॥
 अद्ध-तेरस-कोडी उक्कोस होइ तत्थ वसुहारा ।
 अद्ध-तेरस-लक्खा जहणिया होइ वसुहारा ॥ ४६७ ॥
 दिक्खावसरे इंदाईहिं कयं सुगंध-पूयणं जिणस्स ।
 तग्गंधागिट्ठा वि हु भमराइ कुणंति उवसग्गं ॥ ४६८ ॥
 मोराग-सन्निवेसे दुइजंतग-तावसालय-समीवे ।
 कुलवइणा पहू दिट्ठो सो पिउमित्तो य पत्थेइ ॥ ४६९ ॥
 चउमासत्थं इच्छउ आगन्तव्वं तए महवरोहा ।
 सामी वि विहरमाणो वासत्थं आगओ तत्थ ॥ ४७० ॥
 उडए चिट्ठइ सामी कुलवइणा अप्पिए य पडिमाए ।
 तिण-लाभाभावाओ गावो भक्खंति तं उडयं ॥ ४७१ ॥
 नाया तेसिमपीई चलिओ तत्तो य पक्ख-पज्जंते ।
 पंचाभिग्गह-गहिया न गेहि विणयं करिस्सामि ॥ ४७२ ॥
 निच्चं पडिमाइ ठिइ अपीइ-गेहे वसामि नो चेव ।
 मोणं च पाणिभोयण अभिग्गहा पंच मे नेया ॥ ४७३ ॥

समणे भगवं महावीरे संवच्छरं साहियं मासं जाव चीवरधारी होत्था ।
 तेण परं अचेत्तए पाणिपडिग्गहिए । समणे भगवं महावीरे साइरेगाइ
 दुवालसवासाइं निच्चं वोसट्ठकाए चियत्तदेहे जे केइ उवसग्गा उप्पज्जंति तं
 जहा-दिक्खा वा माणुसा वा तिरिक्खजोणिया वा, अणुलोमा वा पडिलोमा वा,
 ते उप्पण्णे सम्मं सहइ, खमइ, तित्तिक्खइ अहियासेइ ॥ सूत्र ११७ ॥

पिउणो य मित्त-सोमो आजम्मं चेव निद्धणो भट्ठो ।
 धणलाभत्थी पत्तो आसं काउं जिण-सगासे ॥ ४७४ ॥

सो पुण दाणावसरे जिणस्स देसंतरे गओ आसी ।
 लाभत्यमेव रहिओ भज्जाए आगओ संतो ॥ ४७५ ॥
 एवं जिणेण दिण्णं जणस्स धणक्कए तुमं देसे ।
 तो निल्लक्खण ! अज्ज वि गंतूण तमेव मग्गेसु ॥ ४७६ ॥
 भणियं च तेण भयवं ! दीणो हं दुत्थिओ अभग्गो हं ।
 मग्गंत-भमंतस्स य न किंचि मे सामि ! संपडइ ॥ ४७७ ॥
 किं किं न कयं को को न पत्थिओ कह कह न नामियं सीसं ।
 दुब्बर-उयरस्स कए किं न कयं किंन कायव्वं ? ॥ ४७८ ॥
 दिण्णं य तए दाणं सव्वस्स जहच्छियं चिरं कालं ।
 नासि तया इत्थाऽहं ता सामि ! करेह कारुण्णं ॥ ४७९ ॥
 देसु मह किंचि दाणं सव्वस्स जीवस्स तं सि कारुणिओ ।
 इय विण्णत्तो भयवं करुणिक्करसाणुकंपो य ॥ ४८० ॥
 वियरइ सुरदूसद्धं अण्णं मह नत्थि किंचि जं भणियं ।
 सो वि गओ पणमित्ता महापसाओ त्ति तं गहिअं ॥ ४८१ ॥
 तुण्णागस्सुवणीयं दसिया कज्जंमि तेण सो भणिओ ।
 भमसु जिण-मग्गओ तं खंधाउ पडिस्सइ तमद्धं ॥ ४८२ ॥
 न य धिप्पइ सो भयवं निस्संगो तो तुमं तमाणिज्जा ।
 दो वि अहं तुण्णेउं अद्धे सयलं करिस्सामि ॥ ४८३ ॥
 दीणार-सय-सहस्सं लहिही तं विक्कयंमि तो तुब्भं ।
 मज्झं च अद्धमद्धं होही भणिओ इय गओ सो ॥ ४८४ ॥
 वच्चंतस्स य पडियं खंधाउ सुवण्ण-वालुया-पुलिणे ।
 वत्थं कंटिए लग्गं घित्तूण य सो दिओ चलिओ ॥ ४८५ ॥
 मंदाइणीइ-पुलिणे चक्कंस-लंछिए पए दट्ठुं ।
 तित्थंगरस्स पासे पत्तो सामुद्धिओ पुरिसो ॥ ४८६ ॥
 निस्संगं भगवंतं अवलोएउं विसाय-संपत्तो ।
 जा निय-चित्ते झुरइ दढीकओ ता सुरिदेण ॥ ४८७ ॥
 धम्मवर चक्कवट्ठी ससुरनर-नमंसिओ भयवं ।
 पाय-रओ वि हु एयस्स पहरए गुरुय-दारिदं ॥ ४८८ ॥

इय भणिऊण सुरिंदो पूयइ धणकणगरयणरासीहिं ।

सामुद्धियं पहडं जिणो वि अण्णत्थ विहरेइ ॥ ४८६ ॥

जे केइ उवसग्गा उप्पज्जंतित्ति तं जहा-दिक्वा वा माणुसा वा
तिरिक्खजोणिया वा, अणुलोमा वा पडिलोमा वा, ते उप्पण्णे सम्मं सहइ,
खमइ, तित्तिक्खइ अहियासेइ ॥ सूत्र ११७ ॥

पढमे वासारत्ते सूलपाणि-जक्खालये जिणंदो ।

चिद्धइ निच्चल-चित्तो उवस्सग्गे कुणइ सो देवो ॥ ४८७ ॥

सो पुण दुड्ढ-सहावो वासं कस्सइ न देइ रयणीए ।

सो पुव्व-भवे आसी वसहो धणदेव-वणियस्स ॥ ४८९ ॥

पंच सए सगडाणं उत्तारेउं नईइ सो तुट्ठो ।

गामस्स वद्धमाणस्स बाहिं मुत्तुं गओ वणिओ ॥ ४९२ ॥

पाणी-चारि-निमित्तं दव्वं गामिल्लयाण दाऊणं ।

तेहि य न किंचि दिण्णं तिण्हाइ छुहाइ सो मरिउं ॥ ४९३ ॥

जाओ य सूलपाणी रुट्ठो उवरिं च तस्स गामस्स ।

मारिं विउव्विऊणं निवाइओ बहु-जणो तेण ॥ ४९४ ॥

लोगेणं विण्णविओ तव्वयणेणं च देउलं काउं ।

तप्पडिमा कारविया जत्तं पूयं च कारित्ति ॥ ४९५ ॥

तम्मारिय-जण-अट्ठीनियरो दीसइ पए पए तत्थ ।

तो सो अट्ठियगामो त्ति लोयमज्झंमि विक्खाओ ॥ ४९६ ॥

तस्सेव बोहणत्थं भयवं पडिमाइ संठिओ रत्तिं ।

तस्साययणे सो छिय दडुं रुट्ठो जिणस्सुवरिं ॥ ४९७ ॥

उवसग्गिउमाढत्तो संज्ञाए कुणइ भूमि-भेयकरं ।

अट्ठट्ठहास-सदं मणुय-तिरिक्खाण तासणयं ॥ ४९८ ॥

तत्तो य हत्थि-रूवं पिसाय-रूवं च नाग-रूवं च ।

काउं उवस्सग्गेइ खुहइ मणागं पि नो भयवं ॥ ४९९ ॥

सिर-कण्ण-नास अच्छी-दंत-पिट्ठीसु वेयणं कुणइ ।

इक्किक्का जा जीवियहरणे अण्णस्स सुसमत्था ॥ ५०० ॥

सामी सुहज्झाणाओ नो खुहिओ किंपि सो य पडिबुद्धो ।
 रत्तिंते अंतमुहु निद्दा-वसओ य दस सुमिणे ॥ ५०१ ॥
 पासइ पढमे पहओ तालपिसाओ य सेय चित्ते य ।
 दो कोयले य सामी दाम-दुगं तहय गो-वग्गो ॥ ५०२ ॥
 सेविज्जमाणओ मे पउम-सरं सायरो मए तिण्णो ।
 दिप्पंतमक्कबिंबं आरूढो मेरु-सिहरंमि ॥ ५०३ ॥
 अंतंहे माणुसोत्तर-नगो मए वेढिओ य तेसि फलं ।
 नेमिस्सिओ पभाए इंदसम्मो भणइ एवं ॥ ५०४ ॥
 तालपिसाओ पहओ जं तं मोहं हणिस्ससि नूणं ।
 जं सेय-कोगिलो तं सुक्कं ज्ञाणं च ज्ञाएसि ॥ ५०५ ॥
 जं चित्त-कोइलो वि य दुवालसंगी भविस्सइ तुहं ।
 गोवग्गा तुह भावी चउव्विहो पवर-संघो य ॥ ५०६ ॥
 पउम-सरा देव-गणो सेवओ सागरा भव-समुद्धो ।
 तरिहिसि केवलनाणं लहिस्ससि अक्क-बिंबाओ ॥ ५०७ ॥
 मंदर-सिहारोहणमिह सिंहासण-गओ य धम्मकहो ।
 अंतंहे नगवेढा स-पयावं ते जसो भावी ॥ ५०८ ॥
 जं दाम-दुगस्स फलं नो जाणे सामिओ सयं भणइ ।
 मुणि-सावग-भेएणं दुविहं धम्मं कहिस्सामि ॥ ५०९ ॥
 तो मोरागे पत्तो पासंड अच्छदलओ तत्थ ।
 सिद्धत्थो जिण-वयणे भासइ लोयाण य निमित्तं ॥ ५१० ॥
 पासंडी ईसालू तिणं गहिता य आगओ तत्थ ।
 भंगाऽभंग-पसिणे नो भंगे छेत्तुमारद्धो ॥ ५११ ॥
 वज्जमयं तं कुणइ सक्को तो सो विलक्खओ जाओ ।
 तो सामी विण्णविओ सेवंबीयाए गंतुमणो ॥ ५१२ ॥
 लोएहिं वारिओ इह दिट्ठिविसीकारणं च लाभत्थं ।
 जिणनाहो संपत्तो तब्बिल-पासे ठिओ पडिमं ॥ ५१३ ॥
 सो पुच्च-भवे आसी खवओ (तविओ) खुल्लेण जाइ पिंडत्थं ।
 मंडूकी-वह-कहणा रुद्धो देवो तओ जाओ ॥ ५१४ ॥

पणसय-तावस-नेया अइकोही तावसो य धावंतो ।
 रायकुमार-वहत्यं स-सत्य-पहओ अही जाओ ॥ ५१५ ॥
 सो निग्गओ बिलाओ जा पासइ निच्चलं महावीरं ।
 डसइ य पायंगुठे ता पासइ उज्जलं खीरं ॥ ५१६ ॥
 ईहाऽपोह-करंतो जाईसरणेण जाणिओ भयवं ।
 किच्चा अणसणमेसो सहसारे सुरवरो जाओ ॥ ५१७ ॥
 महुराए जिणदासो आभीर-विवाह-गोण-उववासो ।
 भंडीर-मित्त-वच्चे भत्ते नागो हि आगमणं ॥ ५१८ ॥
 वीरवरस्स भगवओ नावारूढस्स कासि उवसगं ।
 मिच्छदिट्ठी परद्धं कंबल-संबला समुत्तारे ॥ ५१९ ॥
 जिणदास-सिद्धि-गिहे गोणदुगं ढोइअं च गोवेणं ।
 तं सिद्धिसंगइए भद्दगयं जिमइ सिद्धिसमं ॥ ५२० ॥
 मित्तेण तयं वाहिय भंडग-जत्ताई छुहाइ संतत्तं ।
 मुत्तुं तत्थ गओ सो तं सिद्धी पिच्छइ जाव ॥ ५२१ ॥
 मरणावत्थं पत्तं अणसण-पुच्चं विसुद्ध-भाव-जुयं ।
 मरिउं कंबल-सबला वंतर-देवा तओ जाया ॥ ५२२ ॥
 गंगं समुत्तरंतं तिविद्ध-भव-हय-सीह-सुदाढ-सुरो ।
 उवसगं कुच्चंतं निवारिओ तेहिं देवेहिं ॥ ५२३ ॥
 गामाग संनिवेसे पूयं कासी य बिभेलय-जक्खो ।
 साली-गाम-गयस्स य तिविद्ध-भवेऽवमाणिया य तया ॥ ५२४ ॥
 अंतपुरी वंतरिया जलभरिय-जडाहिं तावसी-रूवा ।
 कुणइ सीओवसगं सहमाणस्सासि लोगो ही ॥ ५२५ ॥
 अनियय-वासं सिद्धत्थपुरं तिल थंभ पुच्छ निष्पत्ती ।
 उप्पाडेइ अणज्जो गोसालो वास बहुलाए ॥ ५२६ ॥
 पुठे निष्पज्जिस्सइ तेणुप्पाडिओ य वुट्ठीए ।
 गो-खुरक्खुत्तो जाओ नियई गहिया य तो तेणं ॥ ५२७ ॥
 दढ भूभी बहु मिच्छा पेढालुज्जाणमागओ भयवं ।
 पोलासचेइयंमि ठिएगरायं महापडिमं ॥ ५२८ ॥

सक्को य देवराया सभागओ भणइ हरिसिओ वयणं ।
 तिण्णि वि लोग समत्था (न) जिण वीर-मणं चलेउं जे ॥ ५२६ ॥
 सामाणिय संगमओ देवो सक्कस्स सो अमरिसेणं ।
 अह आगओ तरंतो मिच्छदिट्ठी पडिनिविट्ठो ॥ ५३० ॥
 धूली पिविलियाओ उदंसा चेव तह य उण्हाला ।
 विच्छू सप्पा नउला मूसगा चेव अट्ठमया ॥ ५३१ ॥
 हत्थी हत्थिणगाओ पिसायए घोररूव—वग्घे य ।
 थेरो थेरी य सुओ आगच्छइ पक्कणो तह य ॥ ५३२ ॥
 खरवाय कलंकलिया कालचक्रं तहेव य ।
 पाभाइय उवसग्गो वीसइ मोहोइ अणुलोमो ॥ ५३३ ॥
 सामाणिय-देवहिं देवो दाएइ सो विमाणगओ ।
 भणइ वरेहि महरिसि! निप्पत्ति सग्ग-मुक्खाणं ॥ ५३४ ॥
 देवहिं दंसित्ता वरं वरेहि त्ति भणइ जं कज्जं ।
 सामी अक्खुद्ध-मणसो चिट्ठइ सुहज्झाण-संलीणो ॥ ५३५ ॥
 एवं एग-निसाए वीसुवस्सग्गा कया य जह तेण ।
 अणेसणाइ-करणा कयत्थिओ तह य छम्मासं ॥ ५३६ ॥
 सो संगमओ भग्गो सग्गं जा जाइ पिच्छइ सक्को ।
 जा जंपइ दुट्ठमेयं दट्ठं पि न जुज्जए अम्हं ॥ ५३७ ॥
 वज्जेणं हंतूणं वामपाए निवासिओ सिग्घं ।
 सक्कप्पियग्गमहिंसी सहिओ चिट्ठइ मेरुंमि ॥ ५३८ ॥
 छम्माणिगोवकड-खिल-पवेसणं मज्झिमाइ-पावाए ।
 खरओ विज्जो सिद्धत्थ-वाणिओ नीहरावेइ ॥ ५३९ ॥
 छम्माणि-गाम-बाहिं गोवो कण्णे य कडखिले खिवइ ।
 सो पुच्च-भवे तिविट्ठ-सिज्जापालो कण्ण-तपू ॥ ५४० ॥
 पावाए खरविज्जो सिद्धत्थ वणिओ य तेहिं मिलिएहिं ।
 संडासगेहिं मुत्ता करिसिए सामिणा राडी ॥ ५४१ ॥
 सत्तमिए सो गोवो खर-सिद्धत्था य देवलोगंमि ।
 उवस्सग्गेसु जहण्णो दुस्सहकडपूयणा सीयं ॥ ५४२ ॥

सङ्गमकः ॥

मज्झो य कालचक्रं कडखिल-उद्धारओ य उक्किट्ठो ।

इच्चाइ बहूवसग्गा सहिया जिणनाह-वीरेण ॥ ५४३ ॥

इति उपसर्गः.....

तस्स णं भगवंतस्स अणुत्तरेणं नाणेणं अणुत्तरेणं दंसणेणं अणुत्तरेणं चरित्तेणं अणुत्तरेणं आलएणं अणुत्तरेणं विहारेणं अणुत्तरेणं वीरियेणं अणुत्तरेणं अज्जवेणं, अणुत्तरेणं मद्दवेणं, अणुत्तरेणं लाघवेणं, अणुत्तराए खंतीए अणुत्तराये मुत्तीए अणुत्तराए गुत्तीए अणुत्तराए तुट्ठीए अणुत्तरेणं सच्च-संजम तव-सुचरिय-सोवचिय-फल-निव्वाणमग्गेणं अप्पाणं भावेमाणस्स दुवालस संवच्छराइं विइक्कंताइं तेरसमस्स संवच्छरस्स अंतरा वट्ठमाणस्स जे से गिम्हाणं दुच्चे मासे चउत्थे पक्खे वइसाहसुद्धे, तस्स णं वइसाहसुद्धस्स दसमी-पक्खेणं पाईण-गामिणीए छायाए पोरिसीए अभिनिवट्ठाए पमाणपत्ताए सुव्वएणं दिवसेणं विजयेणं मुहुत्तेणं जंभियगामस्स नगरस्स बहिया उज्जुवालियाए नईए तीरे वेयावत्तस्स चेइयस्स अदूरसामंते सामागस्स गाहावइस्स कट्ठ-करणंसि सालपायवस्स अहे गोदोहियाए उक्कडुअ-निसिज्जाए आयावणाए आयावेमाणस्स छट्ठेणं भत्तेणं अपाणएणं हत्थुत्तराहिं नक्खत्तेणं जोगमुवागएणं झाणंतरियाए वट्ठमाणस्स अणंते अणुत्तरे निव्वाघाए निरावरणे कसिणे पडिपुण्णे केवल-वर-नाण-दंसणे समुप्पण्णे ॥ सूत्र १२० ॥

नव किर चाउम्मासे छक्किर दो मासिए उवासी य ।

बारस य मासियाइं बावत्तरि अद्ध-मासाइं ॥ ५४४ ॥

एगं किर छम्मासं दो किर ते मासिए उवासी य ।

अट्ठाइज्जाइं दुवे दो चेव दिवह्म-मासाइं ॥ ५४५ ॥

भद्दं च महाभद्दं पडिमं तत्तो य सव्वओभद्दं ।

दो चत्तारि दसेव य दिवसे बासी य अणुबद्धं ॥ ५४६ ॥

गोयरमभिग्गह-जुयं खमणं छमासियं च कासी य ।

पंच दिवसेहिं ऊणं अव्वहिओ वच्छ-नयरीए ॥ ५४७ ॥

रायसुया सिरमुंडा दासत्तमुवागया रुयंती य ।

जंजीरिया य खुहिया दुपायंतर देहलीइ ठिया ॥ ५४८ ॥

પહર-દુય-વઙ્કંતે સુપ્પટ્ટિયે ય કુમ્માસે ।
 દિઝ્ઝા જડ કાઙ મહં અભિગ્ગહો સામિણા ગહિઓ ॥ ૫૪૬ ॥
 ચંપાવડ દાહિવાહણ ધારણિ-પુત્તી ય વસુમઈ કુમરી ।
 કોસંબી સસયાણિય-કરમ-વહગેણ સા ગહિયા ॥ ૫૪૭ ॥
 વિક્કય સા ય ગહિયા ધણાવહ-સિટ્ઠિણા સમજ્ઝાણ ।
 મૂલાણ સા ઢિણ્ણા પુત્તી કાઙ્ગણ સા ડુઢ્ઢા ॥ ૫૪૮ ॥
 મા મે ભવઠ સવિત્તી કિઘ્ઘા સિરમુંડણનિગડિયપયા ।
 પક્ખિત્તા તિય ગેહે ઉવવાસ-તિયં તિયે આસિ ॥ ૫૪૯ ॥
 કહવિ ય નાઠં સિટ્ઠી રોયંતી કહ્ઢિ કરે ધરિઠં ।
 મુંચડ દેહલિયાણ કુમ્માસે સુપ્પણ દેઙ્ગ ॥ ૫૫૦ ॥
 નિયડ-પમ્મંગ-નિમિત્તં ગચ્છડિ સિટ્ઠી ય જાવ સા બાલા ।
 ચિંતડિ જડિ ઇહ સમયે અતિહી આગચ્છડિ કોઠવિ ॥ ૫૫૧ ॥
 તા સંપત્તો ભયવં કપ્પતરુ જંગમો પહઢ્ઢા સા ।
 વયડિ ગિણ્ઢ મંતે! કુમ્માસે નિત્થરામિ અહં ॥ ૫૫૨ ॥
 સવ્વાભિગ્ગહ-પુણ્ણ પરં ન રોવડિ અઓ ચલડિ ભયવં ।
 તા રોઙ્ગ ધવત્તા ભયવં ગિણ્ઢ ય કુમ્માસે ॥ ૫૫૩ ॥⁺

+ અહીં આ એક વિચારણીય મુદ્દો છે. શ્રી કલ્પસૂત્રના છઠા વ્યાખ્યાનમાં શ્રમણ મહાવીરના છદ્મસ્થકાળમાં, પાંચ માસ અને પચીસ દિવસના ઉપવાસના પારણે પરમાત્મા ચંદનબાળાના બારણે પધારે છે ત્યારે ચંદનાની આંખમાં આંસુ હતા-હોય છે. અને હોવા તે સ્વાભાવિક છે. વળી તેવા શાસ્ત્રપાઠો-ઉલ્લેખો પણ આવશ્યકનિર્યુક્તિ-ચુણી નવપદપ્રકરણબૃહદવૃત્તિ, મનોરમા કહા, ત્રિષ્ટિં દશમું પર્વ વગેરે સુવિહિત બહુશ્રુત પુરુષોના રચેલા ગ્રંથોમાં મળે છે. એ સંદર્ભમાં ઉપાધ્યાયશ્રી વિનય વિજયજીએ સુબોધિકામાં “શ્રમણ મહાવીર ચંદનાને ત્યાં ગયા ત્યારે આંસુ ન હતા તેથી પાછા વળ્યા અને વળી પાછા ગયા ત્યારે આંસુ હતા અને તે વખતે અભિગ્રહ પૂર્ણ થવાના કારણે અડદના બાકુળા પડિલાભ્યા.”

આ ઉલ્લેખના આધારે વર્તમાન શ્રીસંઘમાં આ પ્રસંગ આજ રીતે કહેવાય છે.

સુબોધિકામાં આવા અક્ષરો જોયા પછી આ વિચારનું પુરોગામી સ્રોત ક્યાં છે? તે જિજ્ઞાસા હતી તેમાં આ શ્રી નગર્ણિકૃત કલ્પાન્તર્વાચ્ય જોવામાં આવ્યું તો તેમાં આવો જ ઉલ્લેખ મળ્યો. “પહેલા વખતે આંસુ ન હતા અને પછી આંસુ આવ્યા.” વિ. સં. ૧૬૮૬માં ઉપા. વિનયવિજયજીએ સુબોધિકાની રચના કરી છે જ્યારે શ્રી નગર્ણિકૃત કલ્પાન્તર્વાચ્યની રચના વિ. સં. ૧૬૫૭માં કરી છે. એટલે સુબોધિકાની આ એમની જ પરંપરાનું કલ્પાન્તર્વાચ્ય હોઈ શકે છે. હજી આ ઉલ્લેખનો પણ મૂળ સ્રોત શોધવાની જિજ્ઞાસા રહે જ છે.

આમ છતાં બધી રીતે વિચારતાં શ્રમણ મહાવીર જ્યારે ચંદનાને બારણે પધાર્યા ત્યારે જ તેમની આંખમાં આંસુ હતા તે પ્રાચીન વિધાન માનવું જ ઉચિત જણાય છે.

अद्ध-तेरस-कोडी सुवण्ण-वुड्डी कया य देवेहिं ।
 इच्चाइ पंचदिव्वा संजाया तंमि समयंमि ॥ ५५७ ॥
 इत्थंतंरंमि पत्तो धणलाभत्थी सयाणीओ राया ।
 सक्को तं पडिसेहइ जस्सेसा देइ तस्स धणं ॥ ५५८ ॥
 सिद्धिस्स देइ सव्वं वुत्तंतं कहिय जाइ सट्ठाणं ।
 चंदण-सम-सीयल-तणू चंदणा तेण साभिहिया ॥ ५५९ ॥
 सत्थे अबला भणिया पुण सबला इत्थिया मुण्येयव्वा ।
 कुम्मास-बक्कलाओ लद्धं जीए पवर-नाणं ॥ ५६० ॥
 दो चेव य छट्ठ सए अउणतीसे उवासिओ भयवं ।
 न कयाइ निच्च-भत्तं चउत्थ-भत्तं च से आसी ॥ ५६१ ॥
 बारस-वासे अहिए छट्ठं-भत्तं जहण्णयं आसी ।
 सव्वं च तवोकम्मं अपाणयं आसी वीरस्स ॥ ५६२ ॥
 तिण्णि सया दिवसाणं अउणापण्णे य पारणा कालो ।
 उक्कुडुय-निसिज्जाणं ठियपडिमाणं सए बहुए ॥ ५६३ ॥
 पव्वज्जाए दिवसं पढमे इत्थं तु पक्खिवित्ताणं ।
 संकलियंमि उ संतं जं लद्धं तं निसामेह ॥ ५६४ ॥
 बारस चेव य, वासा मासा छ च्चेव अद्ध मासो उ ।
 वीरवरस्स भगवओ एसो छउमत्थ-परियाओ ॥ ५६५ ॥

तह णं समणे भगवं महावीरे अरहा जाए, जिणे केवली सव्वण्णू
 सव्वदरिसी सदेव-मणुआसुरस्स लोगस्स परियायं जाणइ पासइ, सव्वलोए
 सव्वजीवाणं आगइं, गइं, ठिइं, चवणं, उववायं, तक्कं, मणो माणसियं भुत्तं,
 कडं पडिसेवियं, आवीकम्मं, रहोकम्मं, अरहा, अरहस्स भागी, तं तं कालं
 मण-वयण-कायजोगे वट्टमाणानं सव्वलोए सव्वजीवाणं सव्वभावे जाणमाणे
पासमाणे विहरइ ॥ १२१ ॥

तत्थ कहित्ता धम्मं लाभाभावाओ एग-खण-मित्तं ।
 जाइ अ पावा-पुरीए महसेण-वणंमि वीर-जीणो ॥ ५६६ ॥
 जण्णत्थं मेलिया विप्पा सोमिलेण धिज्जेण ते ।
 कुव्वंति जण्ण-कम्माणि सग्ग-मुक्ख-समीहिया ॥ ५६७ ॥

इंदभूर्इ अग्निभूर्इ वाउभूर्इ य वत्तए ।
 सोहम्मा वि य मंडिय-मोरीपुत्ते च अंकंपिए ॥ ५६८ ॥
 अयलभाया मेयजे पभासे य महायसे ।
 एए इगार विष्पा य महाविज्जा विसारया ॥ ५६९ ॥
 जीवे कम्मे तज्जीवे भूय-तारिसय बंध मुक्खे य ।
 देवा नेरइया वा पुण्णे परलोय निव्वाणे ॥ ५७० ॥
 पंचण्हं पंचसया अद्धुट्ठ-सया य हुंति दुण्ह गणा ।
 दुण्हं तु जुयलयाणं तिसओ तिसओ हवइ गच्छो ॥ ५७१ ॥
 चोयालिस-सयाइं एवं अण्णे वि माहणा बहवो ।
 उवज्झाय धणेर सोमेसर सिवंकर नामा ॥ ५७२ ॥
 संकर ईसर गंगाधर लच्छीधर महीधर पहाणा ।
 सीधर पंडिय गोवद्धणे य जेणहण नरोत्तम महेस ॥ ५७३ ॥
 जयसम्म-भीमसम्मे नारायण नीलकंठ वेकुंठ ।
 सिरिकण्णे हेमकण्णे इच्चाइ भूरि विष्पा य ॥ ५७४ ॥
 तं दिव्व-देवघोसं सोऊणं माहणा तहिं तुट्ठा ।
 अहो जण्णिण्ण जट्ठं देवा किर आगया इहयं ॥ ५७५ ॥
 सोऊण कीरमाणिं महिमं देवेहिं जिणवरिदस्स ।
 अह एइ अहम्माणी अमरसिओ इंदभूइत्ति ॥ ५७६ ॥
 मुत्तूणं ममं लोगो किं धावइ एस तस्स पायमूलं ।
 अण्णो वि जाणइ मए ठियंमि कत्तुच्चियं एयं ॥ ५७७ ॥
 वंचिज्ज व मुक्ख-जणो देवा कह णेण विम्हयं नीया ।
 वंदंति संथुणंति य जेण सव्वण्णु-बुद्धीए ॥ ५७८ ॥
 देवा भंता कहंतिऽच्छ-पाणीयमिव वायसा ।
 भेया कमलागरं मुत्तुं चंदणं मच्छिया जहा ॥ ५७९ ॥
 करहाइ व चारु-रुक्खे खीरणं सूयरा जहा ।
 अक्कालोयं जहा धूया जगे मुत्तुं च जं तिहा ॥ ५८० ॥
 अहवा जारिसओ छिय सो नाणी तारिसा सुरा तेवि ।
 अणुसरिसो संजोगो गाम-नडाणं च मुक्खाणं ॥ ५८१ ॥

आगासे सूर-दुयं गुहाए एगाए होई सीह-दुगं ?
 पडियारे खग्ग-दुगं किं सव्वण्णो अहं एसो ॥ ५८२ ॥
 किं इंद-जालिओ वा विदेस-जाओ वा को कलासाली ।
 सव्वण्णाडोवेण सग्गि-जण-पयारगो एसो ॥ ५८३ ॥
 लोए पुच्छइ भो ! भो ! सव्वण्णू केरिसो य ? ते बिंति ।
 को जाणे तस्स रूवं तिलोयविम्हयकरं जाण ॥ ५८४ ॥
 तो सो ज्ञायइ नूणं मायाए मंदिरं वियाणामि ।
 कह समत्तो लोओ विब्भमे पाडिओ अमुणा ॥ ५८५ ॥
 खणमित्तं न खमेहं सव्वण्णत्तं च तस्स वा सूरौ ।
 किं अंधयार-पसरं विणासणत्थं विलंबेइ ॥ ५८६ ॥
 कर-फरिसं अग्गी वा सीहो सावय-सरं व नो सहइ ।
 जेण मया वादिंदा तुण्हीभावं कया सव्वे ॥ ५८७ ॥
 सेला जेणऽग्गिणा दट्ठा तत्पुरो के य पायवा ।
 उप्पाडिया गया जेण का वाउस्स पुंभिया ॥ ५८८ ॥
 अग्गिभूई तओ भणइ भाय ! को इत्थ विक्कम्मो ।
 कीडियाए कहं पक्खि-राया करइ विक्कमं ? ॥ ५८९ ॥
 पउमस्सुप्पाडणे हत्थी परसू कास कत्तणे ।
 मियस्स मारणे सीहो किं पहाणेहिं सस्सए ॥ ५९० ॥
 गोयमो भायरं पाह भो ! अज्जा वि हु चिट्ठइ ।
 वाई एसो कए मुग्ग-पागे कंकडुओ जहा ॥ ५९१ ॥
 एगंमि अजिए वच्छ ! सव्वं पि अजिअं भवे ।
 एगवरं सई लुत्त-सीला असई सव्वया ॥ ५९२ ॥
 लाडा दूर-गया य वाइ-णिवहा मोणंसिया मालवा
 मूयाभा मगहा गया गयमया गज्जंति नो गुज्जरा ।
 कासीरा पणया पलायणगरा जाया तिलंगोद्भवा
 विस्सेया वि स नत्थि जो हि कुणइ वायं मया संपयं ॥ ५९३ ॥

शार्दूलविक्रीडित-वृत्तम्

किण्ह-सप्पस्स मंडूओ चवेडं दाउमुज्जुओ ।
 मूसो दंतेहिं मज्जार-दट्ठा पायाय सायरो ॥ ५९४ ॥

सिंगेहिं वसहो सग्गि-गयं हंतुं समीहये ।
 हत्थी पव्वय-पायाय दंतेहि जयए रया ॥ ५६५ ॥
 ससओ केसरिक्खंधा केसरे लाउमीहए ।
 मद्दिडीए वि जं एसो सव्वण्णुत्तं पभासए ॥ ५६६ ॥
 समीराभिमुहत्थेण दव्वग्गी जालिओमुणा ।
 कवि-कच्छुलया देहे सुहायालिंगिया नणु ॥ ५६७ ॥
 सेस-सीस-मणिं लाउं हत्थो सीओ (स्वीयः) पसारिओ ।
 सव्वण्णाडोवओऽणेण जमहं परिकोविओ ॥ ५६८ ॥
 ताव गज्जइ खज्जोओ ताव गज्जइ चंदमा ।
 उडए दिणेसरंमि न खज्जोओ न चंदमा ॥ ५६९ ॥
 लक्खणे मम दक्खत्तं साहिच्चे संहिया मई ।
 तक्के कक्कसया निच्चं कत्थ सत्थे न मे समो ॥ ६०० ॥
 इच्चाइ वड्ढा णं सिग्घं वाय-पलिच्छया ।
 छाय-पंच-सई-पट्टमाण-सार-गुणुक्करो ॥ ६०१ ॥
 सरस्सईगलोद्दामाभरण ! वाइसत्तम !
 तं वाइ-कंद-कुद्दाल ! जस विण्ण-सरोमणे ! ॥ ६०२ ॥
 इच्चाइ बिरुदेहिं च धुव्वमाणो पए पए ।
 वीरं दट्ठुं च सोवाण-ठिओ चिंतेइ विम्हिओ ॥ ६०३ ॥
 किं चंदो ? नो कलंक-संजुओ दिणेसरो न सो जेण ।
 अइतिक्ख-करो ता किं वासवो सो सहस्सक्खो ॥ ६०४ ॥
 किं सोवण्णगिरी ! अइकढिणो सो जए समक्खाओ ।
 हुं नायं वड्ढमाणो सिद्धत्थ-सुओ तिजयपुज्जो ॥ ६०५ ॥ *
 आइच्चमिव दुप्पिक्खं समुद्धमिव दुत्तरं ।
 बीयक्खरमिवाचच्चं दट्ठुं वीरं महोदयं ॥ ६०६ ॥
 कहं मए महत्तं हा ! रक्खणीयं पुरज्जियं ।
 पासायं कीलियाहेउं भेतुं को नाम वंछइ ॥ ६०७ ॥
 हे इंदभूइ गोयम ! सागयमुत्ते जिणेण चिंतेइ ।
 नामं पि मे वियाणइ अहवा को मं न याणेइ ॥ ६०८ ॥

सागय पुच्छणे सोऽहं मिट्ट-वक्केहिं नो पिए।
 तं कपित्थं न जं सिग्गं वाएण पडइ दुमा॥६०६॥
 जइ वा हिययगयं मे संसयं भण्णिज्ज अहवा छिण्णिज्जा।
 तो हुज्जो विम्हओ मे इयं चिंतंतो पुणो भणिओ॥६१०॥
 किं मण्णि अत्थि जीवो ऊयाहु नत्थित्ति संसओ तुज्झं।
 वेय-पयाण य अत्थं न याणसि तेसिमो अत्थो॥६११॥
 समुदो महमाणो किं ? गंगा-पूरोहवा किमु ?
 आइ-बम्ह-झुणी किं वा वीर-वेय-झुणी तहा॥६१२॥
 वेय पयाणि-

स एव अयं आया नाण-वम्ह-मओ हिय।
 मणोमओ वक्कमओ सो य चक्खुमओ तहा॥६१३॥
 तह आगासमओ वा वाउ-तेउमओ वि य।
 पुढवी आउमओ वा वि कहे वम्हमओ तहा॥६१४॥
 द-द-द च दमो दानं दया इत्ति य जाणइ।
 जो द-गार-तियं सो य जीवो निच्छयओ मुण॥६१५॥

इइ जीव-सत्ता

छिण्णंमि संसयंमि जिणेण जर-मरण-विप्पमुक्केण।
 सो समणो पव्वइओ पंचहिं सह खंडियसएहिं॥६१६॥ इति प्रथमं गणधरः।
 तं पव्वइयं सोउं चिंतइ तब्बं धवो परो एवं।
 अवि जाओ य दवइ गिरी पज्जलइ जलं पि कत्थ वि य॥६१७॥
 अंगार-वरिसणं वा भवइ कया चंद-मंडलाओ य।
 न हु मे भाया वाए पराहवं लहइ कइया वि॥६१८॥
 तं पव्वइयं सोउं बीओ आगच्छइ अमरिसेणं।
 गच्छामि तमाणेमि पराजिणत्ताण तं समणं॥६१९॥
 छलिओ छलाइणा सो मण्णे मा इंदजालिओ वा वि।
 को जाइ कह-वत्तं इत्ताहे वट्टमाणी से॥६२०॥
 सो पक्खंतरमेगंपि जाइ जइ मे तओ मि तस्सेव।
 सीसत्तं हुज्ज गओ वुत्तुं पत्तो जिण सगासं॥६२१॥

हे अग्निभूय ! गोयम ! सागयमुत्ति जिणे चिंतेइ ।
 नामं पि मे वियाणइ अहवा को मं न याणेइ ॥ ६२२ ॥
 जइ वा हियय-गयं मे संसय मणिज्ज अहव छिणिज्जा ।
 तो हुज्ज विम्हओ मे इय चिंतंतो पुणो भणिओ ॥ ६२३ ॥
 किं मणि अत्थि कम्मं उयाहु न छित्ति संसओ तुज्झं ।
 वेय-पयाण य अत्थं न याणसि तेसिमो अत्थो ॥ ६२४ ॥
 एवं वेय-पयाइ कमेण पडिबोहिया जिणवरेणं ।
 इक्कारस वि गणहरा पव्वइया सपरिवारजुया ॥ ६२५ ॥

इति गणधर-वादः ॥

जं रयणिं च णं समणे भगवं महावीरे कालगए जाव सव्व-दुक्खप्पहीणे,
 तं रयणिं च णं जिट्ठस्स गोयमस्स इंदभूइस्स अणगारस्स अंतेवासिस्स नायए
 पिज्जबंधणे वुच्छिण्णे अणंते अणुत्तरे जाव केवलवर-नाण-दंसणे
 समुप्पणे ॥ १२७ ॥

सिरिगोयमो य भयवं चउनाणी सव्वलद्धिसंजुत्तो ।
 समत्त-सुयनाणधरो बालुव्व जिण-समीव-गओ ॥ ६२६ ॥
 जिणदेसणाइ बुद्धा पव्वइया दो वि साल-महसाला ।
 निय-भायणिज्ज-कुमरं गागिलं ठाविउं रज्जे ॥ ६२७ ॥
 ते अण्णया कयाइ आपुच्छित्ता य जिणवरं पत्ता ।
 सिरिगोयम-संजुत्ता विहरंता पिट्ठचंपाए ॥ ६२८ ॥
 पिढर-जसोमइ-गागिला पमुहा पत्ता य तेसि नमणत्थं ।
 वंदित्ता उवविट्ठा गोयमो देसणा देई ॥ ६२९ ॥
 धम्मं सुच्चा बुद्धो गागिलीदत्त-पुत्त-रज्जो य ।
 माया-पिय-संजुत्तो निक्खंतो गोयम-समीवे ॥ ६३० ॥
 तो ते चलिया सिरिवीर-वंदणत्थं च मग्गि गच्छंता ।
 ते धण्णं मण्णंता अण्णणं केवली जाया ॥ ६३१ ॥
 मुणि-जुत्तो सिरिगोयम सामी पयाहिणं जिणवरिंदस्स ।
 दाउं अग्गे चिट्ठई केवलि-परिसाइ ते पत्ता ॥ ६३२ ॥

सिरि-गोयमो य पभणइ एह खामेह जिणवरं भो! भो!
 तो भणइ जिणवरिंदो मा आसाएहि केवलिणो॥६३३॥
 आउट्टो खामेइ चिंतइ मे नत्थि केवलं नाणं।
 भणइ जिणो जो वंदइ अट्ठावय-जिणे ससत्तीए॥६३४॥
 सुद्धा जिणमापुच्छिय अट्ठावय-जिणवराण नमणत्थं।
 चलिओ गोयम-सामी,—तप्पढमं तावसा सुणिउं॥६३५॥
 पढमं बिइयं तइयं संपत्ता मेहलं ति-भेया य।
 दिण्ण-कोडिण्ण-सेवाल-नामा पासंति इज्जंतं॥६३६॥
 पिच्छंताण वि तेसिं चडिओ ते विम्हिया भणंति य।
 कुव्वेमो गुरुमेयं वलमाणं तं नमंति य॥६३७॥
 अम्हे तुम्हं सीसा तो ते सव्वे वि दिक्खिया मुणिणा।
 पारण-परिसाए-जिणदंसणेण ते पत्ता केवलं सव्वे॥६३८॥
 पायाहिणं करित्ता केवलि-परिसाए ते गया सव्वे।
 पुव्वं व भणण वारण महक्खेयं जिणवरो भणइ॥६३९॥
 पुव्व-भव-नेह-कारण मुइत्ता भणइ मा कुणसु खेयं।
 इत्तो अहं तुमं ही अंते तुल्ला भविस्सामो॥६४०॥
 स-निव्वाण-समयंमि पेसिओ गोयमो जिणवरिदेण।
 जा देवसम्म पुच्छिय वलिओ देवाण सुणइ रवं॥६४१॥
 वीर-जिणंदो पत्तो निव्वाणं गोयमो इमं सुद्धा।
 वज्जाहय व्व पडिओ धरणीयले चेयणा-रहिओ॥६४२॥
 खणमिक्कागय-सण्णो कुणइ विलावं च वीर! वीर! पहु।
 मं मुत्तूणं चलिओ जुत्तं न कयं तए सामी!॥६४३॥
 पसरइ मिच्छत्त-तमं गज्जंति कुत्तित्थ-कोसिया अज्ज।
 दुभिक्ख-डमर-वेराइ निसायरा हुंति सप्पसरा॥६४४॥
 अत्थमिए जयसूरे मउलेइ तुमंमि संघ-कमलवणं।
 उल्लसइ कुमय-तारा-नियरो वि हु अज्ज जिणवीर!॥६४५॥
 तमगसि य ससि व्व नहं विज्झाय पईव यं व निसि भवणं।
 भरहमिणं गयसोहं जाय-मणाहं च पहु! अज्ज॥६४६॥

हा! हा! किं वीर! कयं इमंमि समयंमि जं कओ दूरे।

किमाडयं मंडिता बालुव्व अंचलि-लिगिस्सं? ॥ ६४७ ॥

किं केवल-भागमह मग्गिस्सं? अहव कित्तम-सिणेहो।

तव भारो वाऽभूवं हा! हा! विस्सारिओ तेण ॥ ६४८ ॥

कस्सग्गे संदेहे पुच्छिस्सामि ति विलवइ एवं।

हुं हुं नायं नायं असिणेहा वीयरगा य ॥ ६४९ ॥

इय ज्ञायंतो पत्तो एगत्त-भावणं तह य सुहज्झाणं।

पावइ केवलनाणं केवल-महिमं कुणइ इंदो ॥ ६५० ॥

मुख-मग्ग-पवण्णाणं सिणेहो वज्जसंखला।

वीरे जीवंतए जाओ गोयमो जंण केवली ॥ ६५१ ॥

तेणं कालेणं तेणं समएणं समणे भगवं महावीरे तीसं वासाइं
अगार-वास-मज्झे वसित्ता, साइरेगाइं दुवालस वासाइं छउमत्त-परियागं पाउणित्ता,
देसूणाइं तीसं वासाइं केवलि-परियागं पाउणित्ता, बायालीसं वासाइं
सामण्ण-परियागं पाउणित्ता, बावत्तरिं वासाइं सव्वाउयं पालइत्ता, खीणे
वेयणीज्जाउय-नाम-गुत्ते इमीसे ओसप्पिणीए दुसम-सुसमाए समाए बहुविइक्कंताए
तीहिं वासेहिं अद्धनवमेहि य मासेहिं सेसेहिं पावाए मज्झिणं हत्थिवालस्स
रण्णो रज्जुगसभाए एगे अबीए छट्ठेणं भत्तेणं अपाणएणं साइणा नक्खत्तेणं
जोगमुवागएणं पच्चूस-काल समयंसि संपलियंक-निसण्णे पणपण्णं अज्झयणाइं
कल्लाण-फल-विवागाइं पणपण्णं अज्झयणाइं पाव-फल-विवागाइं, छत्तीसं च
अपुट्ठ-वागरणाइं वागरित्ता पहाणं नाम अज्झयणं विभावेमाणे विभावेमाणे
कालगए विइक्कंते समुज्जाए छिण्ण-जाइ-जरा मरणबंधणे सिद्धे बुद्धे अंतगडे
परिणिव्वुडे सव्वदुक्खप्पहीणे ॥ १४७ ॥

सामिणो मोक्ख-समयं वियाणित्ता सुरेसरगणेसा।

आसण-पकंपणाओ समागया तत्थ सव्वेऽवि ॥ ६५२ ॥

इत्थंतरंमि सक्को अंसुय-पुण्णच्छिओ भणइ एवं।

तीसइमो भस्स-गहो दो-वास-सहस्स-ठिइओ य ॥ ६५३ ॥

जम्म-नक्खत्ते तुह संकंतो तेण तुमं पडिक्खेहि ।
 मुहुत्तमेगं भगवं जेण मुहंतस्स विफलेइ ॥ ६५४ ॥
 अण्णह संघ-पवीडा भविस्सइ तो भणेइ जिणनाहो ।
 जं भव्वं तं भवइ नण्णहा होइ कइया वि ॥ ६५५ ॥
 मेरुं दंडं काउं पुहुविं छत्तं सक्क-सुसमत्था ।
 लोयमलोए खित्तुं न समत्था आउं संकमणे ॥ ६५६ ॥
 संघेउमिक्कसमयं आउस्स य जिणवराइ को न खमो ।
 जिणसासण-राएणं भासणं सक्क ! ते जुत्तं ॥ ६५७ ॥
 पंच हस्सक्खरुच्चारमिय कालेण तेण उ ।
 ज्ञाणेणं चउत्थेणं मुखं पत्तो महावीरो ॥ ६५८ ॥
 जम्मण-महव्वनिव्वाण-महं पकुव्वंति सव्व-देविंदा ।
 जंबूदीव-पण्णत्ती-भणियं सव्वं वियाणेह ॥ ६५९ ॥

इति श्री वीर-चरितम्.....

सेसं तहेव, नवरं जम्मणं पासाभिलावेणं भाणियव्वं जाव तं होउ णं
 कुमारे पासे नामेणं ॥ सूत्र १५४ ॥

धाइहिं इंद-दिट्ठाहिं लालिजंतो जिणाहिवो ।
 वद्धंतो अंकमंके य रायाणं संचरं सया ॥ ६६० ॥
 नव-हत्थ-पमाणंगो कमा पावइ जोव्वणं ।
 इओ कुसत्थलस्सामी पसेणजी महीवई ॥ ६६१ ॥
 पभावई सकण्णं च गिण्हित्ता आगओ सयं ।
 भणइ अस्ससेणो विरत्तो कुमरो सया ॥ ६६२ ॥
 तहा वि तेऽवरोहेण कारिस्सं पाणि-पीडणं ।
 पासं करे गहिता य, वच्छ ! पाणिग्गहं कुरु ॥ ६६३ ॥
 कुमारो भणइ ताय ! जाणेऽहं नेव सुंदरं ।
 अविप्पहीण-पावस्स मूलं भव-तरो इमं ॥ ६६४ ॥
 भोग-कम्म-खयत्थं च पिउ-आणाइ पालणं ।
 कायव्वं च मए एवं णच्चा सामी विवाहिओ ॥ ६६५ ॥
 अण्णया पहू पासाए वायायण-संठिओ ।
 निग्गच्छंते पुरी-मज्झा नायरे पासइ जिणो ॥ ६६६ ॥

पुष्पाइ पुष्प-हृत्ये य नच्चा तं चलियो पहु।
 कोउगा तत्थ संपत्तो पासइ कठ [कमठ]-तावसं॥६६७॥
 पंचगि-कड्ड-कुब्बंतं संबोहइ जिणेसरो।
 अहो अण्णाणमण्णाणं तत्तं जाणासि नो तुमं॥६६८॥
 दया नत्थि तवे जम्मि सो तवो उ निरत्थओ।
 विणा जलं नई चंदं निसा वासं विणा घणं॥६६९॥
 न सोहंते जहा एए तहा धम्मो दयं विणा।
 किवा नई महातीरे सव्वे धम्म-तणंकुरा॥६७०॥
 तीए सोसमुवेयाए नंदंति कह ते चिरं?।
 अहो! तवस्सि! तं मूढ! धम्मतन्नं न याणसि॥६७१॥
 महारंभ-रओ इत्थं कड्डं किं कुणसि मुहा।
 सव्वे वेया न कुब्बंति सव्वे जण्णा य भारय!॥६७२॥
 सव्वे तित्थाभिसेया य जं कुज्जा पाणिणं दया।
 जो देइ गो-सहस्साणि अओ जीव-दया वरो॥६७३॥
 कविलाणं सहस्सं तु जो दियाण पयच्छइ।
 एगस्स जीवियं दिज्जा कलं नग्घइ सोलसं॥६७४॥
 हेम-धेणु-धराईणं दायारो सुलहा भुवि।
 दुल्लहो पुरिसो लोए जो जीवाभय दायगो॥६७५॥
 एगओ जण्णया सव्वे समग्ग-वर-दक्खिणा।
 एगओ भय-भीयस्स पाणिणो पाण-रक्खणं॥६७६॥
 जूया मंकुण डंसादि जे पाणी तणु पीडए।
 पुत्तु व्व परिरक्खंति ते नरा सग्ग-गामिणो॥६७७॥
 भो! भो! तावस! एवं अण्णाण कड्डं पकुब्बमाणो य।
 धम्मस्स लेसमवि तं न याणसि सव्वहा णूणं॥६७८॥
 छाय-तवाणमंतर-मुज्जोयंधारयाण जा च इयं।
 जीव-दया-हिंसाणं अंतरं तत्तियं जाण॥६७९॥
 इय सुच्चा भणइ कठो जाणंति रायपुत्तया सव्वे।
 गयमाइ-कीलावण ममारिसा तावसा धम्मं॥६८०॥

निय-पुरिसेहिं कुंडा कट्टं आगरिसियं दुहा य कयं ।
 जा ता तम्मज्झाओ निग्गओ विह्वलो सप्पो ॥ ६८१ ॥
 दावेइ य नवकारं निय-पुरिसेहिं च तस्स सो भयवं ।
 जिण-दंसण नवकारप्पभावओ आसि धरणिंदो ॥ ६८२ ॥
 अहो नाणं कुमारस्स अहो बुद्धी अहो कला ।
 एवं थुओ जणोहेहिं गिहं सामी गओ तओ ॥ ६८३ ॥
 विसेसा जायए माणो कट्टं किच्चा विसेसओ ।
 जाओ भवणवासीसु मेघमाली सुरो तया ॥ ६८४ ॥

पासे णं अरहा पुरिसादाणीए तेसीइं राइंदियाइं निच्चं वोसट्ठकाए
 चियत्तदेहे जे केइ उवसग्गा उप्पज्जंति, तं जहा दिव्वा वा माणुस्सा वा
 तिरिक्ख-जोणिआ वा, अणुलोमा वा पडिलोमा वा, ते समुप्पण्णे सम्मं सहइ
 खमइ तितिक्खइ अहियासेइ ॥ सूत्र १५८ ॥

दिक्खं पडिवज्जित्ता विहरमाणो य अण्णया भयवं ।
 तवसि-गिहासण-कूव-निग्गोह-मूले ठिओ पडिमं ॥ ६८५ ॥
 इत्थंतरंमि देवो अमरिसंधो समागओ तत्थ ।
 जिणवरमुवद्दवणत्थं विउव्विया तेण वेयाला ॥ ६८६ ॥
 सद्दूल-विच्छिया वि य तेहिं न खुद्धो जया य सो सामी ।
 ताहे मेह-समूहे विउव्वइ काल-वण्णाभे ॥ ६८७ ॥
 वरिसंतेहिं तेहिं चडियं नीरं जिणस्स जा नासं ।
 इत्थंतरंमि चलियं धरणिंदस्सासणं सिग्घं ॥ ६८८ ॥
 आगच्छइ य तुरंतो जिणवर-पासंमि धरइ फणच्छत्तं ।
 अह सिंघासण-मंडिय अग्गे रंभा पणच्चंति ॥ ६८९ ॥
 ओहीए पासित्ता वरिसंतं मेघमालिणं देवं ।
 रोसेण धमधमंतो हक्कारेइ य धरणिंदो ॥ ६९० ॥
 रे! दुट्ठ! किमारद्धं अयाणमाणेण जिणवरिंदस्स ।
 पुव्वं दत्तोऽणेण हिओवएसो न ते रुइओ ॥ ६९१ ॥
 ऊसर-पुढवीए जहा जायइ लवणा य मिट्ठमवि वारि ।
 सामिस्स सेवगोऽहं अओ परं नो सहिस्सामि ॥ ६९२ ॥

तो भीओ खामेइ पाए पडिऊण जिणवरिंदस्स ।
 संहरइ मेह-पडलं पणमिय पत्ता नियं ठाणं ॥ ६६३ ॥
 सिवपुरीए दिण-तियगं छत्तं धरियं जिणस्स सीसे जं ।
 अहिणा तो सा जाया अहिच्छत्ता नामओ नयरी ॥ ६६४ ॥

इति श्री पार्श्वजिन-चरित्रम् ॥

तेणं कालेणं तेणं समएणं अरहा अरिट्ठनेमी जे से वासाणं पढमे मासे
 दुच्चे पक्खे सावण-सुद्धे तस्स णं सावणसुद्धस्स पंचमी-पक्खे णं नवण्हं मासाणं
 जाव चित्ताहिं नक्खत्तेणं जोगमुवागएणं आरोग्गा आरोग्गं दारयं पयाया ॥
 जम्मणं समुद्धविजयाभिलावेणं नेयव्वं, जाव तं होउ णं कुमारे अरिट्ठनेमी
 नामेणं ॥ अरहा अरिट्ठनेमी दक्खे जाव तिण्णि वाससयाइं कुमारे
 अगारवासमज्झे वसित्ता णं पुणरवि लोगंतिएहिं जीअकप्पिएहिं देवेहिं तं चेव
 सव्वं भाणियव्वं जाव दाणं दाइयाणं परिभाइत्ता ॥ सूत्र १७२ ॥

नव नव करुच्च-भूगय बारस-कर-पिहुल-पवरवप्पाए ।
 नव जोयण पिहुलाए तह बारस जोयणायायाए ॥ ६६५ ॥
 धणवइ-विणिम्मियाए बारवईए य पहाणनयरीए ।
 छप्पण्णब्भंतर-बहि बिसयारि कुलकोडिवासाए ॥ ६६६ ॥
 समुद्धविजयाइ य दस दसार-बलदेव-पमुह-पण-वीरा ।
 उग्गसेणाइ सोलस सहस्स भूमीहरा पहाणयरा ॥ ६६७ ॥
 अद्धुड्डकोडि-पञ्जुण-पमुहकुमारा तह य संबाइ ।
 दुद्धंत-कुमार तह वीरसेणाइ वीर बार सहस्सा ॥ ६६८ ॥
 इच्चाईहिं जुत्तो सिरि कण्हो कुणइ रज्जमइगुरुयं ।
 तदणुजो य सिरिनेमी आबाला बंभयारी जो ॥ ६६९ ॥
 विसयसुह-निप्प[प्पि?]वासो रमइ जिणो पवरकुमार-परिवरिओ ।
 अहऽण्णया कयाइ पभणइ जणणी सिवा-देवी ॥ ७०० ॥
 वच्छ! पमोयं मे कुरु विवाह-करणेण तो भणइ य जिणो ।
 जइया लभिस्सं कण्णं जुगं तइया करिस्सामि ॥ ७०१ ॥
 एवं वुत्ते माया जुग-कण्णाभिलासुओ एसो ।
 संतुड्डा गमइ दिणे जिणोवि कीलापसत्तो य ॥ ७०२ ॥

अण्णंमि दिणे पत्तो स वासुदेवस्स जाणसालाए ।
 कीलंतो कुमर-जुओ चक्कं दिट्ठं तहिं पढमं ॥७०३॥
 जाव य गहेइ हत्थे ता वारइ जाणसालिओ भयवं ।
 कण्हं विणा न सक्को कोऽवि हु उप्पाडिउं एयं ॥७०४॥
 कोउयओ सिरिनेमी अंगुलियग्गे तयं गहेऊणं ।
 भामेइ य पहड्डो कुलाल-चक्क व्व जिणनाहो ॥७०५॥
 चावं मिणाल व दलं जेण सयं नामियं सलीलाए ।
 कोमोयगी य सुगया जिड्डिव्वोप्पाडिया जेण ॥७०६॥
 नियबाहुतरुवरंमि य साहसिरिं पाविया भमाडित्ता ।
 संका-रहियेण तया अणंतबलजुत्ताएणं च ॥७०७॥
 तो संखं पुरेउं जा गिण्हइ जिणवरो निवारेइ ।
 सो जाणसालिओ वि हु सामी रक्खेहि माहणं ॥७०८॥
 अइकट्ठेणं कण्हो पूरेइ महव्वलो वि जं एयं ।
 ता कह तुमं तु बालो होसि समत्थो य पुरेउं ॥७०९॥
 तो लीलाए गहिओ पवाइओ तह य सामिणा सिग्घं ।
 तस्सऽभिनाएण तओ भग्ग-खंभा गया नट्ठा ॥७१०॥
 उब्बंधणा य तसिया हयवरा कंपियाधरा विहुरा ।
 बहिरं विस्सं जायं जाया चिंता बल-हरीणं ॥७११॥
 चलिया य सेलनाहा विचलिय-निलया य भीइभीया य ।
 तिसिया देविंदा वि हु मुच्छियं जायविंदेहिं ॥७१२॥
 एवं चक्क-गया-धणु-संखाणं विलसियं वियाणित्ता ।
 जा चिट्ठंति हरि-बला कीलंतो आगओ नेमी ॥७१३॥
 कण्हो निय-उच्छंगे विनिवेसित्ता य नेमिकुमरवरं ।
 पुच्छए तुमए भाउय ! किं विहियं चक्क-भमणाइ ? ॥७१४॥
 आमं मए य विहियं ताहे चिंतेइ संकिओ कण्हो ।
 किं एसो चक्क-हरी उप्पण्णो अभिनवो नूणं ॥७१५॥
 स-गोरवं पयंपइ संखमिमं पूरिउं न कोवि खमो ।
 मं मुत्तूण भाउय ! अहो ! बलं उत्तमं तुज्झ ॥७१६॥

पुव्वंपि मए दिट्ठं जरासंधस्स संगरे पगामं ।
 कोउहलमत्थि महं बाहुबल-पिक्खणे वच्छ ! ॥ ७१७ ॥
 सो परिगर-बंधजुओ जाओ जा जिणवरो वि चिंतेइ ।
 पयइ-दयावरो पहू न समत्थो एस मह पुरओ ॥ ७१८ ॥
 मह बाहुणाऽऽक्कमेण वा अक्कंतो कह हविस्सइ कण्हो ।
 ता जह न जाइऽणत्थं मह-भुय-थामं वियाणेइ ॥ ७१९ ॥
 तह कज्जं कायव्वं वियारिऊणं च भणइ जिणचंदो ।
 हे नारायण ! भाउय ! कह जुत्तं तुह समं मज्झं ॥ ७२० ॥
 पागय-जण-जुद्धमिणं नियभुज-नमणेण किज्जइ परिक्खं ।
 तो कण्हेणं बाहा पलंबिया तक्खणेणं च ॥ ७२१ ॥
 तं वालेइ जिणंदो पउम-नालुव्व लंबिया सबाहा ।
 कण्हो सव्व-बलेणं नामेइ सा पुणो न नमइ ॥ ७२२ ॥
 तो सिरि-नेमि-जिणेणं पायव-साहाए मक्कडुव्व तया ।
 अंदोलिओ हरिसो कुतूहला संकिओ हियए ॥ ७२३ ॥
 कण्हो भणेइ रामं एवं बलो किं न साहए भरहं ।
 भणइ बलो संति मुत्ती पसण्ण-वयणो समत्थोऽवि ॥ ७२४ ॥
 तो वि ससइको कण्हो वसंतसमये समग्ग-थी-जुत्तो ।
 खिल्लइ खडोखलीए सद्धिं सिरिनेमिनाहेणं ॥ ७२५ ॥
 नेमिं विवाह-कज्जे मण्णावेहत्ति सिक्खवित्ताणं ।
 निय-अंगणाओ कण्हो झत्ति गओ रज्ज-मज्झंमि ॥ ७२६ ॥
 राई-रुप्पिणि-भामा पमुहा कीलंती नेमिणा सद्धिं ।
 सिंगीजलेहिं सामी सिंहासणेयं निवेसंति ॥ ७२७ ॥
 किं देवर ! कीवोऽसि अहवा अदक्खो व नीरसो वाऽसि ।
 कहसु तुमं अम्हाणं थी-निव्वाहाओ वा भग्गो ॥ ७२८ ॥
 तुह भाया अम्हाणं जह चिंता कुणइ तह तुह बहुस्स ।
 नूणं करिस्सइ हरी नो चिंता काऽवि कायव्वा ॥ ७२९ ॥
 पत्तिं विणा य कालं गमेसि तमरण्ण-कुसुममिव सव्वं ।
 जाणाहि निष्फलं पहू इच्चाइ बहु भणंति तया ॥ ७३० ॥

किञ्चा विवाह किञ्चं भोइत्ता बहुविहे विसयभोए ।
 पढम-जिणो निक्खंतो किं तुमसि य नूयणो भिक्खू ॥७३१॥
 पियरो भायरो सव्वे भाइ-जाया वयंपि य ।
 जाययामो विवाहाय कुरु एसिं समीहियं ॥७३२॥
 न केवलं सयममि, पडंति भव-सायरे ।
 अण्णाण मोह-सिलया पाडयंति परे वि हि ॥७३३॥
 वयमित्तेणाणुमंत-व्वं अहुणा सिं वयणं मया ।
 जहोइयं करिस्सामि समये तुण्हिको ठिओ ॥७३४॥
 माणियं माणियं ताहिं कहियं कण्हस्स सो तओ ।
 उग्गसेणस्स दुहियं पत्थेइ राइमइयं च ॥७३५॥
 पाणि-ग्गहण-निमित्तं कया य सव्वेहिं सव्व-सामग्गी ।
 कोडिगसो वर-गय-रह-तुरगारूढे कुमारवरे ॥७३६॥
 दड्ढुं भणंति सहीओ को नेमि एसु ताउ पभणंति ।
 इंदाणीकयलवणो सुरिंदकय-लुंछणो जो य ॥७३७॥
 मत्त-गयंदे चडिओ आयवत्ताइ सोहिओ जो य ।
 महाविच्छडेणपत्तो जो सो नेमी मुणेयव्वो ॥७३८॥
 इक्कु चिय रायमई वलया-मज्झंमि वण्णणिज्ज-गुणा ।
 जीसे नेमी करिस्सइ लावण्ण-निही करग्गहणं ॥७३९॥
 गवक्ख-संठियासु य सहीसु मज्झ ठिया य राईमई ।
 पस्संती नेमि-वरं चिंतइ नियहियय-मज्झंमि ॥७४०॥
 किं पायाल-कुमारो किं वा मयरज्झओ अह सुरिंदो ।
 मह चेव मुत्तिमंतो अह एसो पुण्णपब्भारो ॥७४१॥
 किं तस्स करेमि अहं अप्पाणं पि य निंछणं विहिणो ।
 निरुवम-सोहग्ग-निही एस पई जेण मह विहिओ ॥७४२॥
 इह आगओ पई मं परिणेउं तह वि हं न पच्चेमि ।
 पाविज्जइ पुण्णेहिं पुव्वकएहिं च एस वरो ॥७४३॥
 अवरं जणं न पिच्छइ इमंमि दिट्ठेऽवि पियसही अहुणा ।
 परिणियाए एयं उवलक्खिस्सइ न उण अम्हे ॥७४४॥

उवलक्खओ मा एसा इत्तिय-मित्तेण अम्ह संतोसो ।
 जइ एस पियसहिं पाणिग्गहणं कुणइ नेमी ॥ ७४५ ॥
 हद्धी सहिओ किं मे कारणं चक्खू दक्खिणं फुरइ ।
 सहिओ भणंति पडिहयममंगलं भवउ ते सुयणि ॥ ७४६ ॥
 इत्थंतरंमि नेमी पसूणमत्तस्सरं सुणित्ताणं ।
 हं हो ! दारुय एसो को सद्दो सवणदुक्खयरो ॥ ७४७ ॥
 सो भणइ सामि ! तुम्हं सयणाणं गोरवस्स कज्जेणं ।
 पसवो अमी वराया मीलिया संति भयभीया ॥ ७४८ ॥
 अहह सोऽयमसक्कं चरित्तमपवित्तचित्तवित्तीणं ।
 जे कुब्बंति निउच्छवमणुच्छवेणऽवर-जंतूणं ॥ ७४९ ॥
 तो सारहिं पयंपइ रहं नियत्तेहि सिग्घमेव इओ ।
 ता तत्थेगो हरिणो हरिणी-गीवं सगीवाए ॥ ७५० ॥
 मा पहरसु मा पहरसु ! एयं मह हियय-हारिणिं हरणिं ।
 सामी ! अज्ज मरणा वि दुस्सहो पिययमाविरहो ॥ ७५१ ॥
 हरिणी नेमि-मुहं चिय सुपसण्णं पासिउं इमं भणइ ।
 एसो पसण्ण-वयणो अकारणो उत्तमो बंधू ॥ ७५२ ॥
 ता विणहवेसु वल्लह ! रक्खत्थं सव्वजीवरासीणं ।
 तो मुह-मुद्धं किच्चा भणइ य हरिणो इमं वयणं ॥ ७५३ ॥
 निज्झरण-नीर-पाणं अरण्ण-तिण-भक्खणं च वणवासो ।
 अम्हाण निरवराहाणं जीवियं रक्ख रक्ख पहू ॥ ७५४ ॥
 एवं सव्वे पसवो कुणंति पुक्का-रवं तओ नेमी ।
 पसुरक्खिए पयंपइ मुंचह मुंचह इमे जीवे ॥ ७५५ ॥
 मोयावित्ता वलिओ नाओ य समुद्रविजय-पमुहेहिं ।
 खलिए रहे य नेमी भणइ इमं वयणमइदक्खं ॥ ७५६ ॥
 जह बंधणेहिं बद्धा एए तह वयं कम्मबंधेहिं ।
 तम्मोक्खत्थं दिक्खं अहं गहिस्सामि मोक्ख-पयं ॥ ७५७ ॥
 राईमई सुणित्ता तं वत्तं विगय-चेयणा पडइ ।
 धरणीयले य पच्छा आगय-सण्णा भणइ एवं ॥ ७५८ ॥

हा ! जायवकुलदिणयर ! हा ! निरुवम-निहाण ! हा ! !

जगस्सरण ! ! हा ! करुणायर ! सामी ! मं मुत्तूणं कहां चलिओ ? ॥ ७५६ ॥

सिवादेवी....

पत्थेमि जणणि-वच्छल ! वच्छ ! तुमं पढमं पत्थणं किंपि ।

काऊण पाणिग्गहणं मह दंसे नियवहूवयणं ॥ ७६० ॥

तो भणइ नेमिनाहो माय ! इमं मुंच पत्थणं राओ ।

नत्थित्थ माणुसीसु राओऽत्थि य मुत्ति-पमयाए ॥ ७६१ ॥

राजी...

हा ! हियय ! धिड्ड ! निट्ठर ! अज्ज वि निल्लज्ज ! जीवियं ।

वहसि ? ! अण्णत्थ बद्धराओ जइ नाहो अण्णो नाहो ॥ ७६२ ॥

सहीओ भणंति सहिय ! पिम्म-रहियंमि पिम्म-करणं किं ? ।

पिम्मपरं किं पि वरं अण्णयरं ते करिस्सामो ॥ ७६३ ॥

करेहिं पिहाय कण्णे भणइ राईमई असोयव्वं ।

तुम्हेहिं भासियं हा ! न भासियव्वं परं किंचि ॥ ७६४ ॥

जइ वि हु एयस्स करे मज्झ करो नासि परिणयण-काले ।

तह वि सिरे मह सुच्चिय दिक्खासमये करो होही ॥ ७६५ ॥

जइ कहवि पच्छिमाए उदयं पावेइ दिणयरो कइया ।

मुत्तूण नेमिनाहं करेमि नाहं वरं अण्णं ॥ ७६६ ॥

पभणइ समुद्धविजयो पूरेहि वच्छ ! मणोरहे अम्हं ।

नाभेयाइ-जिणिंदा मुत्ति पत्ता कयविवाहा ॥ ७६७ ॥

एगत्थि संगहे खलु बहुजीवसंघाय घायए ताय ! ।

तुम्हं विवाह-कज्जे नो जुत्तो आग्गहो एसो ॥ ७६८ ॥

एयंमि खणे पत्ता लोगंतिय सुरा जिणिंद-पासंमि ।

विण्णत्ति कुव्वंति भयवं तित्थं पवत्तेहि ॥ ७६९ ॥

इति श्री नेमि—चरित्रम् ॥

तं चेव सव्वं जाव देवा देवीओ य वसुहारवासं वासिंसु, सेसं तहेव
चारंगसोहण-माणुम्माणवद्धणउस्सुक्क-माइय-ट्टिइवडिय-जूयवज्जं सव्वं भाणिअव्वं
॥ २०६ ॥

जाईसरो य भयवं अप्पडिवडिएहिं तिहिं नाणेहिं ।
 कंतीहि य बुद्धीहि य अब्भहिओ तेहिं मणुएहिं ॥ ७७० ॥
 देसूणं च वरिसं सक्कागमणं च वंस-ठवणा य ।
 आहारमंगुलीहिं ठविति देवा मणुण्णं उ ॥ ७७१ ॥
 सव्वे वि तित्थगरा बालत्ते णो कुणंति थणपाणं ।
 आहारस्सऽभिलासे वयणे नियमंगुलि खिवंति ॥ ७७२ ॥
 नाना-रस-संजुत्तं तीए देवा मणुण्णमाहारं ।
 सिग्घं ठवंति भत्ता अइक्कंते बाल-भावंमि ॥ ७७३ ॥
 गिण्हंति अग्गि-पक्कं आहारं सेस जिणवरा निच्चं ।
 आपवज्जमुसहेण नाहारिओ अग्गि-पक्को य ॥ ७७४ ॥
 सक्को वंस-ठवणे इक्खूअ गूतेण हुंति इक्खागा ।
 जं च जहा जम्मि वए जोगं कासी य तं सव्वं ॥ ७७५ ॥
 पढमो अकाल-मच्चू तहिं तालफलेण दारओ पहओ ।
 कण्णा य कुलगरेणं सिट्ठे गहिया उसभ-पत्ती ॥ ७७६ ॥
 अह वड्ढइ सो भयवं दियलोयचुओ अणोवम-सिरिओ ।
 देव-गण-संपरिवुडो नंदाइ-सुमंगला-सहिओ ॥ ७७७ ॥
 भोग-समत्थं नाउं वरकम्मं कासि तस्स देविंदो ।
 दुह्णं वरमहिलाणं वहू-कम्मं कासि देवीओ ॥ ७७८ ॥
 छ-पुव्व-सय-सहस्सा पुव्विं जायस्स जिणवरिंदस्स ।
 तो भरह-बंभि-सुंदरि बाहुबली चेव जायाइ ॥ ७७९ ॥
 देवी सुमंगलाए भरहो बंभी य मिहुणयं जायं ।
 देवीए सुनंदाए बाहुबली सुंदरी चेव ॥ ७८० ॥
 अउणापण्णं जुयले पुत्ताण सुमंगला पुणो पसवे ।
 नीईणमइक्कमणे निवेयणं उसभसामिस्स ॥ ७८१ ॥
 हक्कारे मक्कारे धिक्कारे चेव दंड-नीईओ ।
 वुच्छं ताण विसेसं जहक्कमं आणुपुव्वीए ॥ ७८२ ॥
 पढम-विइयाण पढमा तइय-चउत्थाण अभिनवा बीया ।
 पंचम-छट्ठस्स य सत्तमस्स तइआ अभिनवाओ ॥ ७८३ ॥

सेसाओ दंडनीई माणवग-निहिओ हुंति भरहस्स।
 राया कोई दंडं सिट्ठे ते बिंति अम्ह विसोहो उ॥७८४॥
 मग्गह य कुलगरं सो बेई उसभो य भे राया।
 ॥७८५॥
 आभोएउं सक्को उवागओ तस्स कुणइ अभिसेयं।
 मउडाइ-अलंकारं नरिंद-जुग्गं च से कुणइ॥७८६॥
 भिसिणीपत्तेहि परे उदयं घित्तुं छुहंति पाएसु।
 साहुविणीया य पुरिसा विणीय-नयरी अह निविट्ठा॥७८७॥
 आसा हत्थी गावो गहियाइं रज्ज संगह निमित्तं।
 घित्तूण एवमाइ चउव्विहं संगहं कुणइ॥७८८॥
 उग्गा भोगा राइण्ण खत्तिया संगहो भवे चउहा।
 आरक्खि-गुरु-वयंसा सेसा से खत्तिया ते य॥७८९॥
 आसी य कंदाहारा मूलाहारा य पत्तहारा य।
 पुप्फ-फल-भोइणो वि य जइया किर कुलगरो उसभो॥७९०॥
 ओमं आहारित्ता अजीरमाणंमि ते जिणमुर्विति।
 हत्थेहिं घंसिऊण आहारेह ति ते भणिआ॥७९१॥
 आसी य पाणि-घंसी तिमिय तंडुल पवाल-पुडभोई।
 हत्थतल-पुडाहारा जइया किर कुलगरो उसभो॥७९२॥
 अगणिस्स य उट्ठाणं वणघंसा दट्ठु भीय परिकहणं।
 पासेसु परिछिंदह गिण्हह पागं च तो कुणह॥७९३॥
 पक्खेव-डहणमोसहि कहण निग्गमण हत्थि-सीसंमि।
 पयणारंभ-पविती ताहे कासी य ते मणुया॥७९४॥
 पंचेव य सिप्पाइं घड-लोह-चित्त-तत-कासवए।
 इक्किक्कस्स य इत्तो वीसं वीसं भवे भेया॥७९५॥
 लेहं लिवी विहाणं जिणेण बंभीइ दाहिण करेणं।
 गणियं संखाणं सुंदरीइ वामेण उवइट्ठं॥७९६॥

उसभे णं अरहा कोसलिए एगं वास-सहस्सं निच्चं वोसट्ठकाए चियत्तदेहे
 जे केइ उवसग्गा जाव अप्पाणं भावेमाणस्स इक्कं वास-सहस्सं वइक्कंतं तओ

णं जे से हेमंताणं चउत्थे मासे सत्तमे पक्खे फग्गुण-बहुले, तस्स णं
फग्गुण-बहुलस्स इक्कासी पक्खे णं पुव्वण्ह-काल-समयंसि पुरिमतालस्स नयरस्स
बहिआ सगडमुहंसि उज्जाणंसि, नग्गोहवरपायवस्स अहे, अट्टमेणं भत्तेणं
अपाणएणं, आसाढाहिं नक्खत्तेणं जोगमुवागएणं ज्ञाणंतरियाए वट्टमाणस्स
अणंते जाव जाणमाणे पासमाणे विहरइ ॥ २१२ ॥

चउरो साहस्सीओ लोयं काऊण अप्पणा चेव ।

जं एस जहा काही तं तह अम्हे वि काहामो ॥ ७६७ ॥

उसभो वर-वसह-गई धित्तूण अभिग्गहं परम-घोरं ।

वोसट्ठ-चत्त-देहो विहरइ गामाणुगामं तु ॥ ७६८ ॥

बहली-अडंबइल्ला जोणग-विसओ सुवण्णभूमी य ।

आहिंडिया भगवया उसभेणं तवं चरंतेणं ॥ ७६९ ॥

न वि ताव जणो जाणइ का भिक्खा केरिसा व भिक्खयरा ।

ते भिक्खमलभमाणा वणमज्झे तावसा जाया ॥ ८०० ॥

नमि-विनमीणं जायाण नाणिंदो विज्जदाण-वेयट्ठे ।

उत्तर-दाहिण-सेढी सट्ठी-पंचास नयराइं ॥ ८०१ ॥

कच्छ-महाकच्छ-सुया जिणपयकमलं पहाण-कमलेहिं ।

पूयंति पइदिणं पिया रज्ज-पओ भवइ य भणंति ॥ ८०२ ॥

चलियासणो समेओ धरणिंदो तत्थ सामि-भत्ति-परे ।

दट्ठुं भणेइ भरहं मग्गह ते बिंति नो एवं ॥ ८०३ ॥

तुट्ठो अप्पइ विज्जा अडयाल सहस परिमिया तेसिं ।

वेयट्ठगिरिवरंमि सट्ठी-पण्णास-नयराइं ॥ ८०४ ॥

भयवं अदीण-मणसो संवच्छर मणसिओ विहरमाणो ।

कण्णाहिं निमंतिज्जइ वत्थाभरणासणेहिं च ॥ ८०५ ॥

अह गयपुरंमि बाहुबलि-सुय-सोमजसस्स सेयंसो ।

पुत्तो सुमिणे पासइ विमलो मेरू मए विहिओ ॥ ८०६ ॥

सत्तुक्कंतो सुहडो सेयंस-पभावओ जई जाओ ।

एवं दिट्ठं सुमिणे सिरिसोमजस-नरवरेणाऽवि ॥ ८०७ ॥

रवि-मंडलओ भट्टो करुक्करो ठाविओ पुणो तत्थ ।
 सिरि-सेयंस-कुमारेण सिट्ठी पासइ सुमिणमेवं ॥ ८०८ ॥
 रायसहाए कहियं तेहिं मिलिएहिं भावि किंपि सुभं ।
 सेयंस-कुमारस्स इय भणिउं गया य सट्ठाणं ॥ ८०९ ॥
 पइगेहं भमइ जिणो परं भमतो न लेइ किंपि तहिं ।
 कोलाहलं नराणं सुट्ठा सो धावइ सहसा ॥ ८१० ॥
 जाव जिणिंदं पासइ ता सुह-झाणेण जाइसरणं से ।
 उप्पणं ता ढोयइ, इक्खुरसं सामिणो सुद्धं ॥ ८११ ॥

अत्र कविः

दक्खिण-करं पसारइ जा सामी ता भणेइ सो एवं ।
 दायग-हत्थस्स अहो कहं भवामि ति मे कज्जं ॥ ८१२ ॥
 पूया-भोयण-संतिग-दाण-कला-पाणिगहण-कज्जेसु ।
 मह वावारो जुत्तो तो वाम-करं भणइ सामी ॥ ८१३ ॥
 वामोऽहं रणसम्मुह-अंकगणण जूयाइ कज्जेसु ।
 वामंग-सिज्ज करणे अग्गे कुव्वंति मं बाढं ॥ ८१४ ॥
 एवं विवायमाणे हत्थे पडिबोहिऊण वरिसंतं ।
 पच्चग्गेक्खु-रसेणं करेइ पहु पारणं तत्थ ॥ ८१५ ॥
 संवच्छरेण भिक्खा लद्धा उसभेण लोगनाहेण ।
 सेसेहिं बिय-दिवसे लद्धाओ पढम-भिक्खाओ ॥ ८१६ ॥
 घुट्टं च अहो दाणं ! दिव्वाणि य आहयाणि तूराणि ।
 देवा य संनिवइया वसुहारा चेव वुट्ठा य ॥ ८१७ ॥
 माइज्ज घड सहस्सा अहवा माइज्ज सागरा सव्वे ।
 एयारिस लद्धीजुओ सो पाणि-पडिग्गहो होइ ॥ ८१८ ॥
 भुवणं जसेण भयवं रसेण भवणं धणेण पडिहत्थं ।
 अण्णा निरुवम-सुखे सुपत्तदाणं महग्घ-वियं ॥ ८१९ ॥
 रिसहेस-समं पत्तं निरवज्जं इक्खुरस-समं दाणं ।
 सेयंस-समो भावो हविज्ज जइ मगियं हुज्जा ॥ ८२० ॥
 उसभस्स उ पारणये इक्खुरसो आसि लोगनाहस्स ।
 सेसाणं परमणं अमयरस-रसोवमं आसी ॥ ८२१ ॥

हट्टेहिं लोएहिं भणियं कहं जाणसि कुमार ! तुमं ।
 तो सेयंसो पभणइ पुव्वड्ढ-भवाइ-वुत्तंतं ॥ ८२२ ॥
 विहरंतो संपत्तो तक्खसिलासण्ण-वणंमि संझाए ।
 उज्जाण-पालगाओ विण्णायं सामि-आगमणं ॥ ८२३ ॥
 कल्लं सव्विह्मिणं पूइस्सामि त्ति चिंतिउं जाइ ।
 कल्ले जा तत्थ सामिं अपासमाणो कुणइ खेयं ॥ ८२४ ॥
 वंदित्ता जिणपाए धम्मचक्रं च ठावइ तत्थ वरं ।
 भयवं विहरइ गामाणुगामं सुहज्झाणसंजुत्तो ॥ ८२५ ॥
 वास-सहस्सं उग्गं तवमाइगरस्स आयरंतस्स ।
 जो किर पमाय-कालो अहोरत्तं ही संकलिओ ॥ ८२६ ॥
 विणीयाइ साहा-पुर-पुरिमतालंमि नाणमुप्पण्णं ।
 जमग-समगेहिं भरहो पमोइओ नाण-चक्केहिं ॥ ८२७ ॥
 पूयावसरे सरिसो दिट्ठो चक्कस्स तं पि भरहेणं ।
 विसमा हु विसय-तण्हा गुरुयाण वि कुणइ मइमोहं ॥ ८२८ ॥
 तायंमि पूइए चक्रं पि पूइयं पूयणारिहो ताओ ।
 इहलोइयं तु चक्रं परलोय-सुहावहो ताओ ॥ ८२९ ॥
 मरुदेवाए सहिओ गयमारूढो निगच्छइ भरहो ।
 जा देवज्झुणि-दुंदुहि-देसणं सुणइ मरुदेवा ॥ ८३० ॥
 सुच्चा जिणवर-महिमं हरिसागय-लोयणंसु परिगलियं ।
 नील-पडलं च तीए ता पिच्छइ समवसरणाइ ॥ ८३१ ॥
 धी धी सिणेह-करणं सद्धिं जीवाण मोह-वसगाणं ।
 जमहं दुक्खं पत्ता पुत्तो भुंजइ इमं रिद्धिं ॥ ८३२ ॥
 जाणेऽहं मह पुत्तो कह सीयायव-पवास-वणवासो ।
 निरवसणो गिरिकंदर-ठिओ गमेइ य किर कालं ॥ ८३३ ॥
 एरिसिमिद्धिं पत्तो मम नामं पि य न पुच्छइ कइया ।
 तह मम दुक्खं न मुणइ अस्स अहो वीयरगतं ॥ ८३४ ॥
 एगत्तभावणाए खणेण पत्ता तओ सुहज्झाणा ।
 संपत्त-केवल-सिरी सिद्धिं पत्ता य मरुदेवा ॥ ८३५ ॥

पढमो केवलि-महिमा देवेहिं कओ हड्डचित्तेहिं ।
 सोय-हरिसाउलो सो वंदइ भरहो जिणंदवरं ॥ ८३६ ॥
 पुत्तो सिरि उसह समो नासी विस्से य जो भमित्ताणं ।
 लद्धं केवल-रयणं समप्पियं माउए पढमं ॥ ८३७ ॥
 माया मरुदेवी-समा नो जाया जा गया विलोगत्थं ।
 निय-पुत्त-वरिय-वरमुत्ति-वहू-मुहंभोययं पढमं ॥ ८३८ ॥
 पंच य पुत्त-सयाइं भरहस्स य सत्त नत्तु य सयाइं ।
 सयराहं पव्वइया तंमि कुमारा समोसरणे ॥ ८३९ ॥
 बंभी वि पव्वईया सुरक्खिया सुंदरी य भरहेणं ।
 जं थी-रयणं पवरं भविस्सइ मज्झ इय भावा ॥ ८४० ॥
 भरहस्स परिभवाओ अडनवइ बंधवाओ निक्खंता ।
 बाहुबली पुण जुज्झं किच्चा पच्छा उ निक्खंतो ॥ ८४१ ॥
 पढमं दिट्ठी-जुद्धं वाया-जुद्धं तहेव बाहाहिं ।
 मुट्ठीहि य दंडेहि य सव्वत्थ वि जिप्पए भरहो ॥ ८४२ ॥
 लहु-बंधू कह वंदे केवलिणो तेण केवली होउं ।
 गच्छिस्सामि तओ हं पडिमाइ ठिओ य तत्थ मुणी ॥ ८४३ ॥
 वरिसंते पेसियाओ हत्थि-विलग्गस्स न केवलं होइ ।
 बंभी-सुंदरी-समणी भणंति एवं सुणइ सो य ॥ ८४४ ॥
 माण-गयंदे चडिओ जा उप्पाडेइ चिंतिउं पाए ।
 ता वरनाणं पत्तो पत्तो जिणपाय-नमणत्थं ॥ ८४५ ॥
 *ते चउलीसं लक्खा वीससहस्सा हवंति वरिसाणं ।
 चउण्ह जुग्गप्पमाणं चउक्कडीए पमाणमिणं ॥ ८४६ ॥
 एगा कोडी तेसड्डिलक्ख-तित्तीससहस्स तिण्णि सया ।
 तित्तीसा य तिभागो चउक्कडी-इक्कपुव्वंमि ॥ ८४७ ॥

★ १७,२८००० स.
 १२,६६००० त्रे.
 ८,६४००० द्वा.
 ४,३२००० कलिं.

त्रितालीस लाख वीस सहस्स वरसे चार युग प्रमाण ते चुकडी....

एगा कोडाकोडी लक्खा सगतीस हुंति कोडीणं ।
 वीस सहस्सा कोडी रिसहाओ चउक्कडी नेया ॥ ८४८ ॥
 अणुणद्धिसयसहस्सा सत्तावीसं भवे सहस्साइं ।
 चत्ता कोडाकोडी वासाणं उसभजिणमाउं ॥ ८४९ ॥

अङ्कतः ५६२७०४०,००,००,०००,००,०००

इति श्री आदिनाथ-चरित्रम्.....

तेणं कालेणं तेणं समएणं समणस्स भगवओ महावीरस्स नव गणा,
 इक्कारस गणहरा हुत्था ॥ सूत्र १ ॥

पंचण्हं पंच-सया अद्धुद्ध-सया य हुंति दुण्ह गणा ।
 दुण्हं तु जुयलयाणं तेसओ तिसओ हवइ गच्छे ॥ ८५० ॥
 सव्वे य माहणा जच्चा सव्वे अज्झावया विऊ ।
 सव्वे दुवालसंगी य सव्वे चउदस-पुव्विणो ॥ ८५१ ॥
 परिनिव्वुया गणहरा जीवन्ते नायएम वजणाओ ।
 इंदभूई सुहम्मो य रायगिहे निव्वुए वीरे ॥ ८५२ ॥
 मासं पाउवगया सव्वे वि य सव्वलद्धिसंपण्णा ।
 वज्जरिसहसंधयणा समचउरंसा य संठाणा ॥ ८५३ ॥

समणे भगवं महावीरे कासव-गुत्ते णं । समणस्स णं भगवओ महावीरस्स
 कासवगुत्तस्स अज्ज सुहम्मे थेरे अंतेवासी अग्गिवेसायण-गुत्ते ॥ १ ॥ थेरस्स
 मं अज्जसुहम्मस्स अग्गिवेसायण-गुत्तस्स अज्ज-जंबूनामे थेरे अंतेवासी कासव-गुत्ते
 ण ॥ २ ॥ थेरस्स णं अज्ज जंबूनामस्स कासवगुत्तस्स अज्जप्पभवे थेरे
 अंतेवासी कच्चायण-सुगुत्ते ॥ ३ ॥ थेरस्स णं अज्जप्पभवस्स कच्चायण-सगुत्तस्स
 अज्जसिज्जंभवे थेरे अंतेवासी मणगपिया वच्छ-सगुत्ते ॥ ४ ॥

सिरि-वीर-पट्ट-धारी सोहम-सामी य पंचमगणेशो ।
 कुल्लाग-संनिवेशे धम्मिल्ल-सुभद्विला पुत्तो ॥ ८५४ ॥
 पंचासइ वरिसन्ते दिक्खा तीसाणि वीरजिण-सेवा ।
 छउमत्थ-बार-वरिसा केवलं अट्ट-वरिसाणि ॥ ८५५ ॥
 वाससयं सव्वाउ य पालित्ता खीण-सव्व-कम्मंसो ।
 सिद्धिं पत्तो भयवं ठवित्तु जंबूमि निय-सुपयं ॥ ८५६ ॥

थेरस्स मं अज्जसुहम्मस्स श्री जंबूस्वरूपं चेदम् अग्निवेसायण-गुत्तस्स
अज्ज-जंबूनामे थेरे अंतेवासी कासव-गुत्ते ण ॥ २ ॥

रायगिहोसभ-धारिणी पुत्तो जंबू सुहम्म-गुरु-पासे ।
पडिवण्णो सीलवयं बालत्ते जाय-संवेगो ॥ ८५७ ॥
तायागहवसपरिणीय वरट्टकण्णाण बोहणं कुणइ ।
रत्तीइ तंमि समये पणसयचोरेहिं परिवरिओ ॥ ८५८ ॥
पत्तो पभवो चोरो खत्तं खणिऊण पविसइ जाव ।
सील-पभावा खुहिओ तो तेण वि बोहिओ सो वि ॥ ८५९ ॥
सगवीसाहिय-पणसय जुत्तो कयरुव्व सव्वमुज्झिता ।
निकखंतो य पभाए जंबूसामी महामुणीसो ॥ ८६० ॥
सोलस वासा गेहे वीसं छउमत्थ-काल-परियाओ ।
केवलि-चोयालीसं असीइ वरिसाइं सव्वाऊ ॥ ८६१ ॥
बार वरसेहिं गोयम सिद्धो वीराओ वीसहिं सुहम्मो ।
चउसट्ठीए जंबू वुच्छिण्णा तत्थ दस-ठाणा ॥ ८६२ ॥
मण-परमोहि-पुलाए आहारग-खवग उवसमे कप्पे ।
संजम-तिय-केवल-सिज्झणा य जंबूमि वुच्छिण्णा ॥ ८६३ ॥
लोउत्तरं हि सोहगं जंबूसामिस्सऽइघणं ।
अज्जा वि जं पइं पप्प सिवत्थी नण्णमिच्छइ ॥ ८६४ ॥
नव्वाणुइ कंचण-कोडियाओ जेणुज्झिया अट्ट य बालियाओ ।
सो जंबूसामी पढो मुणीणं अपच्छिमो नंदउ केवलीणं ॥ ८६५ ॥
जंबू-समो-पुरा-रक्खो न भूओ न भविस्सइ ।
सिवद्ध-वाहगा साहू कया जेणेह तक्करा ॥ ८६६ ॥
पभवो वि पडु जीया धणं हरंतेण चोरिया एउ ।
चोरीहरं च लद्धं रयण-तियं जेण गयमुल्लं ॥ ८६७ ॥

थेरस्स णं अज्जसिज्जंभवस्स मणग पिउणो वच्छसगुत्तस्स अज्ज-जसभद्दे
थेरे अंतेवासी तुंगियायण-सगुत्ते ॥ ५ ॥

पभवो जोग्गं सीसं गणंमि संघंमि न पासइ जाव ।
परतित्थे तो पासइ सिज्जंभव-भट्ट रायगिहे ॥ ८६८ ॥

पेसिय साहु-दुगेणं पुडो भट्टो न याणसी तत्तं ।
 आओसिय-जणियेणं कीलाहो दंसिया पडिमा ॥ ८६६ ॥
 पासिय-संति-जिणंदं पडिबुद्धो दिक्खिओ य पभवेणं ।
 तीसं वासा गेहे पण्णासं दिक्ख-परियाए ॥ ८७० ॥
 वासाणमसीइ सव्वं पालित्ता आउयं पयं दाउं ।
 सिज्जंभवस्स पभवो पत्तो संग्गालयं पच्छा ॥ ८७१ ॥
 सिरि-सिज्जंभव-सूरी नियपुत्तत्थं निज्जूहए पवरं ।
 सिरिदसवेयालीयं मूलसुत्तं गुणगरिट्ठं ॥ ८७२ ॥
 सिज्जंभवं गणहरं जिणपडिमादंसणेण पडिबुद्धं ।
 मणगपियरं दसकालियस्स निज्जूहगं वंदे ॥ ८७३ ॥
 मणगं पडुच्च सिज्जं भवेण निज्जूहिया सिज्जयणा ।
 वेयालिया य ठविया तमहादस वेयालियं नाम ॥ ८७४ ॥
 छहिं मासेहिं अहियं अज्झयणभिणं तु अज्झमणगेणं ।
 छम्मासा परिआओ अह कालगओ समाहीए ॥ ८७५ ॥
 आणंदं सुप्पायं कासि सिज्जं भवा तहिं थेरा ।
 जसभदस्स पुच्छा कहणा अविआलणा संघे ॥ ८७६ ॥
 सिरि-जसोभद-सूरिं नियपट्ठे ठाविऊण सुरवासं ।
 सिज्जंभव-गुरुपत्तो वीरा अडनवइ-वरिसंते ॥ ८७७ ॥

जसोभदस्स त्ति..... स्थविरावली सूत्रांक-५

जसोभदस्स सीसा भदबाहु-संभूइविजय गुरू ।
 पइट्ठाण-पुरि वराहमिहिर-भदबाहु-विप्पसुया ॥ ८७४ ॥
 भदबाहु-पय-दाणा रुद्धो य वराहमिहिरओ ताहे ।
 दिय-वेसो य वराही-संहियं किच्चा निमित्तेहिं ॥ ८७५ ॥
 जीवइ अण्ण-दिणंमि रण्णो पुरओ य मंडलं लिहियं ।
 बावण्ण-पल-पमाणय-मच्छ-पडणं तहिं कहियं ॥ ८७६ ॥
 सुच्चा सिरिभदबाहु सट्ठेगावण-पल-पमाणं च ।
 कहियं तो तप्पडणं तावइयं चेव संजायं ॥ ८७७ ॥
 तह रायसुयस्साऊ वाससयं तेण भासियं रण्णो ।
 सत्त-दिणाणि गुरूहिं बिडालियाओ य से मरणं ॥ ८७८ ॥

निक्कासिया उ रण्णा नयराओ बिडालियाओ सच्चओ ।
 सत्त-दिणे तयागारऽगल-पायेणाऽऽहओ बालो ॥ ८७६ ॥
 जाया गुरुप्पसंसा निंदा पुण तस्स आसि सो कोवा ।
 मरिउं वंतर-देवो संघमुद्दवइ रोगेणं ॥ ८८० ॥
 उवसग्गहरं थुत्तं काऊणं जेण संघ-कल्लाणं ।
 करुणायरेण विहियं स भद्दबाहू गुरू जयउ ॥ ८८१ ॥
 संभूइविजय-भद्दबाहू वीराओ सग्गिणो जाया ।
 इगसय पणहत्तरीए काउं सिरि थूलभद्द-पये ॥ ८८२ ॥

संखित्त-वायणाए अज्ज-जसभद्दाओ अग्गओ एवं थेरावली भणिया, तं
 जहा-थेरस्स णं अज्ज-जसभद्दस्स तुंगियायण-सगुत्तस्स अंतेवासी दुवे थेरा-थेरे
 अज्जसंभूअविजए माढर-सगुत्ते, थेरे अज्जभद्दबाहू पाईण-सगुत्ते । थेरस्स णं
 अज्जसंभूअविजयस्स माढरसगुत्तस्स अंतेवासी थेरे अज्ज-थुलभद्दे गोयम-
 सगुत्ते ॥.....

पाडलिपुरे नंद-पहू सगडालो मंति तस्स दो जाया ।
 सिरिओ य थूलभद्दो कोसा-गिहि बार-वरिस-डिओ ॥ ८८३ ॥
 पिउ-मरणाइ-सवणा जायसंवेगओ सयं चेव ।
 कयलोओ निक्खंतो कंबल-रयण-कय-रयहरणो ॥ ८८४ ॥
 सिरिसंभूइविजय-गुरू पासे गंतूण दिक्ख-पडिवण्णो ।
 गुरू-कहणा कोसा-गिह सडरसभोई ठिओ वासं ॥ ८८५ ॥
 सिंहगुहाहिबिल-कूव-मज्झठिय-कट्ट वासया तिण्णि ।
 मुणिणो वासारत्तं पुरित्ता आगया ताहे ॥ ८८६ ॥
 गुरुणा भणियं सागय दुक्करकरणंति किंचि उट्ठित्ता ।
 सिरिथूलभद्दमुणिणो आगमणे उट्ठिया गुरूवो ॥ ८८७ ॥
 दुक्कर-दुक्कर कारग ! सागयमुत्ते सुजाय-खेया ते ।
 आगामिय-चउमासे सीहगुहा जई गओ तत्थ ॥ ८८८ ॥
 तं दट्ठूणं खुद्धो तच्चयणा गओ य नेवालं ।
 पडिबोहिओ य तीए रयणकंबल-पवरणाएणं ॥ ८८९ ॥

गंतुं गुरुण पासे आलोइय सो तवं करेइ मुणी ।
 कोसा वि सीलवंती सिरिथूलभद्र-सुपडिबुद्धा ॥ ८६० ॥
 राय-पेसिय-रहगार-पुंख-पुंखप्पिएहिं बाणेहिं ।
 दूरंबलुंबिगहणे सरिसव-सुइ-पुप्फि सा नच्चइ ॥ ८६१ ॥

प्राह च.....

न दुक्करं अंबय-लुंब-तोडणं न दुक्करं सिक्खिय-नच्चियाए ।
 तं दुक्करं तं चं महाणुभावो जं सो मुणी पमयवणंमि वुच्छो ॥ ८६२ ॥
 रहगारो पडिबुद्धो दिक्खा-गहिया य तेण भावेणं ।
 अह बार वरिस दुब्बिक्ख-वसेण-विसरिय-बारसंगे ॥ ८६३ ॥
 पाडलिपुर-संघेण साहू दुगं पेसिऊण वाहरिया ।
 सिरिभद्रबाहू-गुरवो तेहिं महापाणज्झाण-गया ॥ ८६४ ॥
 तेणागमणं संपइ न भावि अम्हाणं तेहिं तं कहियं ।
 पुणरवि साहु-मुहेणं संघेणं भासियं एवं ॥ ८६५ ॥
 संघाएसं न कुणइ को दण्डो तस्स संघ-बज्झो सो ।
 आगच्छंतु सीसा जेणाहं पाढइस्सामि ॥ ८६६ ॥
 सिरि-थूलभद्र-पमुहा पंचसया पेसिया तओ सीसा ।
 सव्वे उब्भग्गाओ थूलभद्रो ठिओ तत्थ ॥ ८६७ ॥
 किंचूण दसम-पुव्वं भणियं भयणीण विम्हयत्थं च ।
 किच्चा केसरि-रूवं कहियं ताहिं गुरुणं च ॥ ८६८ ॥
 नायं गुरुणा अग्गे पाढ-जुग्गो न एस संघस्स ।
 विन्नित्तीइ चउण्हं पुव्वाणं सुत्तओ पढणं ॥ ८६९ ॥
 गुहाए गिरिवरंमि विजणे वि हु काणणे वसंता य ।
 बहुसो जियंदिया ते सुव्वंति य लोय-मज्झंमि ॥ ८७० ॥
 अइरम्मे गेहंमि पवर-जुवई-जणंतिए य संपत्तो ।
 निम्मल-सीलधरो सो एगो सगडाल नंदणओ ॥ ८७१ ॥
 वेसा रागवई सया तयणुगा दुद्धाइसब्भोयणं ।
 सेयं धाम मणोहरं तणु तहा नव्वो वयस्संगमो ।
 कालो ही जलयागमो तह जिओ जेणाऽवि कामो लहु,
 वंदेऽहं जुवई-पबोह-कुसलं तं थूलभद्रं मुणिं ॥ ८७२ ॥

भो काम ! वामनयणा तुह मुख-मच्छं
जोहा वसंत-पिग-पंचम-चंद-मुक्खा ।
ते सेवगा हरि-विरंचि-महेसराई
हा हा हयास ! मुणिणाऽवि कहं हओ सि ॥ ६०३ ॥

वसन्ततिलका

इच्चाइय पबंधो सुपसिद्धो तेण मे न इह लिहिओ ।
वीराओ दुसय पनरस वरिसंते तस्स सुरवासो ॥ ६०४ ॥

इति स्थूलभद्रः

सिरि-थूलभद्र-सीसा सिरिसीहगिरि-सुहत्थिवरनामा ।
वरनाणदंसणधरा संवेगनिही अहं वंदे ॥ ६०५ ॥
वुच्छिण्णे जिणकप्पे काही जिणकप्प-तुलणमिह धीरो ।
तं वंदे मुणि-वसहं महागिरिं परम-चरणधरं ॥ ६०६ ॥
जिणकप्प-परीकम्मं को कासी जस्स संथवमकासी ।
सिद्धि-घरंमि सुहत्थी तं अज्जमहागिरिं वंदे ॥ ६०७ ॥
वंदे अज्ज-सुहत्थिं मुणि-पवरं जेण संपई राया ।
रिद्धिं सव्व-पसिद्धिं चारित्तं पाविओ परमं ॥ ६०८ ॥
कोसंबि-इब्भ-गेहे विविहं भिक्खं मुणीण दियमाणं ।
दट्ठूणं दुब्भिक्खे रंको जा जाइ गुरु-पासे ॥ ६०९ ॥
जाणित्ता जुग्गत्तं गुरवो भोयणं दित्ति ।
रत्ती विसूइयाए सुहभावा संपई जाओ ॥ ६१० ॥
उज्जेणीए पत्ता गुरवो दिट्ठा य तेण राएणं ।
उवलक्खह मं पुच्छइ भणइ गुरू संपई राया ॥ ६११ ॥
पुणरवि पुट्ठे णाओ ताहे वंदइ गुरूण सो पाए ।
उप्पण्ण-जाईसरणो पडिवज्जइ धम्ममइ-रम्मं ॥ ६१२ ॥
सपाय-कोडी-जिणबिंब सपाय-लक्ख-नवीन-जिणभवणे ।
तेतीस-सहस-जिण्णोधारे तह पणवई सहसा ॥ ६१३ ॥
पित्तलमय पडिमाओ दाणसाला तहेव सत्तसया ।
इच्चाइ पुण्ण-कलिया तिखंडभूमी कया तेण ॥ ६१४ ॥

इति सम्प्रतिः॥

थेरस्स णं अज्जथूलभद्दस्स गोयमसगुत्तस्स इमे दो थेरा अंतेवासी अहावच्चा अभिण्णायया हुत्था, तं जहा-थेरे अज्ज महागिरी एलावच्चसगुत्ते, थेरे अज्जसुहत्थी वासिद्ध-सगुत्ते। थेरस्स णं अज्जमहागिरिस्स एलावच्चसगुत्तस्स इमे अट्ठ थेरा अंतेवासी अहावच्चा अभिण्णायया हुत्था, तं जहा थेरे उत्तरे, थेरे बलिस्सहे, थेरे धण्हे, थेरे सिरिद्धे, थेरे कोडिण्णे, थेरे नागे, थेरे नागमित्ते थेरे छलूए रोहगुत्ते कोसियगुत्ते णं। थेरेहिंतो णं छलूएहिंतो रोहगुत्तेहिंतो कोसिय-गुत्तेहिंतो तत्थ णं तेरासिया निग्गया.....॥

पणसय-चोयालीसे वरिसे सिरिवीरजिणवरिंदाओ।

पुरमंजिया-पुरीए भूवालो बलसिरी नाम॥६१५॥

सिरिगुत्तायरियाणं सीसो रोहगुत्त नामओ तत्थ।

परिवाई-वायकुसलो समागओ वाय-करणत्थं॥६१६॥

विज्जाए मह उयरं फुट्ठइ तेण ति बद्धुयर-पट्ठो।

विच्छू सप्प य मूसग मिगी वराही काग सउणी॥६१७॥

इय विज्जासत्त-जुओ तेण पवाइय पडहो य वज्जंतो।

विज्जा-बलिएण तया निवारिओ रोहगुत्तेण॥६१८॥

गुरुणा कुडिली एसो नाउं तव्वारिणीओ विज्जाओ।

दिण्णा य पाढ-सिद्धा जिणसासण-पभावणत्थं च॥६१९॥

मयूरी नउली चेव बिलाडी वग्धिणी तहा।

सिंही उलूगी ओलावी रयहरणं च मंतियं॥६२०॥

रायसहाए दो पत्ता वायत्थं तेण ठाविया।

जीवाजीवाण दो रासी तेण वुत्तं न याणसि॥६२१॥

जिणसासणस्स अत्थं गंभीरं मुखसेहरा! अत्थि।

जीवाजीव-नोजीव-रासित्तियमत्थि तं जाण॥६२२॥

जीवो कीडाईओ अजीवो जाण लेट्ठुमाईओ।

नोजीवो नहमाइ इय निप्पुट्ठो कओ सो य॥६२३॥

रायसमक्खं वरिओ जयपडागं गओ य गुरु-समीवे।

कहिओ सो वुत्तंतो गुरुणा भणियं कयं भव्वं॥६२४॥

नोजीवो पुण सुत्ते नत्थि तुमं तेण नरवइ-समक्खं ।
 मिच्छुक्कडयं देसु य सो भणइ एयमवि सच्चं ॥ ६२५ ॥
 तो गुरुणा सह वायं पकुव्वमाणस्स जाव छम्मासा ।
 कुत्तीयावण-हट्ठे नोजीवो नत्थि इय वुत्ते ॥ ६२६ ॥
 न य मण्णेइ सो जाहे गुरुणा भस्स-मल्लगो सिरे ठविओ ।
 तम्हा विसेसिय-मयं संजायं लोयमज्झंमि ॥ ६२७ ॥

थेराणं सुट्ठिय-सुप्पडिबुद्धाणं कोडिय-काकंदगाणं वग्घावच्च-सगुत्ताणं इमे
 पंच थेरा अंतेवासी अहावच्चा अभिण्णाया हुत्था, तं जहा थेरे अज्ज-इंददिण्णे,
 थेरे पियगंधे, थेरे विज्जाहरगोवाले कासवगुत्ते णं, थेरे इसिदिण्णे, थेरे अरिहदत्ते ।
 थेरेहिंतो णं पियगंधेहिंतो इत्थ णं मज्झिमा साहा निग्गया, थेरेहिंतो णं
 विज्जाहर-गोवालेहिंतो कासव-गुत्तेहिंतो इत्थ णं विज्जाहरी साहा
 निग्गया.....॥

अजमेरासण्णवत्ति हरिसपुरे तिसयजिणालय-रम्मे ।
 चउसय-लोइय-देवालय-माहण-अट्ठ-सहस-गिहे ॥ ६२८ ॥
 छत्तीस-सहस वणिगिह वावी-कूवाइ सोहिए तत्थ ।
 जण्णे दिएहिं छागो हंतुं तइया समारद्धो ॥ ६२९ ॥
 इत्थंतरंमि सुत्थित-सुप्पडिबुद्धाण पवर-सीसेहिं ।
 पियगंधेहिं सावय हत्थपियगंध-परिक्खेवे ॥ ६३० ॥
 अहिट्ठिओ सो छागो अंबिगया सो भणेइ गयणत्थो ।
 आगच्छंतु हणंतु य रे रे मं भे हयासा य ॥ ६३१ ॥
 जइ हं तुम्ह सरिच्छो निदओ भवामि ता खणेणेव ।
 मारेमि सव्वहा खलु तुब्भे तो ते भिया सव्वे ॥ ६३२ ॥
 जावंति रोमकूवाणि पसु-गाएसु भारय ! ।
 ताव य वास-सहस्साणि पच्चंति पसु-घायणा ॥ ६३३ ॥
 इच्चाइ वुत्तंतं पुच्छंति ते दिया तुमं कोऽसी ?
 सो भणइ पावगो हं वाहण-मेयं ममैवेहत्ति ॥ ६३४ ॥
 पियगंधसूरिनाहो इहत्थितं पुच्छिऊण गिण्हेह ।
 सुद्धं धम्मं जेणं जायन्ते सयलसुक्खाइ ॥ ६३५ ॥

ःन्तूण तेहि तया पुच्छिता सुद्धधम्मम्मग्गं च ।
अङ्गीको य तो सो नित्थारगपारगा जाया ॥६३६॥

बंभ-दीविया साहा निग्गय ति.....

आभीरदेसायल-पुरासण्ण-कण्ण-बेण्ण-नई-मज्जे ।
अत्थि वरबंभदीवो पंचसया तावसा तत्थ ॥६३७॥
ते पाय-पलेवेणं पारणयत्थं नईं समुत्तरिउं ।
आगच्छंति य नयरे तवप्पभावं भणंति य ॥६३८॥
तब्भत्तो बहु-लोओ नाओ सिरिवज्ज-माउलेहिं तहिं ।
अज्जसमिइ-सूरीहिं थेवप्पिमं पाय-लेव-बलं ॥६३९॥
सट्ठेहिं नियगेहिं आणिया तावसा य गुरुवयणा ।
भोयणनिमित्तमेसिं पक्खालंति य ते पाएं ॥६४०॥
गयलेवा ते सव्वे नईं पविट्ठा य जाव बुड्ढंति ।
तावागया य गुरवो नईं भणंति तारिसं वयणं ॥६४१॥
बेण्णे ! देहि परं पारं गमिस्सामु त्ति चप्पडिं दच्चा ।
इय वुत्ते दो कूले मिलिए ते तत्थ संपत्ता ॥६४२॥
धम्मोवएस-दाणेण पडिबुद्धा तावसा य ते सव्वे ।
पवज्जं पडिवण्णा पभावणा जिणमये जाया ॥६४३॥

थेरस्स णं अज्ज-सीहगीरिस्स जाइस्सरस्स कोसियगुत्तस्स इमे चत्तारि थेरा
अंतेवासी अहावच्चा अभिण्णाया हुत्था, तं जहा थेरे धणगिरी थेरे अज्ज-वइरे
थेरे अज्जसमिए, थेरे अरहदिण्णे । थेरेहिंतो णं अज्जसमिएहिंतो गोयम-सगुत्तेहिंतो
इत्थं णं बंभदीविया साहा निग्गया, थेरेहिंतो णं अज्ज-वइरेहिंतो गोयम सगुत्तेहिंतो
इत्थ णं अज्जवइरी साहा निग्गया.....॥

सीहगिरि-सुगुरु-पासे सुणंदा-सोयरो हु अज्जसमिओ ।
तह धणगिरि-तब्भत्ता पव्वइया ते मुणी जाया ॥६४४॥
तुंबवणे साहाणं सुणंदं परिचइउं सुणंदा सा ।
काले पसवइ पुत्तं सुरूववंतं महप्पभावं ॥६४५॥
मिलिया वयंति पमया अज्ज पिया होज्ज तो सुणित्ता सो पि उ ।
दिक्खं जाईसरणो माउव्विग्गाय तो रोयइ ॥६४६॥

सा उव्विग्गा चिद्धइ गोयर-समये गुरूहिं वागरियं ।
 सच्चित्तं अच्चित्तं जं मिलइ तं गहेअव्वं ॥ ६४७ ॥
 पत्तं धणगिरि-साहू दद्धं तस्सेव अप्पइ बालं ।
 लोयसमक्खं णंदा गहिओ तेण वि सो बालो ॥ ६४८ ॥
 वज्रमिव भार-जुत्तो दत्तं वज्र त्ति नाम सुगुरुहिं ।
 सिज्जायरीहिं वद्धइ लालिज्जंतो समणि-गेहे ॥ ६४९ ॥
 पालण-सुत्तो अंगे एगारस पढइ छम्मासवयकंखी ।
 तिवासिओ य संघं मण्णइ गुरु-वेस-गहणेणं ॥ ६५० ॥
 साहूवहि-विंटलियं मंडित्ता जो पढावइ साहू ।
 राय-समक्ख-विवाए जाए माया वि पडिबुद्धा ॥ ६५१ ॥
 उज्जेणीए जो जंभगेहिं पहाण-कोलह-सुपक्क-भिक्षाए ।
 सुरपिंडु त्ति न गहिओ विक्किय-लद्धी तओ पत्ता ॥ ६५२ ॥
 घेबरपूर-परिक्खा कया पुव्वमित्त-जंभियसुरेहिं ।
 नो खुद्धो तो पुणरवि दत्ता तेहिं नभोविज्जा ॥ ६५३ ॥
 जस्स अणुण्णाए वायगत्तणे दसपुरंमि नयरंमि ।
 देवेहिं कया महिमा पयाणुसारिं नमंसामि ॥ ६५४ ॥
 जो कण्णाइ धणेण य निमंतिओ जोव्वणंमि गिहिवइणा ।
 नयरंमि कुसुम-नामे तं वयररिसिं नमंसामि ॥ ६५५ ॥
 उत्तर-दिसि दुब्भिकखे जाए संघं पडे ठवेऊणं ।
 चारिग्गहणद्ध गओ सो वि सिज्जायरो खिन्नो ॥ ६५६ ॥
 संपत्तो वज्रगुरू पुरिं सुभिकखं च तत्थ बुद्धेणं ।
 रण्णा जिणगिहपुप्फे निवारिए संघ-चिंता य ॥ ६५७ ॥
 पञ्चसवणा-पव्वे लाभं नाऊण वज्रसूरीहिं ।
 माहेसरी हुयासण-देवस्स वणंमि पत्तेहिं ॥ ६५८ ॥
 पुप्फाण वीस लक्खा सिरिदेवी-अप्पियं महापउमं ।
 वेउव्विय-विमाणं गिण्हित्ता हुयसण-वणाओ ॥ ६५९ ॥
 जंभिय-सुर-कय-ओच्छव-पुव्वं आगम्म तित्थ माहणं ।
 वद्धारेइ ताहे सो राया सावओ जाओ ॥ ६६० ॥

इच्छाई वित्थरो बहू नायव्वो अण्ण-गंधओ सव्वो ।
 तयणु सिरिवज्जसेणो सोपारे पट्टणे पत्तो ॥ ६६१ ॥
 जिणदत्त-सङ्क-गेहे दट्ठं लक्ख-दव्व-मुल्ल-पक्कऽण्णं ।
 तत्थ विसं खिप्पंतं वारियं वज्जसामि-वया ॥ ६६२ ॥
 पर-दीव-धण्ण-भरिया-पभाए आगया बहु-पोया ।
 तत्थ सुभिकखं जायं पत्तो वेरग्गयं सिट्ठी ॥ ६६३ ॥
 नागिंदाइ चउ-पुत्ता ईसरी-भारिया-समेओ य ।
 पव्वज्जं संपत्तो वयरसेण-प्पसायाओ ॥ ६६४ ॥

इति श्री वज्रस्वामि-सम्बन्धः ॥

थेरस्स णं अज्ज-नक्खत्तस्स कासवगुत्तस्स अज्जरक्खे थेरे अंतेवासी
 कासवगुत्ते ॥ २२ ॥ थेरस्स णं अज्जरक्खस्स कासवगुत्तस्स अज्जनागे थेरे
 अंतेवासी गोअम-सगुत्ते ॥ २३ ॥

माया य रुद्धसोमा पिया य नामेण सोमदेवु त्ति ।
 भाया य फग्गुरक्खिय तोसलि-पुत्ता य आयरिया ॥ ६६५ ॥
 निज्जावण-भद्दगुत्तो वीसं पढ्ढं च तस्स पुव्वगयं ।
 पव्वाविओ य भाया रक्खिय-खमणेहिं जणओ य ॥ ६६६ ॥
 दसपुर-नयर-पुरोहिय-सोमदेव-रुद्धसोम सुओ य ।
 अज्जरक्खियो विदेसे चउदसविज्जा भणित्ताणं ॥ ६६७ ॥
 संपत्तो निय-नयरे रायकयाडंबरजुओ गओ गेहे ।
 माउचलणेसु पडिओ न सायरं कुणइ ताहे सो ॥ ६६८ ॥
 पुट्ठा माया पभणइ दिट्ठिवायं पढिय किं तुमं पत्तो ।
 जेण महं संतोसो चिंतइ नामं पि सुपसत्थं ॥ ६६९ ॥
 कत्थत्थि दिट्ठिवाओ सा भणइ इच्छुवाड-मज्झंमि ।
 तोसलिपुत्तायरिओ चिट्ठइ तुह माउलो सो य ॥ ६७० ॥
 पुच्छित्ता जा गच्छइ मग्गे नव इक्खुखंडं संजुत्तो ।
 मिलिओ विप्पो पवरं वियारिऊणं च तत्थ गओ ॥ ६७१ ॥
 ढड्ढर-सावय-जुत्तो दिट्ठो गुरुणा कओ तुमं पुट्ठो ।
 पढ्ढत्थं दिट्ठिवायं अम-सरिसो होसि सो जाओ ॥ ६७२ ॥

गुरु-पासे सुत्तथं पढियं तो वज्रसामि-गुरु-पासे ।
 पढइ सो दिड्ढिवायं जणयाइ सुणिय-पव्वज्जं ॥ ६७३ ॥
 संदेसागारेइ जाहे नाऽऽगच्छइ तओ भाया ।
 फग्गुरक्खिओ य पत्तो भणइ पवज्जइ सयण-वग्गो ॥ ६७४ ॥
 तो पढमं पवज्जसु तुमं तओ तेण दिक्खिओ सो य ।
 अइगुरु-पढणे भग्गो बिंदूदहि-दिण्ण-दिट्ठंतो ॥ ६७५ ॥
 गुरुमापुच्छिय पत्तो पव्वाविओ माइ-पमुह-परिवारो ।
 जणओ पुण मोहेणं भमइ पिट्ठीइ गिहि-वेसो ॥ ६७६ ॥
 बहुएहिं उवाएहिं दिक्खिओ सो धोय-छत्तयाइ-जुओ ।
 मोयाविओ कमेण बालाइ-वयणुवाएणं ॥ ६७७ ॥
 धोइय-विमोक्खणद्धा साहुंमि मए गुरूण सिक्खाए ।
 वोढुं लग्गइ साहू किमित्थ लाहो य सो पुच्छइ ॥ ६७८ ॥
 गुरुणा आमं भणिए सो वहणत्थं समुट्ठिओ जाहे ।
 सहियव्वो उवस्सग्गो इय गुरु-भणिए वि तं वहइ ॥ ६७९ ॥
 गच्छंतस्स य डिंभा कट्ठंति य धोइयं च तो पच्छा ।
 गाहाविओ मुणीहिं चोलपट्ठो स-लज्जस्स ॥ ६८० ॥
 दिट्ठो गुरुहिं पुट्ठं कहियं तेणावि तो गुरू भणइ ।
 आणेह धोइयं भो! सो भणइ णेण होयव्वं ॥ ६८१ ॥
 जं दट्ठव्वं दट्ठं भिक्खं हिंडइ सो उवाएणं ।
 गिहपिट्ठे पविसंतो वारिओ सो य गिहवइणा ॥ ६८२ ॥
 न हु वारिज्जइ लच्छी आयंती जत्थ तत्थ सो तुट्ठो ।
 बत्तीस-मोयगा तेण दिण्णा दंसेइ स-गुरूणं ॥ ६८३ ॥
 होहिस्संति य सीसा बत्तीसं अम्ह संतइए उ ।
 इच्चाइ वित्थरत्थो नेयव्वो अण्ण-गंथाओ ॥ ६८४ ॥

इति थेरावली-समप्ता.....

एरावई कुणालाए, जत्थ चक्किया सिया, एगं पायं जले किच्चा एगं
 पायं थले किच्चा एवं चक्किया एवं णं कप्पइ सव्वओ समंता सक्कोसं जोयणं
 (भिक्खाचरियाए) गंतुं पडिनियत्तए ॥ सामाचारी सूत्र-१२ ॥

दग-घट्ट-तिण्णि-सत्त व उडुवासासु न हणंति तं खित्तं ।
चउरद्वाइ हणंति जंघ-द्विको अवरेण ॥ ६८५ ॥

आयामए ति.....

आयामाइ सुच्छुत्ती कायव्वा नेव जेण अच्छत्ती ।
अमली नामा देवी साऽणेग-ट्टाण-वासहरा ॥ ६८६ ॥
अणेगट्टाण सुसाणे मच्छाइ-मरण-संभव-नई ।
जह य पवित्तं नीरं पवित्ता तह इमा नेया ॥ ६८७ ॥
पोहीसकोरवच्छग मिग-नाहि-पट्टकूलगाणि इह ।
कुतुपाइ-घयणाहर बद्धसुप्पकरवत्तयाई ॥ ६८८ ॥
कंबल-गोरोयण-करि-दंत-नहज बाहि से घर-खजूरा ।
दीवाइ गुड-पमुहा एरिं छुत्ती न किअइ य ॥ ६८९ ॥

उक्तं च

वुट्ट य घुग्घरीबक्कला य अण्णं पि अद्धसिद्धं वा ।
जह होइ इह न छुत्ती तज्जलमवसामणाइ तहा ॥ ६९० ॥

निसीथ भाष्ये....५३६ गाथा

उस्सेयम संसेयम तंदुल तिल तुस जवोदंगाऽऽयाम ।
सोवीर सुद्ध-वियडं अंबय अंबाडग कविट्ठं ॥ ६९१ ॥
माउलिंग-दक्ख-दाडिम-खजूर-नालियर-कयर-बोरजलं ।
आमलगं चिंचा पाणगाइ पढमंग-भणियाइ ॥ ६९२ ॥

श्री आचाराङ्गे...

इच्चाइ-बहु-वत्तव्वं अत्थि सत्थे वियाणिया ।
माही लेह मुहस्साया दिथरेसिं जरवाणियं ॥ ६९३ ॥
सह जण जोइय घय भत्तं गुरु जोइयं च चूरमिगं ।
गिण्हाविंति य गुरवो साहूणं निव्विगइयमि ॥ ६९४ ॥
जीहा लोल वसाओ नीरसमवसावणाइ नीरं च ।
असणाहारतया जे पभणंति का गई तेसिं ॥ ६९५ ॥
तिदंडोगालियं गिज्झं उण्हं नो य कवोसणं ।
नीरं च मिस्स-दोसाओ ओहणिज्जुत्ति-भासणा ॥ ६९६ ॥

कुसुंभ-कुंकुमाभेव निचियं सूहमेहिया।
 जीवेहिं वत्थेणं सोहिउं न जलं खमा ॥ ६६७ ॥
 लूयस्स तंतु-गलिए बिंदुमिसंति पाणिणो।
 सुहमा भमर-माणा तिवेढेऽवि न मंति य ॥ ६६८ ॥
 संवच्छरेण जं पावं करेइ मच्छ-बंधगो।
 एगाहेण तं पावं अपूय-जल-संगही ॥ ६६९ ॥

इच्चाइ समिइऽधिगारे

समिइ सु ति...

इरियाइ-वरदत्तो सक्केण पसंसिओ मुणिप्पवरो।
 खोहत्यं देवकय-मंडूगी-रक्खणत्थं च ॥ १००० ॥
 इओ विउव्विय-गयोल्लालणाइणा वि साहू नो खुद्धो।
 एवं हरियासमिई पालेयव्वा पयत्तेणं ॥ १००१ ॥
 भासा-समिए संगय साहू जो सत्तु-रुद्ध-नगराओ।
 निग्गच्छंतो पुट्ठो पडिसत्तूहिंपि नो वयइ ॥ १००२ ॥
 बहु-सुणेहि कण्णेहिं बहु-अच्छीहिं पिच्छइ।
 इच्चाइ भणणे मुक्को काऊण गहिलो तहिं ॥ १००३ ॥

इति भाषा

एसणाए वसुदेव-जीवो पुव्व-भव-नंदिसेणो जो।
 वेयावच्चाभिग्गह-धारओ इंदकयपसंसो ॥ १००४ ॥
 छट्ठं छट्ठेण तवं कुव्वंतो परिक्खिओ य देवेणं।
 अइसारि-साहु-दंसणाऽसुइ-दव्व-विलेवणेणं च ॥ १००५ ॥

एषणा...

आयाण-निक्खेवाए सौमिल साहू गुरूहिं सो भणिओ।
 पाय-पडिलेहणं कुरु विहारत्थं भो! सगाले य ॥ १००६ ॥
 तेण कया पायाणं पडिलेहणा य तओ ठिया गुरवो।
 पुणरवि करेसु भणिये भणइ किं अत्थि सप्पाई ॥ १००७ ॥
 पेहंतो य पभाए सप्यं दट्ठुं गओ गुरू-सगासे।
 देवी बीहावणट्ठाए उल्लङ्गं मा य भासिज्जा ॥ १००८ ॥

पारिद्धावणियाए सुव्वयगुरु-खुल्लओ अपेहंतो ।
 किं थंडिलेऽत्थि करहो गुरुणा मा वारिओ एवं ॥ १००६ ॥
 सासणदेवी तो तं बीहावेइ य उट्ट-रूवेणं ।
 रत्तीए भणइ गुरु अपेहए देवया छलइ ॥ १०१० ॥
 मणगुत्तीए पुव्विं जो भणिओ कुंकुणो य साहू वरो ।
 विवरीयत्तणेण णेयो कायव्वा एवमण्णेहिं ॥ १०११ ॥ मनोगुप्तिः....
 वयगुत्तीए गुणदत्त साहू सो सिरिपुरे य गच्छंतो ।
 संसारिय-वंदावण-निमित्तमवि मग्गि-मिलिएहिं ॥ १०१२ ॥
 चोरेहिं से कहियं नो वत्तव्वं तए सरूवमिणं ।
 तो मुत्तो सो चलिओ जाइ जा तत्थ मग्गंमि ॥ १०१३ ॥
 संसारिय-वग्गो से मिलिओ मग्गंमि तेहिं सह चलिओ ।
 जण्ण-जत्ताइ दिट्ठो सच्छो चोरेहिं सो गहिओ ॥ १०१४ ॥
 सब्बस्सं से गहियं दिट्ठो साहू य तेहिं तुट्ठेहिं ।
 पच्चप्पियं च सब्बं संसारिय-वग्ग-कहणाओ ॥ १०१५ ॥ वागुप्तिः ॥
 कायगुत्तीइ अहण्णग-साहू विपज्जये वाहलोल्लंघे ।
 छिण्ण-पाओ देवयाए निंदंतो सो कओ सज्जो ॥ १०१६ ॥ कायगुप्तिः ॥

वरं पज्जोसवणाओ अहिगरणं इत्ति...

सिंधु-सोवीर-देसे विइभयपुराहिवो उदायि-निवो ।
 महसेणाइ-दस-मुगड बद्ध-निव-सेवणिज्जो य ॥ १०१७ ॥
 जीवंतसामी-पडिमाइ कारणवसओ गओ य उज्जेणिं ।
 बद्धो चंड-पज्जोओ वलिए वासा तया लग्गो ॥ १०१७ ॥
 दसपुरद्धाणे सिण्णं ठावित्ता तत्थ संठिओ राया ।
 संवच्छर-पव्व-दिणे समागए चिंतए राया ॥ १०१८ ॥
 बद्धे पज्जोए मे पडिक्कमणो नेव सुज्झइ मुक्को ।
 एवं भो मुत्तव्वं अहिगरणं इत्थ दिवसंमि ॥ १०१९ ॥
 कोहं जो य न मुंचइ इमंमि संवच्छरियपवरपव्वंमि ।
 सो कायव्वो बज्झो संघाओ दिओ महाठाणे ॥ १०२० ॥
 तहाहि खेड-वच्छव्वो रुद्धो नाम दिओ पुरा ।
 वासा-काले बलिवद्धो गलीसम्मं न हिंडइ ॥ १०२१ ॥

तोत्तेण तं ताडेइ तोत्ते भग्गे सकोवओ।

कैदारमट्टि-खंडेहिं हणेइ निद्वयं जहा॥१०२२॥

करित्ता मट्टिया कूडं तरसोवरि गओ गिहं।

सुयं तं विष्प-वग्गेहिं पंतिओ सो बहिं कओ॥१०२३॥

इति रोषो न कार्यः...॥

वासावासं पज्जोसवियाणं इह खलु निग्गंथाण वा निग्गंथीण वा अज्जेव कक्खडे कडुए विग्गहे समुप्पज्जित्था सेहे राइणियं खामिज्जा, राइणिए वि सेहं खामिज्जा (ग्रं. १२००) खमिअव्वं खमाविअव्वं उवसमियव्वं उवसमावियव्वं सुमइ-संपुच्छणा-बहुलेण होयव्वं। जो उवसमइ तस्स अत्थि आराहणा, जो न उवसमइ तस्स नत्थि आराहणा, तम्हा अप्पणा चेव उवसमियव्वं, से किमाहु भंते! ?

उवसमसारं खु सामण्णं॥ सूत्र ५६ ॥ सामाचारी....

मिति मिउ मद्दवत्ति छत्ति य दोसाण छायणे होइ।

मिति य मेराइ-ट्टिओ दुत्ति दुगंच्छामि अप्पाणं॥१०२५॥

कत्ति कडं मे पावं डिंति य डेवेमि उवसमेणं ति।

एसो मिच्छादुक्कड-पयव्वरत्थो समासेण॥१०२६॥

जं दुक्कडं ति मिच्छा तं चेव पुणो निसेवह पावं।

पच्चक्ख-मुसावाई माया-नियडी-पसंगो य॥१०२७॥

जह कुंभारग-खुल्लग-मिच्छुक्कडयं तहा न दायव्वं।

मिच्छुक्कडयं देयं मिगावई चंदणाइव्व॥१०२८॥

अण्णमि दिणे वीरं कोमंवीए समोसठं नच्चा।

चंदाइच्चा नमिउं मूलट्ठिमाणेण संपत्ता॥१०२९॥

वियाणिऊण वेलं गया नियालयं चंदणा अज्जा।

मियावई समणी पुण चिद्धइ तत्थेव जिणभत्ता॥१०३०॥

भगवंतं वंदित्ता चलिया जा चंद-दिणयरा दो वि।

ता जायमंधयारं मिगावई लज्जिया चलिया॥१०३१॥

गुरुणी पासे पत्ता गुरुणी पभणइ न सुंदरं एयं।

जं समणीणं ठाणं साहु-पासंमि रत्तिए॥१०३२॥

तो सा गुरुणी पाए पडिया खामेइ भावओ जाव ।
 ता गुरुणीए निदा समागया तंमि समयंमि ॥१०३३॥
 ता सुहज्झाण-वसाओ उप्पण्णं केवलं मिगावइए ।
 सप्पं पिक्खइ इंतं गुरुणी-करं ठवइ संथारे ॥१०३४॥
 तो जागरिया गुरुणी पुट्ठं मे चालिओ करो केणं ।
 सामिणि! सप्प-भया मे चालिओ कह तुमं जाणे? ॥१०३५॥
 को ऽत्थि अइसओ तो हंता! सामिणि! तुह पसायाओ ।
 पडिवाइ अपडिवाइ य? अप्पडिवाइ त्ति सा भणइ ॥१०३६॥
 आउट्ठा खामेइ सुहज्झाणेण ऽज्जचंदणाए वि ।
 उप्पणं णाण-वरं संपत्ता दो वि मुखपयं ॥१०३७॥
 एवं खामेयव्वं परेहिं तह अप्पणा य खमियव्वं ।
 नियधम्म-रक्खणट्ठा पहाणबुद्धीहिं विबुहेहिं ॥१०३८॥
 कालिग-सुरीण कहा...तो गुरु-पट्ठावली कहेयव्वा ।
 अच्छाएइ तरणिं रेणू-वाउस्स विप्फुरियं ॥१०३९॥

अथ गुरुप्रसाद-वर्णनम्...

भेगो चुंबइ वयणं जं नागस्सेह तं बलं जाण ।
 मंतिवाइस्स नूणं अहवा तं ओसही तेयं ॥१०४०॥
 कूयइ वसंत-मासे कलय-रवं तत्थ कारणं जाण ।
 सहगार-मंजरीए पवर-बुद्धिप्पयायाए ॥१०४१॥
 साहामियस्स साहाया साहं गंतुं परक्कमो ।
 न जोयण-सयं गंतुं सक्कोब्भाससयेहि वि ॥१०४२॥
 तहाविहो सत्थ-परिस्समो मे
 नेवत्थि जडुं च तहा पगामं ।
 तहावि जं पुच्छग-वायणाए
 पवत्तितं मे गुरु-पारतंतं ॥१०४३॥

उपजातिः

पंडितं नेवत्थि किंपि ममं विबुह-मण-चमक्कयरं ।
 वयणवर-कोसलत्तं अण्णो वा गुण-विसेसो य ॥१०४४॥

तह वि जं संघ-मज्झे वायालत्तं धरामि तं सव्वं ।
 नायव्वं माहणं सिरिगुरुपयप्पसायाणं ॥ १०४५ ॥
 जं किंचि अणाभोगा किमुच्छगत्तेण भासियं भणियं ।
 तं खमह सुयहरा मे अवरहं बाल-बुद्धिस्स ॥ १०४६ ॥

न ते नरा दुग्गइमावयंति
 न मूयगत्तं न जडस्सहावं ।
 नेवंधयत्तं च कुबुद्धियत्तं
 जे वाययंतीह जिणस्स वक्कं ॥ १०४७ ॥

तेहिं अप्पा कओ सुद्धो निम्मलं च कुलं कयं ।
 संसार-कूव-पडणे कओ हत्थावलंबओ ॥ १०४८ ॥
 लद्धं लच्छीफलं तेहिं सव्वण्णु-चरियं वरं ।
 वाइयं जेहिं सुकईहिं ते धण्णा भूमिमंडले ॥ १०४९ ॥

नक्खत्ताक्खयपूरियं मरगयच्छालं विसालं नहो,
 पीयूसज्जुइनालिगेरकलियं चंदप्पहा चंदणं ।
 जावं मेरु-गरे गधत्ते-कडगे भ धरिस्तीवहू,
 तावं नंदउ धम्म-कम्म-निरओ सो संघ-भट्टारओ ॥ १०५० ॥ शार्दूलविक्रीडित :-

इच्चेयंतर-वच्च-सत्थ-मणहं गाहाइणा गुंफियं
 भव्वाणंद-विधायगं सुहकरं बालप्पभेणं मए ।
 मुद्धेणुद्धरियं च किंचि सकयं सोहंतु सव्वं तयं,
 कुव्वाणा करुणं सया सुयहरा देयं न मे दूसणं ॥ १०५१ ॥ शार्दूलविक्रीडितम्

^१चंद-^२रस-^३बाण-^४मुणि-सम वरिसे तवगण विभासणक्काणं ।
 भट्टारक-पुरंदरसिरिविजयसेणसूरीणं ॥ १०५२ ॥

रज्जे विहिओ गंथो पंडिय-सिरिकुलवद्धण गणीणं
 सीसेण बालमइणा नगाभिहाणेण वरमहिमो ॥ १०५३ ॥

कुलवर्धनगणी शिष्य-नग ऋषि-

जा भूवलये चंदो सूरु मेरु य जयइ सुहजणओ ।
 ता जयउ एस गंथो मंगलओ सव्व संघस्स ॥ १०५४ ॥

*प्रायः सर्व-ग्रंथाग्र...११५१ अनुष्टुभ

संवत् १६५७ वर्षे भाद्रपद-सित-त्रयोदश्यां वार-बुधे

पूर्णीकृतः लिखितश्च वडावली नगरे नगर्षिगणिनाऽलेखि ॥


शुभं भवतु श्रीः ॥

इति श्री कल्पान्तर्वाच्यग्रन्थः समाप्तः ॥



★ स्वस्ति श्री राजनगरे पालडी-जैननगरे पञ्चदशम तीर्थपति श्री धर्मनाथ जिनेश्वर सान्निध्ये (जैन उपाश्रय) पौषधागारे चातुमासार्थं विराजमानाः सन्ति श्रीमन्नेमिसूरीश्वराणां शिष्य-प्रशिष्यावतंसानां श्री हेमचन्द्रसूरीश्वराणां शिष्याः पंन्यासप्रवराः श्रीमत् प्रद्युम्नविजयाः तेषां सत्प्रेरणया तथा मुनिपुङ्गवश्री राजहंसविजयानां साहाय्येन च प्राचीन-पडिमात्रा-लिपि-ग्रंथात् वर्तमान समये प्रचलितायां देवनागरी-लिपि-भाषायां अलेखि....वि. सं. २०५१ वीर निः २५२१ लेखने प्रायः मासमेकमभवत्....अश्विन-शुक्ला पञ्चमी दिने परिमार्जने पुनः.....लेखनं संपूर्णम्भूत्

शुभं भवतु श्री श्रमणसङ्घस्येति.....



कल्पसूत्रस्य चूर्णी निर्युक्तिगर्भा

तथा

पृथ्वीचन्द्रसूरि प्रणीत टिप्पनकम्

(परिशिष्टानि)

॥ जयन्तु वीतरागाः ॥

कप्पसुत्तस्स चुण्णी ।

(दसासुयक्खंधसुत्तइमज्झयणस्स णिज्जुत्तिगब्भा चुण्णी)

*

संबंधो—सत्तमासियं फासेत्ता आगतो ताहे वासाजोग्गं उवहिं उप्पाएति, वासाजोग्गं च खेत्तं पडिलेहेति, एतेण संबंधेण **पज्जोसमणाकप्पो** संपत्तो । तस्स दारा चत्तारि, अधिकारो वासावासजोग्गेण खेत्तेण उवहिणा य, जा य वासासु मज्जाया । णामणिफ्फण्णो पज्जोसमणाकप्पो । दुपदं नाम—पज्जोसमणा कप्पो य । पज्जोसमणाए कप्पो पज्जोसमणाकप्पो । पज्जायाणं ओसमणा पज्जोसमणा । अघवां परि—सव्वतोभावे, “उष निवासे”, एस पज्जोसमणा ॥ इदाणि णिज्जुत्तीवित्थारो—

पज्जोसमणाए अक्खराइं होति उ इमाइं गोण्णाइं ।

परियायववत्थवणा, पज्जोसमणा य पागइया ॥ १ ॥

परिवसणा पज्जुसणा, पज्जोसमणा य वासवासो य ।

पढमसमोसरणं ति य, ठवणा जेड्डोगहेगड्डा ॥ २ ॥

पज्जोसमणाए० गाहाद्वयम् । पज्जोसमणा एतेसिं अक्खराणं शक्रेन्द्रपुरन्दरवदेकार्थिकानि नामानि गुणनिफ्फणानि गौणानि । जम्हा पव्वज्जापरियातो पज्जोसमणावरिसेहिं गणिज्जति तेण परियागववत्थवणा भण्णति । जहा—आलोयण-वंदणाईसु जहारायणियाते कीरमाणेसु अणज्जमाणे परियाए पुच्छ भवति—कति पज्जोसमणातो गयातो उवट्ठावियस्स ? । जम्हा ^१उउबद्धिता दव्व—वखेत्त—काल—भावपज्जाया एत्थ पज्जोसविज्जंति, उज्जिज्जंति ति भणितं होई, अण्णारिसा दव्वादिपज्जाया वासारत्ते आयरिज्जंति तम्हा पज्जोसमणा भण्णति । पागतिय ति पज्जोसमण ति एयं सव्वलोगसामण्णं । पागतिया गिहत्था । एगत्थ चत्तारि मासा परिवसंतीति परिवसणा । सव्वासु दिसासु ण परिब्भमंतीति पज्जुसणा । वरिसासु चत्तारि मासा एगत्थ अच्छंतीति वासावासो । णिव्वाधातेणं पाउसे चेव वासपाउगं खित्तं पविसंतीति पढमसमोसरणं । ^२उडुबद्धाओ अण्णा मेरा ठविज्जतीति ठवणा । उडुबद्धे एक्केक्कं मासं खेतोग्गहो भवति, वरिसासु चत्तारि मासा एगखेतोग्गहो भवती ति जिड्डोगहो । एषां व्यञ्जनतो नानात्वम्, न त्वर्थतः ॥ १ ॥ २ ॥ एषामेकं ठवणाणामं परिगृह्य णिक्खेवो कज्जति—

ठवणाए णिक्खेवो, छक्को दव्वं च दव्वणिक्खेवो ।

खेत्तं तु जम्मि खेत्ते, काले कालो जहिं जो उ ॥ ३ ॥

^३ओदइयाईयाणं, भावाणं जा जहिं भवे ठवणा ।

भावेण जेण य पुणो, ^४ठविज्जए भावठवणा उ ॥ ४ ॥

१ ओबद्धिता प्रत्यन्तरे ॥ २ ओबद्धातो प्रत्य० ॥

३ उदईयाईयाणं प्रत्य० ॥ ४ ठविज्जई प्रत्य० ॥ ठविज्जइ प्रत्य० ॥

ठवणाए णिक्खेवो० गाहा [द्वयम्] णामठवणाओ गयाओ। दव्वठवणा जाणगसरीरभविय-सरीरवतिरित्ता 'दव्वं च दव्वनिक्खेवो' जाइं दव्वाइं परिभुज्जंति जाणि य परिहरिज्जंति। परिभुज्जंति तण-डगल-छार-मल्लगादि। परिहरिज्जंति सच्चित्तादि ३। सच्चित्ते सेहो ण पव्वाविज्जति, अचित्ते वत्थादि ण धेप्पति पढमसमोसरणे, मीसए सेहो सोवहितो। खेत्तड्ववणा सकोसं जोयणं, कारणे वा चत्तारि पंच जोयणाइं। कालड्ववणा चत्तारि मासा, यच्च तस्मिं कल्प्यम्। भावड्ववणा कोधादिविवेगो भासासमितिजुत्तेण य होतव्वं॥३॥४॥ एतेसिं सामित्तादिविभासा कायव्वा तत्थ गाथा—

सामित्ते करणम्मि य, अहिगरणे चेव होंति छब्भेया।

एगत्त-पुहत्तेहिं, दव्वे खेत्तड्व भावे य॥५॥

सामित्ते० गाहा। दव्वस्स ठवणा दव्वठवणा, दव्वाणं वा ठवणा दव्वठवणा, दव्वेण वा ठवणा दव्वठवणा, दव्वेहिं वा ठवणा २, दव्वम्मि वा ठवणा द० २, दव्वेसु वा ठ० २। एवं खेत्त-काल-भावेसु वि एगत्त-पुहत्तेहिं सामित्त-करणा-ऽधिकरणा भाणितव्वा। तत्थ दव्वस्स ठवणा जहा कोइ संधारणं गेण्हति, दव्वाणं जधा तिन्नि पडोगारेणं गेण्हति, दव्वेणं जधा वरिसारत्ते चउसु मासेसु एक्कसिं आयंबिलेण पारेत्ता सेसं कालं अब्भत्तड्वं करेति, दव्वेहिं मासेणं मासेणं चत्तारि आयंबिलपारणया, एवं ^१निव्विइयएणं पि, दव्वम्मि जधा एगंगिए फलए ठायव्वं, दव्वेसु जधा ^२दामादीकड्वसंधारए। खेत्तस्स एगगामस्स परिभोगो, खेत्ताणं तिगामादीणं अंतरपल्लीयादीणं, करणे एगत्त-पुहत्तेणं णत्थी, अधिकरणे एगखेत्ते परं अड्वजोयणमेराते गंतुं पडिएत्तए, पुहत्तेणं दुयमादीहिं वि अड्वजोयणेहिं गंतुं पडिएत्तए कारणे। कालस्स जा मेरा सा ठविज्जति-अकप्पिया वासारत्त^३काले ण परिधेप्पति, कालाणं चउण्हं मासाणं ठवणा, कालेण ^४आसाढपुण्णिमाए कालेण ठायंति, कालेहिं पंचाहे पंचाहे गते कारणे ठायंति, कालम्मि पाउसे ठायंति, कालेसु आसाढपुण्णिमाओ सवीसतिरायमासदिवसेसु गतेसु ठायंति कारणे। भावस्स ओदइयस्स ठवणा, भावाणं खतियं भावं ^५संकमंतस्स सेसाणं भावाणं परिवज्जणा होइ, भावेणं णिज्जरड्डाए ठाति, भावेहिं णिज्जरड्डाए संगहड्डाए वेतावच्चं करेति, भावम्मि खतोवसमिते, भावेसु णत्थि, अहवा खतोवसमिते भावे सुद्धातो सुद्धतरं एवमादिएसु परिणमंतस्स भावेसु ड्ववणा भवति॥५॥ एवं ताव दव्वादि समासेणं भणितं। इदाणि एते चेव वित्थरेण भणीहामि। तत्थ ताव पढमं कालड्ववणं भणामि। किं कारणं? जेण एतं सुत्तं कालड्ववणाए परुवेतव्वं—

कालो समयादीओ, पगयं समयम्मि तं परुवेस्सं।

णिक्खमणे य पवेसे, पाउस सरए य वोच्छामि॥६॥

कालो समयादीओ० गाथा। असंखेज्जसमया आवलिया, एवं सुत्तालावएण जाव संवच्छरं। एत्थ पुण उडुबद्धेण बासारत्तेण य पगतं, अधिगार इत्यर्थः। तत्थ पाउसे पवेसो वासावासपाउग्गे खेत्ते, सरते तातो निग्गमणं॥६॥

१ निव्विओयणं पि प्रत्यन्तरेषु॥ २ दोमादीकंखी संधारए प्रत्य०। दोमादीकं पी संधारए प्रत्यन्तरेषु॥

३ काले परिधेप्पति प्रत्य०। कालो परिधेप्पति प्रत्य०॥ ४ माकालेण प्रत्यन्तरेषु।

५ संकतस्स प्रत्यन्तरेषु॥ ६ जं एयं सुत्तं प्रत्य०॥

ऊणाइरित्तमासे अट्ठ विहरिऊण गिम्हहेमंते ।

एगाहं पंचाहं, मासं च जहासमाहीए ॥ ७ ॥

ऊणातिरित्त० गाहा । चत्तारि हेमंतिया मासा, चत्तारि गिम्हमासा, एते अट्ठ विहरंति । ते पुण अट्ठ मासा ऊण वा अतिरित्ता वा विहरिञ्जा ॥ ७ ॥ कथं पुण ऊण वा अतिरित्ता वा भवन्ति ? तत्थ ताव जहा ऊणा भवन्ति तथा भण्णति—

काऊण मासकप्पं, तत्थेव उवागयाण ऊणा ते ।

चिक्खल्ल वास रोहेण वा वि तेण द्विया ऊणा ॥ ८ ॥

काऊण० पुब्बद्धं । आसाढचाउम्मासितं पडिक्कंते, जति अण्णत्थ वासावासपाउगं खेत्तं णत्थि ताहे तत्थेव ठिता वासावासं एवं ऊणा अट्ठ मासा, जेण सत्त मासा विहरिता ॥

अहवा इमेहिं पगारेहिं ऊणा अट्ठ मासा होज्ज—

चिक्खल्ल० पच्छद्धं । जत्थ वासारत्तो कतो ततो कत्तियचाउम्मासिए ण णिग्गया । इमेहिं कारणे हिं—पंथे चिक्खल्लो तत्थ खुप्पिज्जति, वासं वा ण ओरमति, रोहगो वा जातो । जाव मग्गसिरं सव्वं ण णिग्गता, ताहे पोसे णिग्गयाणं पोसादीया आसाढंता सत्त मासा विहरिता, एवं ऊणा भवन्ति ॥ ८ ॥

इयाणिं जहा अतिरित्ता अट्ठ मासा विहरिता होज्ज तथा भण्णति—

वासाखेत्तालंभे, अद्धाणादीसु पत्तमहिगातो ।

साहगवाघाएण व, अपडिक्कमिउं जइ वयंति ॥ ९ ॥

वासाखेत्तालंभे० गाथा । साहुणो आसाढचाउम्मासिए पडिक्कंते वासावासापा^१तो गं खेत्तं मग्गंता ण लंभति, ताहे तेहिं मग्गंतेहिं ताव ण लद्धं जाव आसाढचाउम्मासियातो सवीसतिरातो मासो गतो, णवरं^२भद्दवए जोण्हस्स पंचमीए लद्धं खेत्तं तम्मि दिवसे पज्जोसवियं, एवं णव मासा सवीसतिराता विहरिता । अहवा साधू अद्धाणपडिवण्णा, सत्थवसेणं आसाढचाउम्मासियातो परेणं पंचाहेण वा दसाहेण वा जाव सवीसतिराते वा मासे खेत्तं पत्ता, एवं अतिरित्ता अट्ठ मासा विहरिता । अहवा जत्थ वासावासो कतो ततो खेत्तातो आरतो चेव कत्तियचाउम्मासियस्स णिग्गच्छंति इमेहिं कारणेहिं—कत्तीय^३पुण्णिमाते आयरियाणं णक्खत्तं असाहगं, अण्णो वा कोइ तद्दिवसं वाघातो भविस्सति ताहे अपुण्णे कत्तिए णिग्गच्छंता अतिरित्ते अट्ठ मासे विहरिस्संति ॥ ९ ॥ “एगाहं पंचाहं मासं व जहासमाधीए” (गा० ७) अस्य व्याख्या—

पडिमापडिवण्णाणं, एगाहं पंच होतऽहालंदे ।

जिण—सुद्धाणं मासो, णिक्कारणओ य थेराणं ॥ १० ॥

पडिमापडिवण्णाणं० गाहा । पडिमापडिवण्णा उडुबद्धे एक्केकं अहोरत्तं एगखेत्ते अच्छंति । अहालंदिया पंच अहोरत्ताइं एगखेत्ते अच्छंति । जिणकप्पिया मासं । सुद्धपरिहारिया एवं चेव । थेरकप्पिया णिव्वाघातेण मासं, वाघाए ऊणं वा अतिरित्तं वा मासं ॥ १० ॥

ऊणाइरित्त मासा, एवं ^१थेराणं अट्ठ णायव्वा ।

इयरे अट्ठ विहरिउं, णियमा चत्तारि अच्छंति ॥ ११ ॥

ऊणातिरित्त मासा० गाथा । ‘इयरे णाम’ पडिमापडिवण्णया ^२अहालंदिया एते ^३एवं रितित्ता उउबद्धे कहिं पुण ठातव्वं वासारत्तिया चत्तारि मासा सव्वे वि अच्छंति एगखेत्ते ॥ ११ ॥

आसाढपुण्णिमाए, ^४वासावासं तु होति ठायव्वं ।

मग्गसिरबहुलदसमीउ^५ जाव एक्कम्मि खेत्तम्मि ॥ १२ ॥

आसाढपुण्णिमाए वासावासेसु होति ठातव्वं० गाथा । आसाढपुण्णिमाए वासावासं ठातव्वं ॥ १२ ॥

बाहि ठिया वसभेहिं, खेत्तं गाहेत्तु वासापाओग्गं ।

कप्पं कहेत्तु ठवणा, ^६सावणऽसुद्धस्स पंचाहे ॥ १३ ॥

बाहि ठिया वसभेहिं० गाथा । ‘बाहि ठिय’ ति जत्थ आसाढमासकप्पो कंतो तत्थ दसमीए आरब्ध जाव आसाढमासपण्णरसी ताव वासावासपाउग्गे खेत्ते संथारय—डगलग—छार—मल्लगादी गेण्हंता वसभा भावेंति य खेत्तं साधुभावणाए । ततो आसाढपुण्णिमाए वासावासपाउग्गे खेत्ते गंतुं आसाढचाउम्मासियं पडिक्कमंति, पंचहिं दिवसेहिं पज्जोसवणाकप्पं कहेत्ति, सावणबहुलस्स पंचमीए पज्जोसवेंति । अह बाहिड्डित्तेहिं वसभेहिं ण गहिताणि छारादीणि ताहे कप्पं कहेत्ता चेव गेण्हंति मल्लगादीणि । एवं आसाढपुण्णिमाए ठिता जाव मग्गसिरबहुलस्स दसमी ताव एगम्मि खेत्ते अच्छेज्जा तिण्णि वा दसराता । एवं तिन्नि पुण दसराता चिक्खल्लादीहिं कारणेहिं ॥ १३ ॥

एत्थ तु अणभिग्गहियं, वीसतिरायं सवीसतीमासं ।

तेण परमभिग्गहियं, गिहिणातं कत्तिओ जाव ॥ १४ ॥

एत्थ उ० गाथा । ‘एत्थ’ति पज्जोसविते सविसतिरायस्स मासस्स आरतो जति गिहत्था पुच्छंति—तुब्भे अज्जो ! वासारत्तं ठिता ? अध णो ताव ठाध ? । एवं पुच्छिण्हिं जति अभिवडिद्दयसंवच्छरो जत्थ अधिमासतो पडति तो आसाढपुण्णिमातो वीसतिराते गते भण्णति ‘ठिता मो’ ति, आरतो ण कप्पत्ति वोत्तुं ‘ठिता मो’ ति । अह इतरे तिण्णि चंदसंवच्छरा तेसु सवीसतिराए मासे गते भण्णति ‘ठिता मो’ ति, आरतो ण कप्पत्ति वोत्तु ‘ठिता मो’ ति ॥ १४ ॥ किं कारणं ?—

असिवाइकारणेहिं, अहवा वासं ण सुट्ठु आरद्धं ।

अहिवड्डियम्मि वीसा, इयरेसु ^७सवीसई मासो ॥ १५ ॥

असिवादि० गाथा । कयाति असिवातीणि कारणाणि उप्पज्जेज्जा जेहिं णिग्गमणं होज्जा ताहे ते गिहत्था मण्णेज्ज—ण किंचि जाणंति एते, मुसावायं वा उल्लवेंति, जेण ‘ठिता मो’ ति भणित्ता णिग्गया ।

१ थेराण होति णायध्वा प्रत्यन्तरेषु ॥ २ निशीथचूर्णौ “अहालंदिया विसुद्धपरिहारिया जिणकप्पिया य” इति पाठः ॥ ३ एवं विहरित्ता प्रत्यन्तरे ॥ ४ वासावासेसु होति प्रत्य० ॥ ५ मीए जाव प्रत्य० ॥ ६ वासाणं सुद्धदसमीए निर्युक्तिप्रत्यन्तरेषु ॥ ७ सविसओ मासो प्रत्य० ॥

अहवा वासं ण सुट्ठु आरद्धं, तेण लोगो भीतो धण्णं झंपितुं ठितो, साधूहिं भणितं 'ठिया मो' त्ति, जाणंति एते—वरिसिस्सति तो मुयामो धण्णं, विक्किणामो अधिकरणं, घराणि य छंति, हलादीण य संठप्पं करंति। जम्हा एते दोसा तम्हा वीसतिराते अगते सवीसतीराते वा मासे अगते ण कम्पति वोत्तुं 'ठिता मो' त्ति ॥ १५ ॥

एत्थ तु पणगं पणगं, कारणियं ^१जा सवीसतीमासो ।

सुद्धदसमीठियाणं व, आसाढीपुण्णिमोसरणं ॥ १६ ॥

एत्थ तु० गाहा। आसाढपुण्णिमाए ठियाणं जति तण्डगलादिणि गहियाणि ^२पज्जोसवणाकप्पो य कहितो सावणबहुलपंचमीए पज्जोसर्वेति। असति खेत्ते सावणबहुलदसमीए, असति खेत्ते सावणबहुलस्स पण्णरसीये, एवं पंच पंच ओसारंतेण जाव असति भद्वत्तसुद्धपंचमीए, अतो परेणं ण वट्ठति अतिकामेतुं। आसाढपुण्णिमातो आढत्तं मग्गंताणं जाव भद्वयजोण्हस्स पंचमीए इत्थंतरे जति ण लद्धं ताहे जति रुक्खहेट्ठे ठितो तो वि पज्जोसव्वेतव्वं। एतेसु पव्वेसु जहालंभेण पज्जोसवेयव्वं, अप्पव्वे ण वट्ठति ॥

कारणिया चउत्थी वि अज्जकालएहिं पवत्तिता। कहं पुण ? —उज्जेणीए णगरीए बलमित्तभागुमित्ता रायाणो। तेसिं भाइणेज्जो अज्जकालएण पव्वावितो। तेहिं रादीहिं पदुट्ठेहिं अज्जकालतो निव्विसतो कतो सो पइट्ठाणं आगतो। तत्थ य सातवाहणो राया सावगो। तेण समणपूयणओच्छणो पवत्तितो, अंतेउरं च भणियं—अमावसाए उववासं काउं “अट्ठमिमादीसु उववासं कातुं” इति पाठान्तरम् पारणए साधूणं भिक्खं दाउं पारिज्जह। ^३अध पज्जोसमणादिवसे आसण्णीभूते अज्जकालएण सातवाहणो भणितो— भद्वयजोण्हस्स पंचमीए पज्जोसवणा। रण्णा भणितो—तद्विवसं मम इंदो अणुजायव्वो होहिति तो ‘ण पज्जुवासिताणि चेतियाणि साधुणो य भविस्संति’ त्ति कातुं तो छट्ठिए पज्जोसवणा भवतु। आयरिएण भणियं—न वट्ठति अतिकामेतुं। रण्णा भणितं—तो चउत्थीए भवतु। आयरिएण भणितं—एवं होउ—त्ति चउत्थीए कता पज्जोसवणा। एवं चउत्थी वि जाता कारणिता ॥

“सुद्धदसमीठियाण व आसाढपुण्णिमोसरणं” ति जत्थ आसाढमासकप्पो कतो, तं च खेत्तं वासावासपाउग्गं अण्णं च खेत्तं णत्थि वासावासपाउग्गं, अहवा अब्भासे चेव अण्णं खेत्तं वासावासपाउग्गं, सव्वं च पडिपुण्णं संथारडगलकादी काइयभूमी य बद्धा, वासं च गाढं अणोरयं आढत्तं, ताहे आसाढपुण्णिमाए चेव पज्जोसविज्जति। एवं पंचाहपरिहाणिमधिकृत्योच्यते ॥ १६ ॥

इय सत्तरी जहण्णा, असीति णउती दसुत्तरसयं च।

जइ वासति मग्गसिरे, दस राया तिण्णि उक्कोसा ॥ १७ ॥

इय सत्तरी० गाहा। ‘इय’ उपप्रदर्शनि। जे आसाढचाउम्मासियातो सवीसतिराते मासे गते पज्जोसर्वेति तेसिं सत्तरी दिवसा जहण्णतो जेड्ढोग्गहो भवति। कहं पुण सत्तरी ? चउण्हं मासाणं सवीसं दिवससत्तं भवति, ततो सवीसतिरातो मासो पण्णासं दिवसा सोधिया, सेसा सत्तरिं दिवसा जे भद्वयजोण्हस्स दसमीए पज्जोसर्वेति तेसिं असीतिं दिवसा जेड्ढोग्गहो। जे सावणपुण्णिमाए पज्जोसर्वेति तेसिं ^४णउतिं दिवसा जेड्ढोग्गहो। जे सावणबहुलदसमीए ठिया तेसिं दसुत्तरं दिवससत्तं जेड्ढोग्गहो। एवमादीहिं पगारेहिं वरिसारत्तं

१ नाव वीसती प्रत्यन्तरेषु ॥ २ पज्जवसणाकप्पो प्रत्य० ॥ ३ अण्णया पज्जोसवणादिवसे आसण्णे आगते अज्जकालएण प्रत्य० ॥ ४ णतुर्ति प्रत्य० ॥

एगखेत्ते अच्छित्ता कत्तियचाउम्मासिए णिगंतव्वं। अथ वासं ण ओरमति तो मग्गसिरे मासे जद्विवसं^१पक्कमट्टियं जातं तद्विवसं चेव णिगंतव्वं। उक्कोसेणं तिण्णि दसरायाण निग्गच्छेज्जा, मग्गसिरपुण्णिमाए त्ति भणियं होइ। मग्गसिरपुण्णिमाते परेण जति^२विप्लवंतेहिं (?) तह णिगंतव्वं। अध ण णिग्गच्छन्ति तो चउलहुगा। एवं पंचमासिओ जेड्डोग्गहो जातो॥१७॥

काऊण मासकप्पं, तत्थेव^३ठियाणऽतीए मग्गसिरे।

सालंबणाण छम्मासितो तु जेड्डोग्गहो होति॥१८॥

काऊण० गाहा। आसाढमासकप्पं काउं जति अण्णं वासावासपाउग्गं खेत्तं णत्थि, तं चेव वासावासपाउग्गं जत्थ आसाढमासकप्पो कतो, तो तत्थेव पज्जोसविते; आसाढपुण्णिमाते वा सालंबणाणं मग्गसिरं पि सव्वं वासं ण ओरमति तेणं ण णिगता, असिवादीणि वा बाहिं, एवं सालंबणाणं छम्मासितो जेड्डोग्गहो। बाहिं असिवादीहिं जहि वाघातो अण्णवसहीए ठंति, जतणाविभासा कातव्वा॥१८॥

जइ अत्थि पयविहारो, चउपाडिवयम्मि होइ गंतव्वं।

अहवा वि अणितस्सा, आरोवण पुव्वनिद्धि॥१९॥

जति अत्थि पदविहारो० गाहा। कंठा। कुत्र निद्धि? निसीथे॥१९॥ कयाइ अपुण्णे वि चाउम्मासिए निग्गमेज्जा इमेहिं कारणेहिं—

काईयभूमी संथारए य संसत्त दुल्लहे भिक्खे।

एएहिं कारणेहिं, अप्पत्ते होइ णिग्गमणं॥२०॥

राया सप्पे कुंथू, अगणि गिलाणे य थंडिलस्सऽसति।

एएहिं कारणेहिं, अप्पत्ते होति णिग्गमणं॥२१॥

काईय० गाहा [द्वयम्]। काईयभूमी संसत्ता उदएण वा पेल्लिता^४। संथारगा संसत्ता। अन्नातो वि तिण्णि वसधीओ णत्थि, अहवा तासु वि एस चेव वाघातो। राया वा पदुड्डो। गिलाणो वा जाओ विज्जनिमित्तं अतिक्रंते वि अच्छिज्जति॥२०॥२१॥

वासं व ण ओरमई, पंथा वा दुग्गमा सचिक्खल्ला।

एएहिं कारणेहिं, अइकंते होइ णिग्गमणं॥२२॥

असिवे ओमोयरिए, राया दुट्ठे भए व गेलण्णे।

एएहिं कारणेहिं, अइकंते होति णिग्गमणं॥२३॥

वासं व ण ओरमंती० गाथाद्वयं कंठं॥२२॥२३॥ एस कालडुवणा। इयाणि खेत्तडुवणा—

उभओ वि अद्धजोयण, सअद्धकोसं च तं हवति खेत्तं।

होइ सकोसं जोयण, मोत्तूणं कारणज्जाए॥२४॥

१. एकमट्टियं प्रत्य०। पक्कमज्जियं प्रत्य०॥ २. विप्लवंतेहि प्रत्य०॥ ३. ठियाण जाव मग्ग प्रत्य०॥ ४. पिलिया प्रत्य०॥

उभओ० गाथा। जम्मि खेत्ते वासावासं ठायंति तत्थ 'उभतो' सव्वतो समंता सकोसं जोयणं उग्गहो कातव्वो। कहं पुण ? सव्वतो समंता छ दिसातो, पुव्वा दाहिणा अवरा उत्तरा उड्ढा अधा। चत्तारि विदिसातो असंववहारिगीओ एगपएसियाओ त्ति कातुं मुक्कातो। तासु छसु दिसासु एक्केक्काए अद्धजोयणं अद्धकोसं च भिक्खायरियाए गम्मति, गतपडियागतेणं सकोसं जोयणं भवति॥२४॥

कथं पुण छद्दिसातो भवंति ? उच्यते—

उड्ढमहे तिरियम्मि य, सकोसयं सव्वतो हवति खेत्तं।

इंदपयमाइएसुं, छद्दिसि इयरेसु चउ पंच॥२५॥

तिण्णि दुवे एक्का वा, वाघाएणं दिसा हवइ खेत्तं।

उज्जाणाओ परेणं, छिण्णमडंबं तु अक्खेत्तं॥२६॥

उड्ढमहे० गाथा [द्वयम्] 'इंदपदे' गयगपदे पव्वते उवरिं पि गामो, हिड्ढा वि गामो, 'उड्ढुच्चतस्स मज्झम्मि वि गामो, मज्झिल्लगामस्स चउसु वि दिसासु गामा। मज्झिल्लगामे ठिताणं छद्दिसातो भवंति। आदिग्गहणेणं जो अण्णो वि एरिसो पव्वतो होज्ज तस्स वि छद्दिसातो भवंति। 'मोत्तुं'ति एरिसं पव्वयं मोत्तुं अण्णम्मि खेत्ते चत्तारि वा दिसातो उग्गहो भवति पंच वा॥२५॥

ण केवलं एत्तियाओ चेव, तिन्नि दुवे वा एक्का वा दिसा वाघाएणं होज्जा। को पुण वाघातो ? अडवि-उज्जाणाओ परेणं पव्वयादि विसमं वा पाणियं वा, एतेहिं कारणेहिं एयाओ दिसाओ रुद्धियातो होज्जा जेण गामो णत्थि, सति वि गामे अगम्मो होज्ज। 'छिण्णमडंबं णाम' जस्स गामस्स वा णगरस्स वा सव्वासु वि दिसासु उग्गहे गामो णत्थि, तं च अक्खेत्तं णायव्वं॥२६॥ जाए दिसाते जलं ताते दिसाए इमं विहिं जाणेज्जा—

दगघट्ट तिन्नि सत्त व, उडु-वासासु ण हणंति तं खेत्तं।

चउरट्ठाति हणंती जंघद्धेक्को वि उ परेणं॥२७॥

दगघट्ट० गाथा। 'दगसंघट्टो नाम' जत्थ जाव अद्धं जंघाए उदगं। उडुबद्धे तिन्नि संघट्टा जत्थ भिक्खायरियाए, गतागतेणं छ। वासासु सत्त, ते गतागतेणं चोद्धस भवंति। एतेहिं ण उवहम्मति खेत्तं॥२७॥ खेत्तट्ठवणा गता। दव्वट्ठवणा इदाणि—

दव्वट्ठवणाऽऽहारे१, विगई२ संथार३ मत्तए४ लोए५।

सच्चित्ते६ अच्चित्ते७, वोसिरणं, गहण-धरणाइं॥२८॥ दारगाहा॥

पुव्वाहारोसवणं, जोगविवट्ठी य सत्तिउग्गहणं।

संचइय असंचइए, दव्वविवट्ठी पसत्था उ॥२९॥

दव्वट्ठवणाहारे० गाथा। पुव्वाहारो० गाहा। दव्वठवणाए आहारे चत्तारि मासे णिराहारो अच्छु। ण तरति तो एगदिवसूणे। एवं जति जोगहाणी भवति तो जाव दिणे दिणे आहारेतुं जोगवुड्ढी—जो णमोक्कारेणं पारेंतओ सो पोरिसीते पारेतु, पोरिसिइत्तो पुरिमट्ठेण, पुरिमट्ठइत्तो एक्कासणएण। किं कारणं ?

वासासु चिक्खल्लचिलिच्चिलं, दुक्खं सण्णाभूमिं गम्मति, थंडिल्लाणि य पउराणि हरितकाएण उवहताणि गता आहारठवण ति। इदाणि विगतिठवण ति—

“संचइय असंचइए दव्वविवट्ठी पसत्था उ”। विगती दुविधा—संचइया असंचइया य। तत्थ असंचइया ^१खीरं दधिं मंसं णवणीओगाहिमगा य, सेसाओ घय-गुल-मधु-मज्ज-खज्जविहाणाओ संचइयाओ। तत्थ मज्जविहाणाओ अप्सत्थाओ, सेसाओ पसत्थाओ॥२६॥ आसामेकतरा परिगृह्योच्यते—

विगतिं विगतीभीओ, विगइयं जो ^२उ भुंजए भिक्खू।

• विगईविगयसभावं, विगती विगतिं बला नेइ॥३०॥

विगतिं० गाथा। तं आहारेत्ता संयतत्वादसंयतत्वं विविधैः प्रकारैः गच्छिहिति विगतिं। ‘विगतीभीतो’ ति संयतत्वादसंयतत्वगमनं तस्स भीतो। ‘विगतिगतं’ भत्तं पाणं वा विगतिमिस्सं ण भोत्तव्वं। जो पुण भुंजति तस्स इमे दोसा—विगती० पच्छद्धं। विगतीए विगतो संजयभावो जस्स सो विगतीविगतसभावो, तं विगतीविगतसभावं सा विगती आहारिया बला विगतिं नेति। ‘विगती णाम’ असंयतत्वगमनम्। जम्हा एते दोसा तम्हा णव रसविगतीतो ओगाहिमगदसमातो णाऽऽहारेतव्वातो। ण तहा उडुबद्धे जथा वासासु, वासासु सीयले काले अतीव मोहुब्भवो भवति गज्जितविज्जुयाईणि य दद्धं सोउं च॥३०॥ ^३भवे कारणं अहारेज्जा वि गेलण्णेणं। आयरिय-बाल-वुड्ड-दुब्बलसंघयणाणं गच्छोवग्गहट्ठताए धेप्पेज्जा। अहवा सट्ठा णिबंधेण णिमंतेंति पसत्थाहिं विगतीहिं तत्थ गाहा—

पसत्थविगईगहणं, गरहियविगतिग्गहो य कज्जम्मि।

गरहा लाभ पमाणे, पच्चय पावप्पडीघाओ॥३१॥

पसत्थविगतीगहणं० गाथा। ताधे जाओ असंचइयाओ खीर-दधि-ओगाधिमगाणि य ताओ असंचइयातो धेप्पंति, संचइयातो ण धेप्पंति घत-तेल्ल-गुल-णवणीयादीणि। पच्छा तेसिं खते जाते जता कज्जं भवति तदा ण लब्भंति तेण ताओ ण धेप्पंति। अह सट्ठा ^४णिबंधेण णिमंतेंति ताधे भण्णति जदा कज्जं भविस्सति तदा गेण्हीहामो बालादि, बाल-गिलाण-वुड्ड-सेहाण य बहूण कज्जाणि उप्पज्जंति, महंतो य कालो अच्छति। ताहे सट्ठा तं भणंति-जाव तुब्भे समुदिसह ताव अत्थि चत्तारि वि मासा। ताहे णाऊण गेण्हंति जयणाए। संचइयं पि ताधे धेप्पति जहा तेसिं सट्ठाणं सट्ठा वट्ठति। अव्वोच्छिन्ने भावे चेव भणंति—होतु अलाहि पज्जत्तं ति। सा य गहिया थेर-बाल-दुब्बलाणं दिज्जति, बलिय-तरुणाणं ण दिज्जति, तेसिं पि कारणे दिज्जति। एवं पसत्थविगतिग्गहणं। अपसत्था ण घेतव्वा। सा वि गरहिता विगती कज्जेण धेप्पति इमेण “वासावासं पज्जोसविताणं अत्येगतियाणं एवं वुत्तपुव्वं भवति—‘अट्ठो भंते! गिलाणस्स?’ तस्स य गिलाणस्स वियडेणं पोग्गलेणं वा कज्जं, से य पुच्छितव्वे-केवतिएणं से अट्ठो? जं से पमाणं वदति ‘एवतिएणं मम कज्जं’ तप्पमाणतो घेतव्वं।” एयम्मि कज्जे वेज्जसंदेसेण वा अण्णत्थ वा कारणे आगाढे जस्स सा अत्थि सो विण्णविज्जति, तं च से कारणं दीविज्जति, एवं जाइते समाणे लभेज्जा, जाधे य तं पमाणपत्तं भवति जं तेण गिलाणेण भणितं ताहे भण्णति—‘होतु अलाहि’ ति वत्तव्वं सिया। ताहे तस्यापि प्रत्ययो भवति—सुव्वत्तं एते गिलाणट्ठयाए मग्गंति, ण एते अप्पणो अट्ठाए मग्गंति, जति

१ खीरदधिणव° प्रत्य०॥ २ उ गिण्हए भिक्खू प्रत्य०॥ ३ भवति कारणं प्रत्य०॥ ४ णिब्बंधंति ताहे प्रत्यन्तरेषु॥

पुण अप्पणो अट्ठाते मग्गंता तो दिज्जंतं पडिच्छंता जावतियं दिज्जति। जे वि य पावा तेसिं पि पडिघातो कतो भवति, ते वि जाणंति—जथा तिण्णि दत्तीतो गेण्हंति, सुव्वत्तं गिलाणट्ठाए। से णं एवं वदंतं “अलाहि, ^१पडिग्गाहेहि भंते! तुमं पि भोक्खसि ^२वा पाहिसि वा, एवं से कप्पति पडिग्गाहित्तए, नो से कप्पति गिलाणणीसाए पडिग्गाहित्तए” ॥ ३१ ॥ एवं ^३विगतिठवणा गता। इदाणि संधारे त्ति—

कारणओ उडुगहिते, उज्झिऊण गेण्हंति अण्णपरिसाडी।

दाउं गुरुस्स तिण्णि उ, सेसा गेण्हंति एक्केक्कं ॥ ३२ ॥

कारण० गाहा। संधारया जे उडुबद्धिया कारणे गहिया ते वोसिरिज्जंति, अण्णेसिं गहणं धारणं च ॥ ३२ ॥ संधारे त्ति गतं। इदाणि मत्तए त्ति—

^४उच्चार-पासवण-खेलमत्तए तिण्णि तिण्णि गेण्हंति।

संजय-^५आएसट्ठा, भुंजेज्जवसेस उज्झंति ॥ ३३ ॥

उच्चार० गाथा। उच्चार-पासवणमत्तया जे उडुबद्धे कारणेणं गहिया खेलमतो य ते वोसिरिज्जंति, अण्णेसिं गहणं धारणं च। एक्केक्के तिण्णि तिण्णि उच्चार-पासवण-खेलमत्तगे य गेण्हंति, उभयोकालं पि पडिलेहिज्जंति। जति वुड्डी ण पडति ण परिभुंजंति दिया वा रातो वा, परिभुंजंति मासलहुं। जाहे वासं पडति ताधे परिभुंजंति, जेण अभिग्गहो गहितो सो परिट्ठवेति। जदा णत्थि तदा अप्पणा परिट्ठवेति। ताव सो णिव्विसियव्वो जाव कज्जं करेति। उल्लतो ण णिक्खिप्पति, विसुयावेत्ता णिक्खिप्पइ। सेह-अपरिणताणं ण दाविज्जति ॥ ३३ ॥ मत्तए त्ति गतं। [इदाणि लोए त्ति—]

धुवल्लोओ उ जिणाणं, णिच्चं थेराण वासवासासु।

असहू गिलाणगस्स व, णात्तिकामेज्ज तं रयणिं ॥ ३४ ॥

धुवल्लोओ उ० गाहा। ^६धुत्तेस-मंसुणा भवितव्वं। गच्छणिग्गताणं धुवल्लोओ निच्चं। गच्छवासीणं पि थेरकप्पियाणं ति वासावासे उस्सग्गेणं धुवल्लोतो कातव्वो। अध ण तरति असहू वा ताधे सा रयणी णात्तिकमेयव्वा ॥ ३४ ॥ लोए त्ति गतं। सचित्तं—

मोत्तुं पुराण-भावियसट्ठे संविग्ग सेस पडिसेहो।

मा णिट्ठओ भविस्सइ, भोयण मोए य उट्ठाहो ॥ ३५ ॥ दारं।

[मोत्तुं पुराण० गाहा] सेहं वा सेहीं वा जति पव्वावेति चउगुरुं आणादि विराहणा, सो ताव जीवे ण सद्वहति। कथं? जति भण्णति ‘एते आउक्काइया जीवा’ तं च कालं ते पुणो दुक्खं परिहरितुं, ताधे सो भण्णति—जति एते जीवा तो तुब्भे णिव्वयमाणे किं हिंडध तुब्भे किर अहिंसया? एवं ण सद्वहति। पादे ण धोवंति जति ताहे सो भण्णति—समलचिकखल्लं मदिरुणं पाए वि ण धोवंति ताहे दुगुंछति, किं एतेहिं समं अच्छित्तेण असुयीहिं? ति गच्छेज्जा। अह धोवेतिं सागारियं ति बाउसदोसा। वासे पडंते सो पडिस्सयाओ ण णीति, सो य उवस्सगो डहरगो ताहे जति मंडलीए समुदिसंते पासति

१ पडिलाहेहि प्रत्य० ॥ २ वा दाहिसि वा प्रत्य० ॥ ३ विगतीण ठवणा प्रत्य० ॥ ४ उच्चारे पासवणे, खेलमि य मत्त तिण्णि गिण्हंति। इति प्रत्यन्तरेषु पाठः ॥ ५ ° आएसए मिज्जेज्जवसे° प्रत्य० ॥ ६ धुवकेस° प्रत्यन्तरेषु। नायं पाठः साधुः ॥

तो उद्धाहं करेति विप्परिणमति य, अण्णेहि य संसट्ठयं समुद्दिसावितो पच्छा वच्चति। अध मंडलीए ण समुद्दिसंति तो सामायारिविराधणा समता य ण कता भवति। जति वा णिसग्गमाणा मत्तएसु उच्चार-पासवणाणि आयरंति तं दट्ठूण गतो समाणो उद्धाहं करेज्ज। अध धरंति तो आयविराहणा। अध ^१निसग्गं ते णिति तो संजमविराधणा। एवमादी दोसा जम्हा तम्हा ण पच्चावेयच्चा। भवे कारणं पच्चावेज्जा-पुराणो वा ^२अभिगतसट्ठो वा अधवा कोति राया रायमच्चो वा अतिसेसी वा अव्वोच्छित्ति वा काहिति त्ति पच्चावेति, ताधे पुण विवित्ता वसही महती य धेप्पति। जति जीवे चोएति तत्थ पण्णविज्जति, पादाण य से कप्पो कीरति, समुद्देसे उच्चारदिसु य जंयणाए जयंति आयरंति, अण्णं पडिस्सयं वा धेत्तूण जतणाए उवचरिज्जति॥ ३५॥

इदाणिं अच्चित्ताणं छार-डगलय-मल्लयादीणं उडुबद्धे गहियाणं वासासु वोसिरणं, वासासु [गहणं] धरणं [च]। छाराईणि जति ण गिण्हति मासलहुं, जा य तेहिं विणा विराधणा गिलाणादीण भविस्सति। भायणे विराधणा लेवेण विणा तम्हा धेत्तव्वाणि। छारो एक्के कोणे पुंजो घणो कीरति, तलिया विक्किंचिज्जति, जदा ण विक्किंचितातो तदा छारपुंजे णिहम्मंति। 'मा ^३पणतिज्जिस्सं ति' उभतो काले पडिलेहिज्जति ताओ छारो य। जता अवगासो भूमीए नत्थि छारस्स तदा कुंडगा भरिज्जति। लेवो समाणेऊण भाणस्स हेड्डा कीरति, छारेण ^४उग्गुंडिज्जति, स च भायणेण समं पडिलेहिज्जति। अध अच्छंतयं भायणं णत्थि ताहे—मल्लयं लेवेऊण भरिज्जति पडहत्थं पडिलेहिज्जति य। एवं एसा सीमा भणिता—काणति गहणं, काणति धरणं काणति वोसिरणं, काणति तिण्णि वि॥

दव्वड्डवणा गता। इयाणिं भावड्डवणा—

इरि-एसण-भासाणं, मण वयसा काइए य दुच्चरिए।

अहिगरण-कसायाणं, संवच्छरिए विओसवणं॥ ३६॥

इरिएसण० गाहा। इरि-एसण-भासागहणेणं आदाणणिकखेवणासमिती-पारिड्ढावणियासमितीतो वि गहियातो भवंति। एयासु पंचसु वि समितीसु वासासु उवउत्तेण भवितव्वं॥ ३६॥

एवमुक्ते चोदकाऽऽह—उडुबद्धे किं असमिएण भवियव्वं जेण भण्णति वासासु पंचसु समितीसु उवउत्तेण भवियव्वं? उच्यते—

कामं तु सव्वकालं, पंचसु समितीसु होइ जइयव्वं।

वासासु अहीगारो, बहुपाणा मेइणी जेणं॥ ३७॥

कामं० गाथा। 'कामं' अवधृतार्थे। यद्यपि 'सर्वकालं' सदा समितेण होतव्वं तथा वि वासासु विसेसो कीरति, जेणं तदा बहुपाणा पुढमी आगासं च॥ ३७॥ एवं ताव सव्वसिं सामण्णं भणितं। इयाणिं एक्केक्काए पिधप्पिधं असमितस्स दोसा भण्णंति—

भासणे संपाइवहो, दुण्णेओ नेहछेओ तइयाए।

इरिय चरिमासु दोसु वि, अपेह-अपमज्जणे पाणा॥ ३८॥

१ निसग्गं ते णिति तो प्रत्यन्तरेषु। निस्संक मग्गंते णिति तो प्रत्य०॥ २ अभिगमसट्ठो प्रत्य०॥

३ 'मा पनकयिष्यन्ति' पनकमयं मा भूवन् इत्यर्थः॥ ४ ओग्गुंडिज्जति प्रत्य०॥ गुंडिज्जति प्रत्य०॥

भासणे० गाहा। अणाउत्तं भासंतस्स संपादिमाणं पाणाणं वाघातो भविस्सति, ^१आदिग्गहणेणं आउक्कायफुसिताओ सच्चित्तवातो य मुहे पविसति। 'ततिया णाम' एसणासमिती, अणाउत्तस्स उदउल्लाणं हत्थमत्ताणं ['णेह] छेदो णाम' उदउल्लविभत्ति दुक्खं णज्जति। 'चरिमातो णाम' आदाणणिकखेवणासमिती पारिद्धावणियासमिती य। इरियासमितीअणुवउत्तो सुहुमाओ मंडुक्कलियादीओ हरिताणि य न परिहरति। आदाणणिकखेवणासमितीए पारिद्धावणियासमितीए य अणुवउत्तो पडिलेहणपमज्जणासु दुप्पडिलेहित-दुप्पमज्जितं करेति, ण वा पमज्जेज्ज पडिलेहिज्ज वा। समितीणं पंचण्ह वि उदाहरणाणि।

इरियासमितीए उदाहरणं—एगो साहू इरियासमितीए जुत्तो। सक्कस्स आसणं चलितं। सक्केण देवमज्जे पसंसिओ। मिच्छादिट्ठी देवो असद्वहंतो आगतो मक्खियप्पमाणातो मंडुक्कलियातो विगुव्वति, पिट्ठतो हत्थिमयं, गतिं ण भिंदति, हत्थिणा य उक्खिवितुं पाडितो ण सरीरं पेहति, 'सत्ता मारित' ति जीवदयापरिणतो ॥

अधवा इरियासमितीए **अरहणतो**—देवताए पादो छिन्नो, अन्नाए संधितो य ॥

भासासमितीए—साधू णगररोहए वट्टमाणे भिक्खाए णिग्गतो पुच्छितो भणति—^२बहुं सुणेति कण्णेहिं० सिलोगो ॥ २ ॥

एसणासमितीए **णंदिसेणो, वसुदेवस्स** पुव्वभवो कधेतव्वो ॥

अहवा इमं दिट्ठिवातिथं—पंच संजया महल्लातो अद्धाणातो तण्हासुहाकिलंता णिग्गता। वियालियं गता पाणयं मग्गति। अणेसणं लोगो करेति। ण लद्धं। कालगता पंच वि ॥ ३ ॥

आदाणभंडमत्तणिकखेवणासमितीए उदाहरणं—आयरिएण साधू भणितो—गामं वच्चाभो। उग्गाहिए संते केणति कारणेण ठिता। एक्को 'एत्ताहे पडिलेहितं' ति कातुं ठवेउमारद्धो। साधूहिं चोतितो भणति—किं एत्थं सप्पा अच्छंति?। सण्णिहिताए देवयाए सप्पो विगुव्वितो। एस जहण्णो असमितो ॥

अन्नो तेणेव विहिणा पडिलेहिता ठवेति सो उक्कोसतो समितो। उदाहरणं—एगस्साऽऽयरियस्स पंच सिस्ससयाइं। एत्थं एगो सेट्ठिसुतो पव्वइतो। सो जो जो साधू एति तस्स तस्स डंडयं णिक्खिवति। एवं तस्स उट्ठियस्य अच्छंतस्स अण्णो एति अण्णो जाति तहा वि सो भगवं अतुरियं अचवलं उवरिं हेट्ठा य पमज्जेत्ता ठवेति एवं बहुणा वि कालेणं ण परितम्मति ॥ ४ ॥

पंचमाए समितीए उदाहरणं **धम्मरुयी**। सक्कासणचलणं। पसंसा। मिच्छादिट्ठिदेवआगमणं। पिपीलियाविगुव्वणं। काइयाडा संजता। वाहाडितो य मत्ततो। णिग्गतो पेच्छति, संसत्तं थंडिल्लं। 'साधू परिताविज्जति' ति पपीतो। देवेण वारितो। वंदितुं गतो ॥

बितितो चेल्लतो काइयाडो ण वोसिरति। देवयाए उज्जोतो कओ। एस समितो ॥

इमो असमितो—चउवीसं उच्चारपासवणभूमीतो तिण्णि कालभूमिओ य ण पडिलेहेति। चोदितो भणति—किं एत्थ उट्ठो भवेज्जा? देवता उट्ठस्सुवेणं थंडिले ठिता। बितिए गतो तत्थ वि एवं, ततियए

१ अत्र यद्यपि चूर्णिकृता "आदिग्गहणेणं" इत्याद्युक्तम्, किंचास्यां गाथायां 'आदि'पदमेव नास्तीत्यत्र तद्विदः प्रमाणम्। पाठभेदो वा चूर्णिकृदग्रे भविष्यति, न चोपलब्धः सोऽस्माभिः कुत्राप्यादर्शः ॥

२ बहुं सुणेति कण्णेहिं, बहुं अच्छीहिं पेच्छति।

न य दिट्ठं सुयं सव्वं, भिक्खू अक्खाउमरिहति ॥ १ ॥ इति संपूर्णः श्लोकः ॥

वि, ताहे तेण उडुवितो। ताहे देवयाते पडिचोतिओ सम्मं पडिवन्नो। ५॥३८॥ इदाणि “मण वयसा काइए य दुच्चरिए” ति अस्य व्याख्या—

मण वयण कायगुत्तो दुच्चरियाइं तु खिप्पमालोए। दारं।

अहिगरणम्मि दुरूयग, पज्जोए चेव दमए य॥३९॥

मण० पुव्वद्धं कंठं। गुत्तीणं उदाहरणानि।

मणोगुत्तीते—एगो सेट्टिसुतो सुण्णघरे पडिमं ठितो। पुराणभज्जा से सण्णिरोहमसहमाणी उब्भामइल्लेण समं तं चेव घरमतिगता। पल्लंकखिल्लएण य साधुस्स पादो विद्धो। तत्थ अणायारं आयरति। ण य तस्स भगवतो मणो विणिग्गतो सट्ठाणातो १॥

वतिगुत्तिए—सण्णावगसगासं साधू पत्थि तो। चोरेहिं गहिओ वुत्तो य। मातापितरो से विवाहणिमित्तं एंताणि दिट्ठाणि। तेहिं णियत्तितो। तेण तेसिं वड्ढुत्तेण ण कहितं। पुणरवि चोरेहिं गहियाणि। साधू य पुणो तेहिं दिट्ठो। ‘स एवायं साधू’ ति भणिऊण मुक्को। इतराणि वि ‘तस्स वड्ढुत्तस्स मातापितरो’ ति काउं मुक्काणि॥२॥

कायगुत्तीए—साधू हत्थिसंभमे गतिं ण भिंदति, अद्धाणपडिवन्नो वा ३॥३९॥

इदाणि अधिकरणे ति दारं—असमितस्स वोसिरणं, समितत्तणस्स गहणं, अधिकरणं न कातव्वं, पुव्वुप्पन्नं वा ण उदीरेतव्वं, वितोसवेतव्वं। दिट्ठतो कुंभकारेण—

एगबइल्ला भंडी, पासइ तुब्भे य डज्झ खलहाणे।

हरणे ज्ञामण जत्ता, भाणगमल्लेण घोसणया॥४०॥

अप्पिणह तं बइल्लं, दुरूतगा! तस्स कुंभयारस्स।

मा भे डहीहि गामं, अन्नाणि वि सत्त वासाणि॥४१॥

एगो कुंभकारो भंडि कोलालभंडस्स भरेऊण दुरूतयं णाम पच्चंतं गामं गतो। तेहिं दुरूतइच्चोहिं गोहेहिं तस्स एगं बइल्लं हरिउकामेहिं वुच्चति—पेच्छह इमं अच्छेरं ‘भंडी एगेण बइल्लेण वच्चइ;। तेण भणितं—पेच्छह इमस्स गामस्स खलहाणाणि डज्झंति ति। तेहिं तस्स सो बइल्लो हरितो। तेण जातिता—देह बइल्लं। तेणा भणंति—तुमं एकेण चेव बइल्लेण आगतो। जाहे ण दिति ताहे तेण पतिवरिसं खलीकतं धण्णं सत्त वासाणि ज्ञामितं। ताहे दुरूतयगामेल्लएहिं एगम्मि महामहे भाणतो भणितो—उग्घोसेहिं जस्स अवरद्धं तं मरिसावेमो, मा णे सकुले उच्छादेतु। भाणएण उग्घोसितं। ततो कुंभकारेण भण्णति—अप्पिणध तं बतिल्लं० गाहा। पच्छा तेहिं विदिण्णो, खामितो॥

जति ताव तेहिं असंजतेहिं अण्णाणीहिं होंतएहिं खामितो एत्तिया अवराधा, तेण वि य खंतं, किमंग पुण संजएहिं नाणीहिं होंतएहिं जं कतं तं सव्वं पज्जोसवणाए उवसामेतव्वं॥४०॥४१॥ अहवा दिट्ठतो उद्दायणो राया—

१ हरणे ज्ञामण भाणग घोसणया मल्लजुद्धेसु इति निशीथभाष्ये पाठः॥

२ खमियं प्रत्य०॥

‘चंपा कुमारनंदी, पंचऽच्छर थेरनयण दुमऽवलए ।
 विह ३पासणया सावग, इंगिणि उववाय णंदिसरे ॥ ४ ॥
 वोहण पडिमा उदयण, पभावउपाय देवदेत्ताते ३ ।
 मरणुववाए तावस, णयणं तह भीसणा समणा ॥ ४३ ॥
 गंधार गिरी देवय, पडिमा गुलिया गिलाण पडियरणे ।
 पज्जोयहरण दोक्खर रण गहणा ४ मेऽज्ज ओसवणा ॥ ४४ ॥
 दासो दासीवतितो, छत्तट्टिय जो घरे य वत्थव्वो ।
 आणं कोवेमाणो, हंतव्वो, वंधियव्वो य ॥ ४५ ॥

तारिसे अवराधे ‘पज्जोओ सावगो’ति कातूण मोत्तूण खामित्तो । एवं साधुणा वि पज्जोसवणाए परलोगभीतेण सव्वं खामेतव्वं ॥ ४२ ॥ ४३ ॥ ४४ ॥ ४५ ॥ अहवा—

खद्धाऽऽदाणियगेहे, ५पायस दट्ठूण चेडरूवाइं ।
 पियरोभासण खीरे, जाइय लद्धे य तेणा उ ॥ ४६ ॥
 पायसहरणं छेत्ता, पच्चागय दमग असियए सीसं ।
 भाउय ६सेणावति खिसणा य सरणागतो जत्थ ॥ ४७ ॥

एगो दमगो पच्चंतगामवासी । तेण सरतकाले चेडरूवेहिं जाइजंतेण दुद्धं मग्गिऊण पायसो रद्धो । तत्थ चोरसेणा पडिया । तेहिं ७विलोलितं, सो य पायसो ८सत्थालितो हरित्तो तेणेहिं । सो य अडवीतो तणं लुण्णिऊण ‘अज्ज तेहिं समं पायसं भोक्खामि’ति ९जाव एतस्स चेडरूवेहिं रूयमाणेहिं सिट्ठं । कोधेण गंतुं तेसिं चोराण वक्खेवेण सेणावतिस्स असियएणं सीसं छिंदिऊण णट्ठो । ते य चोरा हयसेणावतिया णट्ठा । तेहिं गंतूण पल्लिं तस्स डहरतो भाया सेणावती अभिसित्तो । ताहे ताओ माता भयणीतो तं भणंति—तुमं अम्हं वइरियं अमारोउणं इच्छसि सेणावत्तणं काउं ? तेण गंतूण सो आणितो दमगो जीवगेज्जो वराओ, तेसिं पुरतो णिगलियं बंधेऊण भणितो धणुं गहाय—भण कत्थ आहणामि सरेण भाइमारगा ! ? । तेण भणियं—जत्थ सरणागता विज्झंति । तेण चित्तिऊण भणियं—कइया वि णो सरणागता ब्राह्मंति । ताहे सो पूएऊण विसज्जितो । जति ताव तेण धम्मं अयाणमाणेण सो मुक्को, किमंग ! पुण साधुणा परलोगभीतेण ? , अब्भुवगतस्स सम्मं १०सहियव्वं खमितव्वं ॥ ४६ ॥ ४७ ॥

वाओदएण राई, णासइ कालेण सिगय-पुढवीणं ।
 णासइ उदगस्स सती, पव्वयराती उ जा सेलो ॥ ४८ ॥
 उदयसरिच्छा पक्खेणऽवेति चउमासिएण सिगयसमा ।
 वरिसेण पुढविराई, आमरण गती उ पडिलोमा ॥ ४९ ॥

१ चंपा अणंगसेणो पंचं निशीथभाष्ये ॥ २ पास णयण सावग नि० भाष्ये ॥ ३ देवदत्तं नि.भा. ॥ ४ गहणं णाम तोसवणे नि० भा० ॥ ५ पायस दमचेडरूवगा दट्ठं । पियरो नि० भा० ॥ ६ सेणाधिव खिसणा नि० भा० ॥ ७ विलोलितं प्रत्य० ॥ ८ सत्थालीक इत्यर्थः ॥ ९ आव पत्तस्स प्रत्य० ॥ १० सधियव्वं प्रत्य० ॥

सेल-ट्टि थंभ दारुय, लया य वंसी य भिंढ गोमुत्तं ।

‘अवलेहणिया किमिराग कद्दम कुसुंभय हलिद्दा ॥ ५० ॥

एमेव थंभकेयण, वत्थेसु परूवणा गईओ य ।

मरुयऽच्चंकारिय पंडरञ्ज मंगू य आहरणा ॥ ५१ ॥

इदाणि कसाय त्ति-तेसिं चउक्कओ णिक्खेवो जधा णमोक्कारे^१णिजुत्तीए तहा परूवेऊण कोधो चउव्विधो-उदगराइसमाणो वालुग० पुढवी० पव्वत० । जो तद्धिवसं चेव पडिक्कमणवेलाए उवसमइ जाव पक्खियं ताव उदगरातीसमाणो । चाउम्मासिए जो उवसमति [सो] वालुगारातिसमाणो, सरते जधा पुढवीए फुडिता दालितो वासेणं सम्मिलंति । एवं जाव देवसिय-पक्खिय-चाउम्मासिएसु ण उवसमति संवच्छरिए उवसमति तस्स पुढविरातीसमाणो कोधो । जो पज्जोसमणाए वि ण उवसमति तस्स पव्वयरातीसमाणो कोधो, जधा पव्वतराती ण सम्मिलती तथा सो वि । एवं सेसा वि कसाया परूवेतव्वा ॥ ४८ ॥ ४९ ॥ ५० ॥ ५१ ॥

तत्थ कोधे उदाहरणं-एसेव दमओ । अधवा—

अवहंत गोण मरुए, चउण्ह वप्पाण उक्करो उवरिं ।

छोदुं^२ मए सुवट्ठाऽतिकोवे णो देमो पच्छित्तं ॥ ५२ ॥

एक्को मरुतो । तस्स इक्को बइल्लो । सो तं गहाय केयारे मलेऊण गतो । सो सितियाए ण तरति उट्ठेतुं, ताहे तेण तस्स उवरिं तोत्तओ भग्गो ण य उट्ठेति । ताहे तिण्हं केयाराणं डगलएहिं आहणति ण य सो उट्ठेति । चउत्थस्स केयारस्स डगलएहिं मतो सो । उवट्ठिओ धियारे । सो तेहिं भणिओ-णत्थि तुज्झ पच्छित्तं गोवज्झा जेण एरिसा कया । एवं सो सलागपडिओ जाओ । एवं साहुणा वि एरिसो कोधो ण कातव्वो । सिय त्ति होज्जा ताधे उदगरातीसमाणेण होतव्वं । जो पुण पक्खिय-चाउम्मासिय संवच्छरिएसु ण उवसंतो तस्स विवेगो कीरति ॥ ५२ ॥ माणे अचंकारियभट्टा—

वणिधूयाऽचंकारियभट्टा अट्टसुयमग्गओ जाया ।

वरग पडिसेह सचिवे, अणुयत्तीहं पयाणं च ॥ ५३ ॥

णिवर्चित विगालपडिच्छणा य दारं न देमि निवकहणा ।

खिंसा णिसि णिग्गमणं, चोरा सेणावईगहणं ॥ ५४ ॥

णेच्छइ जलूगवेज्जगहण तम्मि य अणिच्छमाणम्मि ।

‘गेणहावेइ जलूगा, धणभाउग कहण मोयणया ॥ ५५ ॥

१ अवलेहणि किमि कद्दम कुसुंभरागे हलिद्दा य नि० भा० ॥ २ “राग दोस कंसाए य, इंदियाणि य पंच वि” इति आवश्यकनिर्युक्त्यन्तर्गतनमस्कार निर्युक्तिसत्कगाथा ६१८ गतं “कसाए” इति पदं व्याख्यानयद्भिर्भगवद्भिः श्री जिनभद्रगणिकक्षमाश्रमणपूज्यपादैर्विशेषावश्यकमहाभाष्ये कषायपदं “नामं ठवणा दविए” इत्यादि २६८० गाथातः २६८६ पर्यन्तगाथाकदम्बकेन न्यक्षेण निश्चितं वर्तते ॥ ३ मए उवट्ठा नि० भाष्ये ॥ ४ गेणहावे नलूग वणा, भाउय दूते कहण मोतो नि० भा० ॥

सयगुणसहस्सपागं, वणभेसज्जं 'वतीसु जायणता ।

तिक्खुत्त दासीभिंदण, ण य कोव सयं पदानं च ॥ ५६ ॥

एगा अट्ठणं पुत्ताणं ^२अणुमग्गजाइया सेट्ठिधूता । सा अमच्चेण जाइता । तेहिं भणितं—जति अवरोधे वि ण चंकारेसि तो देमो । तेण पडिस्सुत्तं—आमं, ण चंकारेमि । दिण्णा, तस्स भारिया जाता । सो पुण अमच्चो जामे गते रायकज्जाणि समाणेऊण एति । सा दिवसे दिवसे खिसति । पच्छ अण्णया कयादीयि बारं बंधेऊण अच्छति । अमच्चो आगतो, सो भणति—उग्घाडेहि दारं । सा ण उग्घाडेति । ताधे तेण चिरं अच्छिऊण भणिता—मा तुमं चेव साभिणो होज्जाहि । सा दारं उग्घाडेऊण अडविहुत्ता माणेण गता । चोरेहिं घेतुं चोरसेणावतिस्स उवणीता । तेण भणिया—महिला मम होहि त्ति । सा नेच्छति । ते वि बलामोडीए ण गेण्हंति । तेहिं जलोगवेज्जस्स हत्थे विकीता । तेण वि भणिता—मम महिला होहि त्ति । सा नेच्छति । रोसेण 'जलोगातो पडिच्छसु'त्ति भणिता । सा तत्थ णवणीयेणं मक्खिया जलोगातो गेण्हति । तं असरिसं करेति, ण य इच्छति, अण्णरूवलावण्णा जाता । भाउएण य मग्गमाणेण पच्चभिण्णाता, मोएऊण णीता । वमणविरेयणेहि य पुण्णवीकाऊण अमच्चेण णेयाविया । तीसे य तेत्तं सतसहस्सपागं पक्कं, तं च साधुणा मग्गितं । ताए दासी संदिट्ठा—आणेहि । ताए आणंतीए तं भायणं भिण्णं । एवं तिणिण वारे भिण्णाणि, ण य रुट्ठा तिसु सतसहस्सेसु वि णट्ठेसु । चउत्थवारा अप्पणा उट्ठेतुं दिण्णं । जति ताव ताए मेरुसरिसोवमो माणो णिहतो, किमंग ! पुण साधुणा णिहणियव्वो चेव ॥ ५३ ॥ ५४ ॥ ५५ ॥ ५६ ॥

पासत्थि पंडरज्जा, परिण्ण गुरुमूल णाय अभिओगा ।

पुच्छति य पडिक्कमणे, पुव्वब्भासा चउत्थम्मि ॥ ५७ ॥

अपडिक्कम सोहम्मे, अभिओगा देवि सक्कतोसरणं ।

हत्थिणि वायणिसग्गो, गोतमपुच्छा य वागरणं ॥ ५८ ॥

महुरा मंगू आगम, बहुसुय वेरग्ग सट्ठपूया य ।

सातादिलोभ णितिए, मरणे जीहा य णिद्धमणे ॥ ५९ ॥

अब्भुवगत गतवेरे, णाउं गिहिणो वि मा हु अहिगरणं ।

कुज्जा हु कसाए वा, अविगडितफलं च सिं ^३सोउं ॥ ६० ॥

मायाए पंडरज्जा णाम साधुणी—सा विज्जासिद्धा आभिओग्गाणि बहूणि जाणति । जणो से पणयकर-सिरो अच्छति । सा अण्णया कयाति आयरियं भणति—भत्तं पच्चक्खावेह । ताहे गुरुहिं सव्वं छट्ठाविया पच्चक्खातं । ताहे सा भत्ते पच्चक्खाते एगाणिया अच्छति, ण कोति तं आढाति । ताधे ताए विज्जाए आवाहितो जणो आगंतुमारद्धो पुप्फगंधाणि घेतूण । आयरिएहिं दो वि पुच्छिता वग्गा । भणति—ण याणामो । सा पुच्छिया भणति—आमं, मए विज्जाए कयं । तेहिं भणितं—वोसिर । ताए वोसिट्ठं । ठितो लोगो आगंतुं । सा पुणो एगागी, पुणो आवाहितं सिट्ठं च । ततियं अणालोइउं कालगता सोहम्मे कप्पे एरावणस्स अग्गमहिंसी जाता । ताधे आगंतूण भगवतो पुरतो ठिच्चा हत्थिणी होउं महता सट्ठेणं वाउक्कायं

करेति। पुच्छा उड्डिया। वागरिओ भगवता पुव्वभवो से। ‘अण्णो वि कोइ साधू साधुणी वा मा एव कहिति, सो वि एरिसं पाविहितिमं’ति तेण वातं करेति। तम्हा माया ण कायव्वा॥५७॥५८॥

लोभे—**लुद्धणंदो** फालइत्तो जेणं अण्णो पाया भग्गा। तम्हा लोभो ण कायव्वो॥५९॥६०॥

पायच्छित्ते (पच्छित्ते) बहुपाणो, कालो बलितो चिरं च ठायव्वं।

सज्झाय संजम तवे, धणियं अप्पा णिओतव्वो॥६१॥

[पच्छित्ते० गाहा।] एतेसिं सव्वेसिं पज्जोसमणाए वोसमणत्थं एत्थ वासारत्ते पायच्छित्तं। अट्ठसु उडुबद्धिएसु मासेसु जं पच्छित्तं संचियं तं वोढव्वं। किंनिमित्तं? तदा बहुपाणं भवति, हिडंताण य विराधणा तेसिं भवति। अवि य बलितो कालो, सुहं तदा पच्छित्तं वोढुं सक्कइ, चिरं च एगम्मि खेत्ते अच्छित्तव्वं। अवि य सीतलगुणेण बलियाइं इंदियाइं भवंति, तेण दप्पणीहरणत्थं एत्थ वासारत्ते पायच्छित्तं तवो कज्जति, वित्थरेण य सज्झाते संजमे य सत्तरसविधे धणियं अप्पा जोएयव्वो॥६१॥

पुरिमचरिमाण कप्पो, मंगल्लं वद्धमाणतित्थम्भि।

इह परिकहिया जिण-मणहराइथेरावलि चरित्तं॥६२॥

[**पुरिम० गाहा।**] पुरिमचरिमाण य तित्थगराणं एस मग्गो चेव—जहा वासावासं पज्जोसवेयव्वं पडतु० वा वासं मा वा। मज्झिमगाणं पुण भयितं। अवि य **वद्धमाणतित्थम्भि** मंगलणिमित्तं जिणगणहर [राइथेरा] वलिया सव्वेसिं च जिणाणं समोसरणाणि परिकहिज्जंति॥६२॥

सुत्ते जहा निबद्धं, वग्घारिय भत्त-पाण अग्गहणे।

पाणट्ठि तवस्सी अणहियासि वग्घारिए गहणं॥६३॥

सुत्ते० गाहा। सुत्ते जहा णिबंधो “णो कप्पति णिगंथाण वा णिगंथीण वा वग्घारियवुट्ठिकायंसि गाहावतिकुलं भत्ताए वा पाणाए वा पविसित्तए वा णिक्खमित्तए वा”। (सूत्रं २५६) ‘वग्घारियं णाम’ जं भिण्णवासं पडति, वासकप्पं भेत्तूण अंतोकायं तिम्मेति एतं वग्घारियं, एत्थ ण कप्पति। “कप्पति से अण्णवुट्ठिकायंसि संतरुत्तरस्स गाहावडकुलं वा०” (सूत्रं २५६) जदा पुण साधू णाणट्ठी कंचि सुतखंधं दरपढितं, सो य ण तरति विणा आहारेण चाउक्कालं पोरिसिं कातुं १ अहवा तवस्सी तेण विगिट्ठं तवोकम्मं कतं, तद्विवसं च वासं पडति जद्विवसं पारेन्ततो २ अघवा कोति छुहालुओ अणधियासतो होज्जा ३ एते तिण्णि वि वग्घारिते वि पडंते हिडंति संतरुत्तरा॥६३॥

संजमखेत्तचुयाणं, पाणट्ठि-तवस्सि-अणहियासाणं।

आसज्ज भिक्खकालं, उत्तरकरणेण जतियव्वं॥६४॥

संजम० गाहा। ते य पुणो कतायि ‘संजमखेत्तचुत्ता णाम’ जत्थ वासकप्पा उण्णिआ लब्भंति जत्थ पायाणि अण्णाणि य संजमोवगरणाणि लब्भंति तं संजमखेत्तं, ते य तओ संजमखेत्तातो चुता—असिवादीहिं कारणेहिं गता अण्णखेत्तं संकंता जत्थ संजमोवगरणाणि वासकप्पा य दुल्लभा, ताधे जद्विवसं वासं पडति तद्विवसं अच्छंतु। जदा णाणट्ठी तवस्सी अणधियासया [य] भवंति तदा आसज्ज भिक्खकालं उत्तरकरणेण जतंति॥६४॥

उण्णियवासाकप्पो, लाउयपायं च लब्भए जत्थ ।
 सज्झाएसणसोही, वरिसति काले य तं खेत्तं ॥ ६५ ॥
 पुव्वाहीयं नासइ, नवं च छातो अपच्चलो घेत्तुं ।
 खमगस्स य पारणए, वरिसति असहू य बालाई ॥ ६६ ॥
 वाले सुत्ते सूई, कुडसीसग छत्तए अपच्छिमए ।
 णाणट्ठि तवस्सी अणहियासि अह उत्तरविसेसो ॥ ६७ ॥

॥ पज्जोसमणाकप्पणिज्जुत्ती समत्ता ॥

जति उण्णियं अत्थि तेण हिण्डंति, असति उट्टिएण, असति उट्टियस्स कुतवेण । जाहे एतं तिविधं पि वालगं णत्थि ताहे जं सोत्तियं पंडरं घणमसिणं तेण हिंडंति । सुत्तियस्स असतीए ताहे तलसूतिं तालिसूयी वा उवरि कातुं । जाधे सूती वि णत्थि ताहे कुडसीसयं सागस्स पलासस्स वा पत्तेहिं कातूण सीसे छुभित्ता हिंडंति । कुडसीसयस्स असतीए छत्तएण हिंडंति । एस णाणट्ठी-तवस्सि-अणधियासाण य उत्तरविसेसो भणितो । एवं पज्जोसवणाए विही भणितो ॥ ६५ ॥ ६६ ॥ ६७ ॥

णामनिप्फण्णो गतो । सुत्ताणुगमे सुत्तं उच्चारेतत्त्वं अक्खलितादि—

सूत्रम् १—“तेणं कालेणं तेणं समएणं समणे भगवं०” । ‘तेणं कालेणं’ ति जो भगवता उसभसामिणां सेसत्तिथकरेहि य भगवओ वद्धमाणसामिणो चयणादीणं छण्हं वत्थूणं कालो णातो दिट्ठो वागरिओ य तेणं कालेणं । ‘तेणं समएणं’ ति कालान्तर्गतः समयः, समयादिश्च कालः, सामण्णकालातो एस विसेसकालो समतो । हत्थस्स उत्तरातो हत्थुत्तरातो, गणणं वा पडुच्च हत्थो उत्तरो जासिं तातो हत्थुत्तरातो—उत्तरफग्गुणीतो ॥

सूत्रम् २—‘छट्ठीपक्खेणं’ ति छट्ठी-अहोरत्तस्स रत्तीए ‘पुव्वरत्तावरत्तंसी’ ति अट्ठरत्ते ॥

सूत्रम् ३—चयमाणे ण जाणति, जतो एगसमइतो उवओगो णत्थि ॥

सूत्रम् ४—चोदस महासुमिणे ‘ओराले’त्ति पहाणे ‘कल्लाणे’ आरोग्गकरे ‘सिवे’ उवद्दवोवसमणे ‘धण्णे’ धणावहे ‘मंगल्ले’ पविस्से ‘सस्सिरीए’ सोभाए मणोहरे ॥

सूत्रम् १३—सक्के देविंदे ‘मघवं’ ति महा—मेहा ते जस्स वसे संति से मघवं । पागे—बलवगे अरी जो सासेति सो पागसासणो । कतू—पडिमा, तासिं सतं फासितं कत्तियसेट्ठित्ते जेण सो सतक्कतू । ‘सहस्सक्खे’ति पंचण्हं मंतिसताणं सहस्समक्खीणं । असुरादीणं पुराणि दारेति ति पुरंदरो ॥

सूत्रम् १४—‘महता’ इति पधाणेण, ‘गीतवादितरवेणं’ति भण्णिहिति, ‘आहतेणं’ति निच्चाणुबद्धेणं अक्खाणगबद्धेण वा, एवंवादिणा णट्ठेण—णच्चिएणं, गीएणं—ससद्दिएणं, वाइएणं—आतोज्जाभिघातसद्देणं, आतोज्जेक्कदेसोऽयम्^१, तन्त्री—प्रतीता, तलं—हत्थपुडं, तालं—कंसालिया, तुडियाणि—वादित्ताणि, एतेसिं घणोवमेणं मुरवाण य पडुणा वि सद्देणं पवादितरवेणं ॥

सूत्रम् ६०—‘हितानुकंपएण देवेणं’ति हितो सक्कस्स अप्पणो य, अणुकंपतो भगवतो ॥

सूत्रम् ६१-६२—‘अट्ठणसाला’ वायाम-साला । सतं वाराओ पक्कं जं तं सतपागं, सतेणं

[वा] काहावणाणं। 'पीणणिज्जेहिं' ति रसादिधातु-
समकारीहिं। 'दीवणिज्जेहिं' अग्गिजणणेहिं।
'दप्पणिज्जेहिं' ^१बलकरेहिं। 'मदणिज्जेहिं'
^२वम्महवद्धणेहिं। 'तिप्पणिज्जेहिं' मंसोवचयकरेहिं।
'छेदा' बावत्तरीकलापंडिता। 'दक्खा' कज्जाणं
अविलंबितकारी। 'पट्टा' वाग्मिनः। 'निउणा'
कलाकुसला। 'सुद्धोदगं' उण्होदकं। 'गणणायगा'
प्रकृतिमहत्तरया, 'डण्डणायका' [सेणावड्णो], 'ईसरा'
भोइया, तलवरपट्टबद्धा तलवराः राजस्थानीया इत्यर्थः,
'माडंबिया' पच्चतराड्णो, 'कोडुंबिया' गाममहत्तरा
ओलग्गगा य, 'इब्भा' नेगमादिणो वणिया, 'सेट्ठी'
^३पट्टवेंटणो तदधिवो, 'महामंती' हत्थिसाहणोवरिगो,
'गणगा' भंडारिया 'अमच्चो' रज्जाधिड्वायगो, 'चेडगा'
पादमूलीगा, 'पीढमद्दा' अत्थाणिण आसणासीणसेवगा,
'णगर' मिति पगतीतो, 'णिगमा' कारणिया,
'संधिवाला' रजसंधिरक्खगा ॥

सूत्रम् ७८—“जीवितारिहं पीतिदाणं”ति
जावज्जीवं पहुप्पितुं जोगं ॥

सूत्रम् १०७—‘पेत्तेजए’ ति पित्तियए।

सूत्रम् १११—‘आहोधिए’ ति अब्भंत-
रोधी। ‘पाईणगामिणि’ पुव्वदिसागामिणि छाया ॥

सूत्रम् ११३—‘मंजुमंजुणा घोसेण
अपडिबुज्जमाणे’ति’ण णज्जति को किं जंपति ? ॥

सूत्रम् १२०—‘विजयावत्तस्स चेतियस्स’
विजयावत्तं णामेणं, वियावत्तं वा’ व्यावृत्तं
चेतियत्तणातो, जिण्णुज्जाणमित्यर्थः। ‘कट्टकरणं’
क्षेत्रम् ॥

सूत्रम् १२१-१२२—‘आवीकम्मं’ पगास-
कम्मं। ‘रहोकम्मं’ पच्छण्णं कतं। सेसं कण्ठं जाव
“अट्टियगामणीसाते पढमं अंतरवासं वासावासं
उवागते”। अन्तरे वासः अन्तरवासः। अन्तरवास

इति वासारत्तस्याऽऽख्या। उक्तं च— “अंतरघण-
सामलो भगवं।” ‘पावा’ देवेहिं कतं णामं, जेण तत्थ
भगवं कालगतो। रज्जुगा-लेहगा, तेसिं सभा
रज्जुयसभा, अपरिभुज्जमाणा करणसाला।
छतुमत्थकाले जिणकाले य एते वासारत्ता।
‘पणियभूमि’ वज्जभूमि ॥

सूत्रम् १२३—‘कत्तिय मासे कालपक्खे
चरिमा रतणी’ ^४आवामंसा। ^५कालं-अन्तं गतः
कालगतः कायट्टितिकालाद् भवट्टितिकालाच्च।
वीतिक्रंतो संसारतो। सम्मं उज्जातो ण जथा अण्णे,
समस्तं वा उज्जातः। जाति-जरा-मरणस्स य बंधणं-
कम्मं तं छिण्णं। ‘सिद्धः’ साधितार्थः। ‘बुद्धः’ ज्ञः।
मुत्तो भवेभ्यः। सर्वभावेन निर्वृतः परिनिर्वृतो-
ऽन्तकृतः। सव्वदुक्खाणि-संसारियाणि पहीणाणि
सारीराणि माणसाणि य। बितितो चंदो संवच्छरो,
पीतिवद्धणो मासो, णंदिवद्धणो पक्खो, अग्गिवेसो
दिवसो, उवसमो वि से णामं, देवाणंदा रयणी निरिति
ति वुच्चति, लवस्स अच्ची णामं, पाणुस्स मुत्तो, थोवस्स
सिद्धणामं, करणं णागं, सव्वड्डसिद्धो मुहुत्तो ॥

सूत्रम् १२६-१२७—पारं आभोएति-
प्रकासेति पाराभोगः, पोसहो आवामंसाए ति। तम्मि
णातए पेज्जबंधणं-णेहो तं वोच्छिण्णं। गोतमो
भगवता पट्टवितो-अमुगगामे अमुगं बोधेहिं। तहिं
गतो वियालो य जातो, तत्थेव वुत्थो। णवरि पेच्छति
रत्तिं देवसण्णिवातं, उवउत्तो, णातं-जहा भगवं
कालगतो। ताहे चित्तेति-अहो! भगवं णिप्पिवासो,
कधं वा वीतरागाण णेहो भवति? णेहरागेण य
जीवा संसारं अडंति, एत्थंतरा णाणं उप्पण्णं। बारस
वासाणि केवली विहरति जहेव भगवं, णवरं
अतिसयरहितो। धम्मकहणा परिवारो य तहेव।
पच्छा अज्जसुधम्मस्स णिसिरति गणं ‘दीहायु’ ति
कातुं। पच्छा अज्जसुधम्मस्स केवलणाणं उप्पण्णं, सो

१ वन्नकरेहिं प्रत्यन्तरेषु ॥ २ चम्मड्विद्धणेहिं प्रत्यन्तरेषु ॥ ३ बद्धवेंटणो प्रत्यन्तरेषु ॥

४ आवामंसा प्रत्यन्तरेषु ॥ ५ सा काला। अन्तं प्रत्य० ॥

वि ^१अद्वा वासे विहरेत्ता केवलिपरियाएणं
अज्जजंबुणामस्स गणं दातुं सिद्धिं गतो ॥

सूत्रम् १३१—कुः भूमी तस्यां तिष्ठतीति
कुन्थु, अणुं सरीरगं धरेति अणुंधरी ॥

सूत्रम् १४५—दुविधा 'अंतकरभूमि' ति
अन्तः कर्मणां भूमी—कालो सो
दुविधो—पुरिसंतकरकालो य परियायंतकरकालो य।
जाव अज्जजंबुणामो ताव सिवपहो, एस
जुगंतकरकालो। चत्तारि वासाणि भगवता तित्थे
पवत्तिते तो सिज्झितुमारद्धा एस परियायंतकरकालो।
ततिए पुरिसजुगे जुगंतकरभूमी ॥

सूत्रम् १४६—पणपणं पावा, पणपणं
कल्लाणा, तत्थेगं मरुदेवा ॥

सूत्रम् २०१—'णव गणा एक्कारस
गणधरा' दोहं दोहं पच्छिमाणं एक्को गणो। जीवन्ते
चेव भट्टारए ^२णवहिं जणेहिं अज्जसुधम्मस्स गणो
णिक्खित्तो 'दीहातुगो'ति णातुं ॥

सूत्र २२४—समणे भगवं महावीरे०।
^३चंदसंवच्छरमधिकृत्यापदिश्यते, जेणं जुगादी सो।
वासाणं सवीसतिराते मासे०। किंणिमित्तं? पाएण
सअद्वा कडिताइं पासेहिंतो, उक्कंपिताणि उवरिं, लिता
कुड्डा, घड्डा भूमी, 'मड्डा' लण्हीकता, समंता मड्डा
सम्मड्डा, खता उदगपधा निद्धमणपधा य, सअद्वा
जे अण्णो णिमित्तं परिणामिया कता, इधरा 'पव्वइता
ठित'ति कातुं दंताल—छेत्तकरिसण—घरछयणाणि य
करेति तत्थ अधिकरणदोसा, सवीसतिराते मासे गते
ण भवंति ॥

सूत्रम् २३२—“वासावासं पज्जोसविए
कप्पति” सुत्तं, 'सव्वतो समंत' ति सव्वतो चउद्दिंसिं
पि सकोसं जोयणं खेत्तकप्पप्पमाणं,
अडविजलकारणादीसु तिदिंसिं बिदिंसिं एगदिसिं वा

भयितं। 'अहालंदमवि' अथेत्ययं निपातः, लन्दमिति
कालस्याख्या, जहण्णं लंदं उदउल्लं, उक्कोसं पंच
रातिंदिया, तयोरन्तरं मध्यम्। यथा रप्रकृतिरपि
अरप्रकृतिरपि एवं लंदमपि अलंदमपि मासो जाव
छम्मासा जेड्ढोग्गहो ॥

सूत्रम् २३३—“वासावासं० सकोसं
जोयणं गंतुं ^४पडियत्तए” दगघट्टा ^५ग्रा
एरवतिकुणालाए अद्धजोयणं वहति तत्थ वि ण
उवहम्मति। थलागासं ण विरोलेंतो वच्चति ॥

सूत्रम् २३४—अत्थे गतिया आयरिया
'दाए भंते!' दाते गिलाणस्स मा अप्पणो पडिग्गाहे
चातुम्मासिगादिसु ॥

सूत्रम् २३५—'पडिग्गाहे भंते!'ति अप्पणो
पडिग्गाहे अज्ज गिलाणस्स अण्णो गिण्हिहि ति ण
वा भुंजति। अध दोहं वि गेण्हंति तो
पारिड्ढावणियदोसा। अपरिड्ढवेंते गेलण्णादि ॥

सूत्रम् २३६—दाए पडिग्गाहे गिलाणस्स
अप्पणो वि, एवाऽऽयरिय—बाल-बुद्ध-पाहुणगाण वि
^६वित्तिणं, स एव दोसो, मोहुब्भवो, खीरे य धरणे
आत-संजमविराधणा ॥

सूत्रम् २३८—“वासा० अत्येगतिया”
आयरियं वेयावच्चकरो पुच्छति गिलाणं वा, इतरथा
पारिड्ढावणियदोसा। गिलाणोभासितयं मंडलीए ण
छुब्भति, अणोभासियं छुब्भति। से य वदेज्जा अड्ढो
अमुएण एवतितेण वा, 'से'ति वेयावच्चकरे।
'विण्णवेति' ओभासति। से य पमाणपत्ते दाता
भणति—पडिग्गाहे, तुमं पि य भोक्खसि तोदणं दवं
पाहिसि। गरहितविगतिं ^७पडिसेधति, अगरहितं
जाणेत्ता णिब्बंधं च तं च फासुगं अत्थि ताहे गेण्हति,
गिलाणणिस्साए ण कप्पति घेतुं ॥

सूत्रम् २३९—“वासावासं० अत्थि”

१ अत्र प्रभूतेष्वाददर्शेषु बारस वासे इति पाठो दृश्यते ॥ २ णवहिं गणहरेहिं अज्जं प्रत्य० ॥ ३
कृत्योपदिश्यते प्रत्य० ॥ ४ पडिएतत्ते प्रत्य० ॥ ५ ग्रा इति सप्तसंख्याद्योतकोऽक्षराडकः, सप्तदसकसङ्ख्या
इत्यर्थः ॥ ६ वितीणं प्रत्यन्तरेषु ॥ ७ पडिसिंधति प्रत्यन्तरेषु ॥

‘तहप्पगाराइ’ अदुगुंछिताणि कुलाणि । ‘कडाणि’ तेण अण्णेण वा सावगतं गाहिताणि दाणसहत्तं वा । ‘पत्तियाइ’ धृतिकराइ । ‘थेजाइ’ थिराइ प्रीतिं प्रति दाणं च । ‘वेसासियाणि’ विस्संभणीयाणि तहिं च धुवं लभामि अहं, ताणि अस्संसयं देति । [‘सम्मयाइ’] सम्मतो सो तत्थ पविसंतो । ‘बहुमयाइ’ बहूण वि स सम्मतो ण एगस्स दोण्हं वा बहूण वि साहूणं देति । ‘अणुमताइ’ दातुं चेव जत्थ, [तत्थ] से णो कप्पति अट्टट्ठुं वडत्तए अत्थि ते आउसो ! इमं वा इमं वा ? । जति भणति को दोसो ? बेइ-तं तुरितं श्रद्धावान् सट्ठी ओदण-सत्तुग-तलाहतिया वा पुव्वकट्ठिते उण्होदए ओदणो पेज्जा वा सगेहे परगेहे वा पुव्वभावितेण उसिणदवेण समितं तिम्मैति, तलाहतियातो आवणातो आणेति, सत्तुगा किणंति, पामिच्चं वा करैति ॥

सूत्रम् २४०—एगं गोयरकालं सुत्तपोरिसिं कातुं अत्थपोरिसिं कातुं एक्कं वारं कप्पति ॥

सूत्रम् २४१—चउत्थमभत्तियस्स ति, ‘अयमिति’ प्रत्यक्षीकरणे ‘एवतिए’ति वक्ष्यमाणो विसेसो पढमातो—प्रातः ण चरिमपोरिसीए ‘वियडं’ उग्गमादिसुद्धं । णऽण्णत्थ आयरियं उवज्झायं गिलाणं खुडुतो वा । संलिहिता संपमज्जिता धोविता ‘पज्जोसवित्तए’ परिवसित्तए । ण संथरति थोवं तं ताहे पुणो पविसति ॥

सूत्रम् २४२—छट्ठस्स दो गोयकरकाला । किं कारणं ? सो पुणो वि कल्लं उववासं काहिति, जति खंडिताणि तत्तियाणि चेव कप्पंति । कीस गवारा गेण्हितुं ण धरेति ? उच्यते—सीतलं भवति संचय-संसत्त-दीहाही दोसा भवन्ति, भुत्ताणुभुत्ते य बलं भवति, दुक्खं च धरेति त्ति ॥

सूत्रम् २४३—एवं अट्टमस्स वि तिण्णि ॥

सूत्रम् २४४—व्यपगतं अट्ठं व्यट्ठं विकट्ठं

वा, तिण्णि वि गोयरकाला ‘सव्वे’ चत्तारि वि पोरुसितो ॥ आहाराणंतं पाणं—

सूत्रम् २४५—णिच्चभत्तिगस्स ‘सव्वाइ’ जाणि पाणेसणाए भणियाणि । अधवा वक्ष्यमाणानि नव वि उस्सेतिमादीणि ॥

सूत्रम् २४६—चउत्थभत्तियस्स तओ—‘उस्सेदिमं’ पिट्ठं दीवगा वा । ‘संसेदिमं’ पण्णं उक्कट्ठेउं सीयलएणं सिच्चति । ‘चाउलोदगं’ चाउलघोवणं ॥

सूत्रम् २४७—छट्ठे ‘तिलोदगं’ लोविताण वि तिलाण धोवणं मरहट्ठदीणं । ‘तुसोदगं’ वीहिउदगं । जवधोवणं जवोदगं ॥

सूत्रम् २४८—‘आयामगं’ अवस्सावणं । ‘सोवीरगं’ अंबिलं ॥

सूत्रम् २४९—‘सुद्धवियडं’ उसिणोदगं ॥

सूत्रम् २५०—भत्तपच्चक्खाययस्स ससित्थे आहारदोसा, अपरिपूते कट्ठादि, अपरिमिते अजीरगादिदोसा ॥

सूत्रम् २५१—‘संखादत्तिओ’ परिमित-दत्तिओ । लोणं थोवं दिज्जति, जति तत्तिलगं भत्तपाणस्स गेण्हति सा वि दत्ती चेव । पंच त्ति णिम्मं, चतुरो तिण्णि दो एगा वा । छ सत्त वा मा एवं संछोभो-कताइ तेण पंच भोयणस्स लद्धातो तिण्णि पाणगस्स ताहे ताओ ^१पाणगच्चियातो भोयणे संछुब्भति तण्ण कप्पति ^२भोयणच्चियातो वा पाणए संछुब्भति तं पि ण कप्पति ॥

सूत्रम् २५२—वासावासंसि वासावासे पज्जोसवित्ते णो कप्पति उवस्सयातो जाव सत्तधरंतं ^३सण्णवत्तयितुं आत्मानम्, अन्यत्र चरितुं चारए । ‘सह उवस्सयातो’ त्ति सह सेज्जातरघरेणं सत्त एयाणि । अण्णो भणति—सेज्जातरघराओ परंपरेण अण्णाणि सत्त ॥

सूत्रम् २५३—वासावासं जं किंचि

‘कणगफुसितं’ उस्सा महिया वासं वा पडति उदगविराहण ति काउं ॥

सूत्रम् २५४—‘अगिहं’ अब्भावगासो, तत्थ अद्धसमुद्धिद्धस्स बिंदू पडेज्ज। णणु तेण उवओगो कओ पुव्वं? उच्यते—छाउमत्थिओ उवओगो तहा वा अण्णहा वा होज्जा। ‘पज्जोसवेत्तए’ आहारेत्तए। ‘स्यात्’ कथञ्चित् आगासे भुंजेज्ज वासं च होज्ज तत्थ देसं भोच्चा आहारस्स देसं ‘आदाय’ गृहीत्वा तं देसं पाणिणा पिधेत्ता उरेण वा ‘णिलिज्जेज्ज’ ओहाडेज्ज कक्खंसि वा आदघात्। आदाय वा ततः किं कुर्यात्? ‘अधाछण्णाणि’ ण संजयट्ठाए छण्णाणि। बहवो बिंदवो दगं। बिन्दुमात्रं उदगरयो। तदेगदेसो दगफुसिता ॥

सूत्रम् २५६—वग्धारियवुट्ठिकातो जो वासकप्पं गालेति अच्छिण्णाते व धाराते। कप्पति से ‘संतरुत्तरस्स’ अंतरं—रयहरणं पडिग्गहो वा, उत्तरं—पाउरणकप्पो, सह अंतरेण उत्तरस्स ॥

सूत्रम् २५७—वासा० सुत्तं, ‘निगिज्झिय निगिज्झिय’ ठाइउं ठाइउं वरिसति। कप्पति से ‘अहे उवस्सयं वा’ अण्णयं उवस्सयं अण्णेसिं वा संभोइयाणं इयरेसिं वा। तेसऽसति अहे वियडगिहे। तत्थ वेलं णाहिति ठिओ वा वरिसति वा असंकणिजे य रुक्खमूलं णिग्गलं करीरादि। तत्थ से वियडगिहे रुक्खमूले वा ठियस्स आगमनात् पूर्वकालं पुव्वाउत्ते तिणि आलावगा।

पुव्वाउत्ताऽऽरुभियं, केसिंचि समीहितं तु जं तत्थ।

एते ण होति दोण्णि वि, पुव्वपवत्तं तु जं तत्थ ॥१॥

पुव्वाउत्तं केइ भणंति—जं आरुभितं चुल्लीए। केइ भणंति—जं समीहितं, ‘समीहितं णाम’ जं तत्थ ‘दोतितेल्लगं पागट्ठाए। एते दोण्णि वि अणाएसा। इमो आतेसो—जं तेसिं गिहत्थाणं ‘पुव्वपवत्तं’ जत्तियं उवक्खडिज्जंतयं एतं पुव्वाउत्तयं ॥ कहं पुण ते दो वि अणाएसा? अत उच्यते—

पुव्वारुहिते य समीहिते य किं छुब्भती ण खलु अण्णं?।

तम्हा जं खलु उचितं, तं तु पमाणं ण इतरं तु ॥१॥

बालगपुच्छादीहिं, णातुं आदरमणादरेहिं च।

जं जोग्गं तं गेण्हति, दव्वपमाणं च जाणेज्जा ॥२॥

सूत्रम् २५८—तत्थ अच्छंतस्स कत्तायि वरिसं न चेव ठाएज्जा तत्थ किं कायव्वं? का वा मेरा? “कप्पति से वियडं भोच्चा” वियडं उग्गमादिसुद्धं एगायतं सह सरीरेण पाउणित्ता वरिसंते वि उवस्सयं एति। तत्थ वसंते बहू दोसा एगस्स आयपरोभयसमुत्था दोसा, साहू व अट्ठण्णा होज्जा ॥

सूत्रम् २५९-२६०-२६१—एत्थ वि वियडरुक्खमूलेसु कहं अच्छित्तव्वं? “तत्थ णो कप्पति एगस्स णिग्गंथस्स एगाए य णिग्गंथीए”।

कहं एगाणिओ? संघाडइल्लओ अब्भत्तट्ठिओ असुहितओ कारणिओ वा। एवं णिग्गंथीण वि आयपरोभय-समुत्था दोसा संकादओ य भवंति। अह पंचमओ खुड्डओ वा खुड्डिया वा, छक्कणं रहस्सं ण भवति। तत्थ वि अच्छंतो अण्णेसिं धुवकम्मियादीणं संलोए ‘सपडिदुवारे’ सपडिहुत्तदुवारं सव्वगिहाण वा दुवारे। खुड्डतो साधूणं, संजतीणं खुड्डिया। साधू उस्सग्गेणं दो, संजतीओ तिणि चत्तारि पंच वा। एवं अगारीहिं वि ॥

सूत्रम् २६२—‘अपडिण्णतो’ ण केणयि वुत्तो—मम आणेज्जासि, अहं वा तव आणेस्सामि, ण कप्पति। कहं ? अच्छति त्ति गहितं, सो वि तोत्तिण्णो, अधियं गहितं, भुंजंते गेलण्णदोसा, परिट्ठवेन्ते आउ-हरित-विराहणा ॥

सूत्रम् २६३-२६४—वासावासं० ‘से’ इति स भगवांस्तीर्थकरः। ‘किमाहु’ दोसमाहु ? आयतणं उदगस्स “पाणी पाणिलेहातो”। ‘पाणी’ पाणिरेव, ‘पाणिलेहा’ आयुरेहा, सुचिरतरं तत्थ आउक्कातो चिद्धति। णहो सव्वो। ‘णहसिहा’ णहगलयं। ‘उत्तरोद्धा’ दाढियाओ। भमुहरोमाइं एत्थ वि चिरं अच्छति ॥

सूत्रम् २६५—“वासावासं०”। ‘अड्ड सुहुमाइं’ति सूक्ष्मत्वादल्पाधारत्वाच्च ‘अभिक्षणं’ पुणो पुणो जाणितव्वाणि सुत्तोवदेसेणं पासितव्वाणि चक्खुणा, एतेहिं दोहि वि जाणित्ता पासित्ता य परिहरितव्वाणि ॥

सूत्रम् २६६—पाणसुहुमे ‘पंचविहे’ पंचप्पगारे। एक्केक्के वण्णे सहस्ससो भेदा, अण्णे य बहुप्पगारा संजोगा, ते सव्वे वि पंचसु समोतरंति किण्हादिसु। णो चक्खुफासं० जे णिगंघेणं अभिक्षणं अभिक्षणं जत्थ ठाण- णिसीयणाणि चेतेति। ‘आदाणं’ गहणं निक्खेवं वा करेति ॥

सूत्रम् २६७—‘पणतो’ उल्ली चिरुगगतो, तद्द्वयसमाणवण्णो जाहे उप्पज्जति।

सूत्रम् २६८—‘बीयसुहुमं’ सुहुमं जं व्रीहिबीयं तंदुलकणिया समाणगं ॥

सूत्रम् २६९—हरियसुहुम पुढविसरिसं किण्हादिना अचिरुगगतं ॥

सूत्रम् २७०—पुप्फसुहुमं अल्पाधारत्वात्, अधवा उड्डेतगं सुहुमं सण्हगं उंबरपुप्फादि, अघवा पल्लवाविसरिसं ॥

सूत्रम् २७१—अंडसुहुमं पंचविहं—

‘उड्डंसंडे’ मधुमक्खियादीणं अंडगाणि, पिपीलिया—मुइं गंडाणि, उक्कलियंडे लूतादिपुडगस्स, हलिया—घरतोलिया तीसे अंडगं, हल्लोहलिया—अहिलोडी सरडी वि भण्णति तेसिं अंडयं ॥

सूत्रम् २७२—‘लेणसुहुमे’ लेणं—आश्रयः सत्त्वानाम्। उत्तिं गलेणं गद्दभगउक्केरो भूमीए भिगू फुडिया दाली [स्फुटिता राई] ‘उज्जुगं’ बिलं। ‘तालमूलगं’ हेड्डा विच्छिण्णं उवरिं तणुगं। ‘संबुक्कावत्तं’ भमतयं।

सूत्रम् २७४—“वासावासं०”। इयाणि सामाण्णा सामायारी—दोसु वि कालेसुं विसेसेण वासासु आयरिओ दिसायरिओ सुत्तत्थं वाएइ। उवज्झाओ सुत्तं वाएति। पवत्ती णाणादिसु पवत्तेति—णाणे पढ परियट्ठेहिं सुणेहि उद्दिसावेहिं एयं १ दंसणे दंसणसत्थाइं पढ परियट्ठेहिं सुणेहिं वा २ चरित्ते पच्चित्तं वहाहिं, अणेसणदुप्पडिलेहिताणि करेत्तं वारेति, वारसविहेण तवेण जोयावेति, जो जस्स जोगो ३। थेरो एतेसु चेव णाणादिसु सीतंतं थिरीकरेति पडिचोदेति, उज्जमतं अणुवूहति। गणी अण्णे आयरिया सुत्तादिणिमित्तं उवसंपण्णगा। गणावच्छेइया साधू घेतुं बाहिरखेते अच्छंति उद्धावणा—पधावण—खेतोवधिमग्गणेसु असिवादिसुं उज्जुत्ता। अण्णं वा जं ‘पुरतो कट्ठु’ पुरस्कृत्य सुहदुक्खिया परोप्परं पुच्छंति; खेतपडिलेहगा वा दुग्गमादी गता ते अण्णमण्णं पुरतो कातुं विहरंति, अणापुच्छाए ण वट्ठति। किं कारणं ? वासं पडेज्ज, पडिणीतो वा, अहवाऽऽयरियबाल—खमग—गिलाणाणं घेतत्तव्वं, तं च ते अतिसयजुत्ता जाणमाणा कारणं दीवेत्ता। पच्चवाया—सेहसण्णायगा वा असंखडयं वा केणति सद्धिं पडिणीओ वा। एवं वियारे वि पडियमुच्छियादि पच्चवाता ॥

सूत्रम् २७५—गामाणुगामं कारणिओ दूतिज्जति ॥

सूत्रम् २७६—‘अण्णतरं वा विगति’

खीरादि, 'एवदियं' एत्तियं परिमाणेण, 'एवतिखुत्तो' एत्तियवारातो दिवसे वा मोहुब्भवदोसा खमग-गिलाणाणं अणुण्णाता ॥

सूत्रम् २७७—'अण्णयरं तेगिच्छं' वातिय-पेत्तिय-सैंभिय-सण्णिपाता आतुरो, वेज्जो पडिचरओ, ओसध-पत्थभोयणं 'आउट्टित्तए' करेत्तए करणार्थे आउट्टिशब्दः ॥

सूत्रम् २७८—'अण्णतरं अद्धमासादि 'ओरालं' महल्लं। समत्थो असमत्थो वेयावच्चकरो पडिलेहणादि करेत्तओ अत्थि, पारणगं वा संधुक्कणादि अत्थि ॥

सूत्रम् २७९—भत्तपच्चखाणे नित्यारतो न णित्यारओ, 'समाधिपाणगं णिज्जवगा वा अत्थि, णिप्फत्ती वा अत्थि णत्थि। 'अण्णतरं उवहिं'ति

हत्थं लंबति सप्पो० गाथा। कुच्चं संघसएण कुंथू-मंकुणादिवधो। 'अणट्ठाबंधी' पक्खस्स तिण्णि चत्तारी वाराओ बंधति, सज्झायादी पलिमंथो पाणसंघट्टणा य। अहवा 'अणट्ठाबंधी' सत्तहिं छहिं पंचहिं वा अड्डएहिं बंधति। 'अमियासणितो' अबद्धासणितो ठाणातो ठाणसंकमं करेमाणो सत्ते वहेति। अणाताविस्स संथारगपादादीणं पणग-कुंथूहिं संसज्जते, तक्कज्जअणुवभोगे उवभोगणिरत्थए य, अधिकरणं, उवभुंजमाणस्स जीववधो, असमितो ईरियादिसु।

भासणे संपाइवधो, दुण्णेयो गेहछेतो ततियाए।

पढमचरिमासु दोण्हं, अपेहअपमज्जणे दोसो ॥१॥

गेहो—आउक्कातो चेव। 'गेहच्छेदो' परिणतो वा ण वा दुव्विण्णेतो 'ततियाए' एसणाए समितीए त्ति। अभिक्खणं अभिक्खणं ठाणं—णिसीयण—तुअट्टण उवहिआदाणणिक्खेवे। तहा जहा एयाणि ट्ठाणाणि संथारादीणि ण परिहरति तहा तहा संजमे दुआराधए। जो य पुण अभिगगहीतसेज्जासणितो भवति तस्यानादानं भवाते कर्मणामसंयमस्स वा। उच्चो कातव्वो, अकुच्चो बंधियव्वो। अट्ठाए एकसिं पक्खस्स अड्डगा चत्तारि। बद्धासणेण होयव्वं, कारणे उट्टेति। संथारगादी आतावेयव्वा, पमज्जणसीलेण य भवियव्वं। जहा जहा एताणि वरेति तहा तहा संजमी सुट्ठु आराहितो भवति, सुकरतो वा ततो मोक्खो भवति ॥

सूत्रम् २८२—“वासावासं० ५ततो उच्चार० १” ६तयोत्ति अंतो ७ततो अधियासिताओ, अणहियासियाओ वि ८तयो, आसण्णे मज्जे दूरे एक्केका वाघायणिमित्तं, एवं बाहिं पि ३। 'उस्सण्णं'

वत्थ—पत्तादि ट्क^२। अधासन्निहिता, अणातावणे कुत्थणं पणतो। अह णत्थि पडियरगा उल्लति हीरेज्ज वा उदगवधो जायते तेण विणा हाणी ॥

सूत्रम् २८१—“वासावासं०”। अण-भिगगहियसेज्जा सणियस्स मणिकोटिमभूमीए वि संथारो सो अवस्स घेतव्वो। विराहणा “पाणा सीतल कुंथू०” सीतलाए भूमीए अजीरमादी दोसा, आसणेण विणा कुंथुसंघट्टो, णिसेज्जा मइलिज्जति, उदगवधो मइलाए उवरि, हेट्ठा वि आदाणं कर्मणां दोसाणं वा। उच्चं च कुच्चं च उच्चाकुच्चं, न उच्चाकुच्चं अणुच्चा-कुच्चं। भूमीए अणंतरे संथारए कए ^३अवेहासे पिवीलिकादिसत्तवधो ^४दीहजाइओ वा डसेज्ज तम्हा उच्चे कातव्वो। उक्तं च—

^१प्रायसः। 'प्राणा बीजावगा' संखणग-इंदगोवगादि-प्राणाः अहुणुब्भिण्णा बीजातो, हरिता जाता, आयतनं स्थानम् ॥

सूत्रम् २८३—“वासावासं० ततो मत्तया

१ 'पाणाणि णिज्जं प्रत्य० ॥ २ “ट्क इति चतुःसंख्याघोटकोऽक्षराड्। ३ अविहायसि इत्यर्थः ॥ ४ दीहादीओ वा प्रत्य० ॥ ५-६-७-८ तिस्र इत्यर्थः ॥ ६ प्रायसमित्यर्थः। प्राणा प्रत्य० ॥

ओगण्हितए, तं०—उच्चारमत्तए ३।” विवेलाए धरेते आयविराहणा, वासंते संजमविराहणा, बाहिं णितस्स गुम्मियादिगहणं तेण मत्तए वोसिरित्ता बाहिं णेत्ता परिट्ठवेति। पासवणे वि आभिग्गहिओ धरेति, तस्सासति जो जाधे वोसिरति सो ताहे धरेति, ण णिक्खिवति, सुवंतो वा उच्छंणे द्वितयं चेव उवरिं दंडए वा दोरेण बंधति, गोसे असंसत्तियाए भूमीए अण्णत्थ परिट्ठवेति॥

सूत्रम् २८४—वासावासं० णो कप्पति णिग्गंथा २ परं पज्जोसवणातो गोलोममेत्ता वि केसा जाव संवच्छरिए थेरकप्पे। ‘उवातिणावेत्तए’ ति अतिक्कामेत्तए। केसेसु आउक्कातो लग्गति सो विराधिज्जति, तेसु य उल्लंतेसु छप्पतियातो समुच्छंति, छप्पइयाओ य कंडूयंतो विराधेति, अप्पणो वा खतं करेति, जम्हा एते दोसा तम्हा गोलोमप्पमाणमेत्ता वि ण कप्पति। जति छुरेण कारेति कत्तरिए वा आणादीता, छप्पतियातो छिज्जंति, पच्छाकम्मं च

ण्हावितो करेति, ओहामणा, तम्हा लोओ कातव्वो, तो एते दोसा परिहरिता भवंति। भवे कारणं ण करेज्जा वि लोयं, असहू ण तरेति अहियासेतुं, लोयं जति कीरति अण्णो उवद्दवो भवति, बालो रुवेज्ज वा धम्मं वा छड्डेज्ज, गिलाणो वा तेण ^१लोओ ण कीरति। जइ कत्तरीए कारेति पक्खे पक्खे कातव्वं, अध छुरेणं मासे मासे कातव्वं। पढमं छुरेण, पच्छा कत्तरीए। अप्पणा ^२दवं घेतुण तस्स वि हत्थ—धोवणं दिज्जति एस जयणा। धुवलोओ उ जिणाणं, थेराण पुण वासासु अवस्स कायव्वो। पक्खिया आरोवणा वयाणं सव्वकालं। अहवा संधारयदोराणं पक्खे पक्खे बंधा मोत्तव्वा पडिलेहेयव्वा य। अहवा पक्खिया आरोवणा केसाणं कत्तरीए, अण्णहा पच्छित्तं। मासितो खुरेणं, लोओ छण्हं मासाणं थेराणं, तरुणाणं चाउम्मासिओ। संवच्छरिओ ति वा वासरत्तिओ ति वा एगडं। उक्तं च—

“संवच्छरं वा वि परं पमाणं ^३वीयं च वासं ण तहिं वसेज्जा।”

एस ‘कप्पो’ मेरा मज्जाया, कस्स ? थेराणं भणिता आपुच्छ-भिक्षायरियादि-विगति-पच्चक्खाणं जाव मत्तग ति। जिणाण वि एत्थ किंचि सामण्णं, पाएणं पुण थेराणं॥

सूत्रम् २८५—वासावासं० णो कप्पति णिग्गंथा २ परं पज्जोसवणातो अधिकरणं वदित्तए, अतिक्रामयित्वेत्यर्थः। वदित्तए जथा अधिकरण-सुत्ते। कताइ ठवणादिवसे चेव अधिकरणं समुप्पणं होज्ज तं तद्विवसमेव खामेयव्वं। जो परं पज्जोसवणातो अधिकरणं वदति सो ‘अकप्पो’ अमेरा णिज्जूहियव्वो गणातो, तम्बोलपत्रज्ञातवत्। उवसंत उवडित्ते मूलं॥

‘इह खलु’ पवयणे ‘अज्जेव’ पज्जोसवणादिवसे ‘कक्खडे’ महल्लसद्देणं, कडुए जकारमकारेहिं, ‘वुग्गहो’ कलहो। सामायारीवितहकरणे तत्थऽवरोधे सेहेण रातिणितो खामेयव्वो पढमं। जति वि रातिणिओ अवरद्धो, पच्छा रातिणितो खामेति। अह सेहो अपुट्ठधम्मो ताहे रातिणितो खामेति पढमं। ‘खमियव्वं’ सहियव्वं सयमेव। खामेयव्वो परो, उवसमियव्वं अप्पणा अण्णेसिं पि उवसमो कायव्वो, उवसमेयव्वं संजताणं संजतीण य।

सूत्रम् २८६—वासावासं० पज्जोसवितानं

^४जं अज्जियं समीखल्लएहिं० गाथा। तावो भेदो० गाथा। ‘सम्मुती’ सोभणा मती सम्मुती रागदोसरहितया, ‘संपुच्छण’ति सज्झायाउत्तेहिं होयव्वं, अधवा ‘संपुच्छणा सुत्तत्थेसु कायव्वा, ण कसाया

१ लोतो प्रत्य०। लोयो प्रत्यन्तरेसु॥ २ दवं पानीयमित्यर्थः॥ ३ बितियं प्रत्यन्तरेषु॥

४ गाथे इमे कल्पलघुभाष्यगते। ते च सम्पूर्णे एवम्—

जं अज्जियं समीखल्लएहिं तवनियमबंभमइएहिं। तं दाणि पच्छ नाहिसि, छड्ढितो सागपत्तेहिं॥२७१४॥

वोढव्वा । १जो खामितो वा अखामितो वा उवसमति तस्स अत्थि आराहणा णाणादि ३, जो ण उवसमति तस्स णत्थि । एवं ज्ञात्वा तम्हा अप्पणा चेव उवसमित्वं जति परो खामितो वि ण उवसमति । कम्हा किं निमित्तं ? जेण 'उवसमसारं' उवसमप्पभवं उवसममूलमित्यर्थः, समणभावो सामण्णं ॥

सूत्रम् २८७—वासासु वाघातणिमित्तं तिणिण्ण उवस्सया घेतव्वा । का सामाचारी ? उच्यते—वेउव्विया पडिलेहा पुणो पुणो पडिलेहिज्जति संसत्ते, असंसत्ते तिणिण्ण वेलाओ—पुव्वण्हे^१ भिक्खं गतेसु २ वेतालियं ३ । जे अण्णे दो उवस्सया तेसिं 'वेउव्विया पडिलेहा' दिणे दिणे निहालिज्जति, मा कोति ठाहिति ममत्तं वा काहिति, ततिए दिवसे पादपुंछणेण पमज्जिज्जति ॥

सूत्रम् २८८—वासावासं० अण्णतरं दिसं वा २ट्क अणुदिसं वा ३ट्क अभिगिज्झ भिक्खं सण्णाभूमिं वा गमित्तए कहेउं आयरियादीणं सेसाणं पि, एवं सव्वत्थ विसेसेण वासासु । जेण 'उस्सण्णं' प्रायसः तवसंप्रयुक्ता छट्ठादी पच्छित्तनिमित्तं संजमणिमित्तं च चरति, योऽन्यश्चरति स पडिचरति । पडिजागरति गवेसति अणागच्छंतं दिसं वा अणुदिसं वा संघाडगो ॥

सूत्रम् २८९—“वासावासं पज्जोस-वियाणं०” चत्तारि पंच जोयण ति संथार-गोवस्सग-णिवेसण साधी वाडग-वसभग्गाम- भिक्खं कातुं अदिट्ठे वसिऊण जाव चत्तारि पंच जोयणा अलब्भंते, एवं वासकप्प ओसधणिमित्तं गिलाण-वेज्जणिमित्तं वा, णो से कप्पति तं रयणिं जहिं से लद्धं तहिं चेव वसित्तए, अहवा जाव चत्तारि पंच जोयणाइं गंतुं अंतरा कप्पति वत्थए ण तत्थेवं जत्थ गम्पति, कारणिओ वा वसेज्जा ॥

सूत्रम् २९०—“इच्चेतं संवच्छरियं” । ‘इति’ उपप्रदर्शने । एस जो उक्तो भणितो सांवत्सरिकश्चातुर्मासिक इत्यर्थः । ‘थेरकप्पो’

थेरमज्जाता थेरसामाचारी, ण जिणाणं, अधवा जिणाण वि किंचि एत्थ, जधा “अगिहंसि” । “अहासुत्तं” जहा सुत्ते भणितं, न सूत्रव्यपेतम् । तथा कुर्वतः अहाकप्पो भवति, अण्णहा अकप्पो । अधामगं, कहां मग्गो भवति ? एवं करेत्तस्स णाणादि ३ मग्गो । ‘अधातच्चं’ यथोपदिष्टम् । ‘सम्यग्’ यथावस्थितं कायवाङ्मनोभिः । ‘फासेत्ता’ आसेवेत्ता । ‘पालेत्ता’ रक्खित्ता । सोभितं करणेण कतं । ‘तीरितं’ नीतं अन्तमित्यर्थः । यावदायुः आराधेत्ता अणुपालणाए य करेत्तेण सोभितं किट्ठितं । पुण्णं चाउम्मासितं तेणेवं करेत्तेण उवदिसतेण य आराहितो भवति, ण विराधिओ । आणाए उवदेसेण य करेत्तेण अणुपालिओ भवइ, अण्णेहिं पालितं जो पच्छा पालेति सो अणुपालेति । तस्स एवं पालितस्स किं फलम् ? उच्यते, तेणेव भवग्गहणेण सिज्झति, अत्थेगतिया दोच्चेण, एवं उक्कोसियाए आराहणाए । मज्झिमियाए तिहिं । जहण्णियाए सत्तऽट्ठ ण वोलेति ॥ किं स्वेच्छया भण्णति ? नेत्युच्यते, निद्देसो कीरति पुणो—

सूत्रम् २९१—तेणं कालेणं तेणं समएणं समणे भगवं महावीरे रायगिहे णगरे सदेवमणुयासुराए ‘परिसाए’ उद्घाट्य शिरः परि—सर्वतः सीदति परिषत् ‘मज्झे ठितो’ मज्झगतो ‘एवं आइक्खइ’ एवं यथोक्तं कहेति, भासति वाग्योगेण, पण्णवेति अणुपालियस्स फलं, ‘परूवेति’ प्रति प्रति रूवेति । ‘पज्जोसवणाकप्पो’ ति वरिसारत्तमज्जाता । अज्जो ! ति आमंत्रणे । द्विग्रहणं निकाचनार्थं, एवं कर्त्तव्यं नान्यथा । सह अत्थेण सअट्ठं । सहेतुं न निर्हेतुकम् । ‘सनिमित्तं-सकारणं’ अणुपालितस्स दोसा अयं हेतुः, अपवादो

तावो भेदो अयसो, हाणी दंसण-चरित्त-नाणाणं । साहुपदोसो संसारवट्ठणो साहिकरणस्स ॥२७०८॥

१ वोढव्वा । अट्ठो अणत्थकल्लाने वा दवित्तेण वा (?) जो पूवामितो क्वचिन्न्यन्तरे ॥

२-३ ट्क इत्ययं चतुःसंख्यावेदकोऽक्षराङ्कः ॥ ४ करेत्तेण सोभितस्स णाणादि प्रत्य० ॥

कारणं जहा सवीसतिराते मासे वीतिक्रंते विभासा । दोसदरिसणं हेतुः, अववादो कारणं ।
 पञ्जोसवेयव्वं । किंनिमित्तं हेतुः, पाएणं अगारीहिं सहेतुं सकारणं 'भुज्जो भुज्जो' पुणो पुणो उवदंसेति ।
 अगाराणि सट्ठाए कडाणि । कारणे उरेण वि परिग्रहणात् सावगाण वि कहिज्जति, समोसरणे
 पञ्जोसवेति आसाढपुण्णिमाए । एवं सव्वसुत्ताणं कहिज्जति पञ्जोसमणाकप्पो ॥

॥ अट्ठमं अज्झयणं परिसमाप्तम् ॥



कल्पचूर्णनतर्गतानां विशिष्टार्थार्पकाणां शब्दानां सूची

शब्द	पत्र-सूत्रांक	शब्द	पत्र-सूत्रांक	शब्द	पत्र-सूत्रांक
अकम्प	११८-२८५	उत्तर	११५-२५६	ढोतितेल्लग	११५-२५७
अट्टणसाला	१११-६१	उत्तिंगलेण	११६-२७२	णगर	११२-६२
अड्डय	११७-२८१	उदगरय	११५-२५४	णट्ट	१११-१४
अणुकंपय	१११-६०	उवज्झाय	११६-२७४	णहसिहा	११६-२६३
अणुच्चाकुच्च	११७-२८१	उवातिणावेत्तए	११८-२८४	णिगम	११२-६२
अणुमय	११४-२३६	उस्सण्ण	११७-२८२	णेह	११७-२८१
अणुंधरी	११३-१३१	उस्सेदिम	११४-२४६	तन्त्री	१११-१४
अपडिण्णत	११६-२६२	ओराल	१११-४	तल	१११-१४
अमच्च	११२-६२	कट्टकरण	११२-१२०	तलवर	११२-६२
अट्ट	११६-२६१	कड	११४-२३६	तलाहतिया	११४-२३६
अववाद	११६-२६१	कणगफुसित	११५-२५३	ताल	१११-१४
अवामंसा	११२-१२३	कल्लाण	१११-४	तालमूलग	११६-२७२
अहातच्च	११६-२६०	कारण	१२०-२६१	तिप्पणिज्ज	११२-६१
अहामग्ग	११६-२६०	काल	१११-१	तिलोदग	११४-२४७
अहालंद	११३-२३२	कालगत	११२-१२३	तीरित	११६-२६०
अहासुत्त	११६-२६०	किट्ठित	११६-२६०	तुडिय	१११-१४
अंतकृत्	११२-१२३	कुडसीसय	१०७	तुसोदग	११४-२४७
अंतर	११५-२५६	कुंथु	११३-१३१	तोदणं	११३-२३८
अंतरवास	११२-१२२	कोडुंबिय	११२-६२	थेज्ज	११४-२३६
आयतन	११७-२८२	गणग	११२-६२	थेर	११६-२७४
आयरिय	११६-२७४	गणणायग	११२-६२	दक्ख	११२-६१
आयामग	११४-२४८	गणावच्छेइय	११६-२७४	दग	११५-२५४
आराहित	११६-२६०	गणि	११६-२७४	दगफुसित	११५-२५४
आहत	१११-१४	गीय	१११-१४	दप्पणिज्ज	११२-६१
आहोधि	११२-१११	चाउलोदग	११४-२४६	दंडणायग	११२-६२
इब्भ	११२-६२	चेडग	११२-६२	दीवणिज्ज	११२-६१
ईसर	११२-६२	छेद	११२-६१	धण्ण	१११-४
उच्चाकुच्च	११७-२८१	जवोदग	११४-२४७	निउण	११२-६१
उज्जुग	११६-२७२	जीवितारिह	११२-७८	निगिज्झिय	११५-२५७

शब्द	पत्र-सूत्रांक	शब्द	पत्र-सूत्रांक	शब्द	पत्र-सूत्रांक
निमित्त	११६-२६१	मघव	१११-१३	सम्मुति	११८-२८६
पञ्जोसवणाकप्प	६१	मदणिञ्ज	११२-६१	सत्तिरीय	१११-४
पञ्जोसवणाकप्प	१२०-२६१	महामंति	११२-६२	सहस्सक्ख	१११-१३
पट्ट	११२-६१	मंगल्ल	१११-४	संखादत्तिअ	११४-२५१
पत्तिय	११४-२३६	माडंबिय	११२-६२	संघाडइल्ल	११५-२५६
परिसा	११६-२६१	रज्जुग	११२-१२२	संजमखेत्त	१०६
पवत्ति	११६-२७४	रज्जुगसम्भा	११२-१२२	संतरुत्तर	११५-२५६
पागसासण	१११-१३	वग्घारियवुड्डिकाय	११५-२५६	संधिवाल	११२-६२
पाणगच्चिया	११४-२५१	वाइय	१११-१४	संबुक्कावत्त	११६-२७२
पाणिलेहा	११६-२६३	वासरत्तिय	११८-२८४	संसेदिम	११४-२४६
पाराभोग	११२-१२७	विकृष्ट	११४-२४४	सिव	१११-४
पालेत्ता	११६-२६०	विजयावत्त	११२-१२०	सुद्धवियड	११४-२४६
पीढमद्द	११२-६२	वियड	११४-२४१	सुद्धोदग	११२-६२
पीणणिञ्ज	११२-६१		११५-२५८	सेट्ठि	११२-६२
पुरंदर	१११-१३	वियावत्त	११२-१२०	सोभित	११६-२६०
पुव्वाउत्त	११५-२५७	वीतिकंत	११२-१२३	सोवीरग	११४-२४८
प्राण	११७-२८२	वेसासिय	११४-२३६	हत्थुत्तरा	१११-१
पेज्जबंधण	११२-१२६	व्यष्ट	११४-२४४	हलिया	११६-२७१
फासेत्ता	११६-२६०	सण्णवत्तयितुं	११४-२५२	हल्लोहलिया	११६-२७१
बहुमय	११४-२३६	सतक्कतु	१११-१३	हित	१११-६०
बीज	११७-२८२	सत	१११-६१	हेतु	११६-२६१
भिगु	११६-२७२	समय	१११-१		
भोयणच्चिया	११४-२५१	सम्मय	११४-२३६		

*

पारकजहु (६)। दिन्मलंच कलकया! मम! रक्तदप
 (६) इयं निद्रि सुक शैहं। तव मा २ मंडलि। दश। न रक्त
 कलियं चंदपहा चंदणं। त्वा वं मरुगार गण्डिकडा
 ३। इच्छयं तरवच्च सच्चमणदं गाहा इणां छंफियं। नव
 मकयं साहउ म्भं तयं। ऊवाणा ककणं मया सुयह
 ए विना सणकाणां। नहारगपुरंदर! सिरि विजयभेण
 गभुलीणां! सीसेण बालमइणा। नगानिहाणाए
 यइ सुहजराउ। ता नयउ ए सयंघो। मंगलउ मवमंघ
 इति श्री कल्यांतरवांछा संघः॥ समाप्तः॥

*

प्रकाशक

शारदाबेन चिमनभाई एज्युकेशनल रिसर्च सेन्टर

‘दर्शन’, शाहीबाग, अहमदाबाद-३८० ००४.

*